

॥ तैत्तिरीय संहिता ॥

॥ काण्डम् २ ॥

॥ प्रथमः प्रश्नः ॥

॥ तैत्तिरीयसंहितायां द्वितीयकाण्डे प्रथमः प्रश्नः ॥

वा॒य॒व्यः॑ श्वे॒तमा॒ल॒भेत् भू॒ति॒कामो वा॒युर्वै क्षे॒पि॒ष्ठा दे॒वता॑
वा॒युमे॒व स्वेन॑ भा॒ग॒धे॒येनोप॑धावति॒ स ए॒वैनं॑ भू॒तिं ग॒मय॑ति॒
भ॒व॒त्ये॒वाति॑क्षिप्रा दे॒वते॒त्याहुः सैन॑मीश्व॒रा प्र॒दह॑ इत्ये॒तमे॒व
सन्तं॑ वा॒यवे॑ नि॒युत्वंत॑ आल॒भेत॑ नि॒युद्वा अ॒स्य धृ॒तिर्धृ॒त ए॒व
भू॒ति॒मु॒पैत्य॑प्र॒दाहाय॑ भ॒व॒त्ये॒व (१)

वा॒यवे॑ नि॒युत्वंत॑ आल॒भेत॑ ग्रा॒म॒कामो वा॒युर्वा इ॒माः प्र॒जा
न॑स्यो॒ता नै॒नीय॑ते वा॒युमे॒व नि॒युत्वंन्तः॑ स्वेन॑ भा॒ग॒धे॒येनोप॑-
धावति॒ स ए॒वास्मै॑ प्र॒जा न॑स्यो॒ता नि॒यच्छ॑ति ग्रा॒म्ये॒व
भ॒वति॑ नि॒युत्वंते॑ भ॒वति॑ ध्रु॒वा ए॒वास्मा॑ अ॒न॒पगाः॑ करोति
वा॒यवे॑ नि॒युत्वंत॑ आल॒भेत॑ प्र॒जाका॑मः प्रा॒णो वै वा॒युर॑पा॒नो
नि॒युत्प्रा॑णापा॒नौ खलु॑ वा ए॒तस्य॑ प्र॒जाया॑ (२)

अ॒प॒क्राम॑तो योऽलं॑ प्र॒जायै॑ स॒न्मृ॒जां न वि॒न्दते॑ वा॒युमे॒व

नियुत्वंन्तुः स्वेनं भागधेयेनोपधावति स एवास्मै प्राणापाना-
भ्यां प्रजां प्रजनयति विन्दते प्रजां वायवे नियुत्वंतु आलभेत
ज्योगामयावी प्राणो वै वायुरपानो नियुत् प्राणापानौ खलु वा
एतस्मादपक्रामतो यस्य ज्योगामयति वायुमेव नियुत्वंन्तुः
स्वेनं भागधेयेनोप (३)

धावति स एवास्मिन्प्राणापानौ दधात्युत यदीतासुर्भवति
जीवत्येव प्रजापतिर्वा इदमेकं आसीत्सोऽकामयत
प्रजाः पशून्सृजेयेति स आत्मनो वपामुदक्खिदत्तामग्नौ
प्रागृह्णात्ततोऽजस्तूपरः समभवत्तु स्वायै देवताया आ-
लभेत ततो वै स प्रजाः पशून्सृजत यः प्रजाकामः (४)

पशुकामः स्यात्स एतं प्राजापत्यमजन्तूपरमालभेत
प्रजापतिमेव स्वेनं भागधेयेनोपधावति स एवास्मै
प्रजां पशून्प्रजनयति यच्छ्रुणस्तत्पुरुषाणां रूपं
यत्तूपरस्तदश्वानां यदन्यतोदन्तद्गवां यदव्या इव
शफास्तदवीनां यदजस्तदजानामेतावन्तो वै ग्राम्याः
पशवस्तान् (५)

रूपेणैवावरुन्धे सोमापौष्णत्रैतमालभेत पशुकामो द्वौ

वा अजायै स्तनौ नानैव द्वावभिजायेते ऊर्जं पुष्टिं
 तृतीयः सोमापूषणावेव स्वेन भागधेयेनोपधावति तावेवास्मै
 पशून्प्रजनयतः सोमो वै रेतोधाः पूषा पशूनां प्रजनयिता
 सोम एवास्मै रेतो दधाति पूषा पशून्प्रजनयत्यौदुम्बरो
 यूपो भवत्यूर्वा उदुम्बर ऊर्कशव ऊर्जैवास्मा ऊर्जं
 पशून्वरुन्धे॥ (६)

भवत्येव प्रजायां आमयति वायुमेव नियुत्वन्तु स्वेन भागधेयेनोप प्रजाकामस्तान्
 यूपस्त्रयोदश च॥ [१]

प्रजापतिः प्रजा असृजत ता अस्मात्सृष्टाः परांचीरायन्ता
 वरुणमगच्छन्ता अन्वैत्ताः पुनरयाचत ता अस्मै न
 पुनरददात्सोऽब्रवीद्वरं वृणीष्वार्थं मे पुनर्देहीति तासां
 वरमाऽलभत स कृष्ण एकशितिपादभवद्यो वरुणगृहीतः
 स्यात्स एतं वारुणं कृष्णमेकशितिपादमालभेत वरुण (७)

मेव स्वेन भागधेयेनोपधावति स एवैनं वरुणपाशान्मुञ्चति
 कृष्ण एकशितिपाद्भवति वारुणो ह्येष देवतया
 समृद्धौ सुवर्भानुरासुरः सूर्यन्तमसाऽविद्ध्यत्तस्मै देवाः
 प्रायश्चित्तिमैच्छन्तस्य यत्प्रथमं तमोऽपाघ्नन्त्सा कृष्णा-

ऽवि॑रभ॒वद्यद्वि॒तीय॒ः सा फल्गु॑नी॒ यत्तृ॒तीय॒ः सा ब॒ल॒क्षी
यद॑द्ध्य॒स्थाद॒पाकृ॑न्त॒न्त्साऽवि॑ऽर्व॒शा (८)

सम॑भव॒त्ते दे॒वा अ॑ब्रुव॒न्देव॒प॒शुर्वा अ॒यः सम॑भू॒त्कस्मा॑
इ॒ममाल॑फ॒स्याम॒ह इत्य॑थ॒ वै तर्ह्य॑ल्पा॒ पृथि॑व्यासी॒दजा॑ता॒
ओष॑धय॒स्तामवि॑ व॒शामा॑दित्येभ्यः॒ कामा॑याऽल॒भन्त॒ ततो॒ वा
अप्र॑थत॒ पृथि॑व्यजा॒यन्तौष॑धयो॒ यः का॒मये॑त॒ प्रथे॑य॒ प॒शुभिः॒ प्र
प्र॒जया॑ जाये॒येति॒ स ए॒तामवि॑ व॒शामा॑दित्येभ्यः॒ कामा॑- (९)

यऽऽ ल॑भेतादित्याने॒व का॒मः स्वेन॑ भा॒गधे॑ये॒नोप॑धावति॒
त ए॒वैनं॑ प्र॒थय॑न्ति॒ प॒शुभिः॒ प्र प्र॒जया॑ जनयन्त्य॒सावा॑दित्यो
न व्य॑रोचत॒ तस्मै॑ दे॒वाः प्राय॑श्चित्ति॒मैच्छु॑न्तस्मा॑ ए॒ता
म॒ल्हा आल॑ऽभन्ताग्नेयीं॒ कृ॑ष्णग्री॒वीः स॑हि॒तामै॒न्द्रीः
श्वेतां॑ बा॒र्हस्प॑त्यां ताभि॑रे॒वास्मि॑न्नुच॑मदधुर्यो॒ ब्र॒ह्मव॑र्च॒सका॑मः
स्यात्त॑स्मा॑ ए॒ता म॒ल्हा आल॑भे (१०)

ताग्नेयीं॒ कृ॑ष्णग्री॒वीः स॑हि॒तामै॒न्द्रीः श्वेतां॑
बा॒र्हस्प॑त्यामे॒ता ए॒व दे॒वताः स्वेन॑ भा॒गधे॑ये॒नोप॑धावति॒
ता ए॒वास्मि॑न्ब्र॒ह्मव॑र्च॒सं द॑धति॒ ब्र॒ह्मव॑र्च॒स्यैव॑ भ॒वति॒
व॒सन्ता॑ प्रा॒तरा॑ग्नेयीं॒ कृ॑ष्णग्री॒वीमाल॑भेत॒ ग्री॒ष्मे म॒ध्यन्दि॑ने

सं॒हि॒तामै॒न्द्रीं॑ श॒रद्य॑परा॒ह्णे श्वे॒तां बा॒रुह॑स्प॒त्यां त्रीणि॒
वा आ॑दि॒त्यस्य॒ तेजा॑सि॒ वस॑न्ता॒ प्रा॒तर्ग्री॑ष्मे म॒ध्यन्दि॑ने
श॒रद्य॑परा॒ह्णे याव॑न्त्ये॒व तेजा॑सि॒ तान्ये॒- (११)

वा॒वं रु॒न्धे सं॒वत्स॑रं पु॒र्याल॑भ्यन्ते सं॒वत्स॑रो वै ब्र॒ह्मव॑र्च॒सस्य॑
प्र॒दा॒ता सं॑ वत्स॒र ए॒वास्मै॑ ब्र॒ह्मव॑र्च॒सं प्र॑यच्छति ब्र॒ह्मव॑र्च॒स्यैव॑
भ॑वति गु॒र्भिण॑यो भवन्तीन्द्रि॒यं वै गर्भ॑ इन्द्रि॒यमे॒वास्मि॑न्दधति
सा॒रस्व॑तीं मे॒षीमा॑ल॒भेत॒ य ई॑श्व॒रो वा॒चो व॑दि॒तोः स॒न्वाच॑न्न
व॒देद्वा॒ग्वै सर॑स्वती॒ सर॑स्वतीमे॒व स्वेन॑ भा॒गधे॑ये॒नोप॑धावति
सै॒वास्मि॑न् (१२)

वा॒चं द॑धाति प्र॒वदि॑ता वा॒चो भ॑व॒त्यप॑न्नदती भवति
तस्मा॑न्मनु॒ष्याः सर्वा॑ वा॒चं व॑दन्त्याग्ने॒यं कृ॑ष्ण॒ग्री॒वमा॑
ल॒भेत॒ सौम्यं॑ ब॒भ्रुं ज्यो॑गा॒मया॑व्य॒ग्निं वा॑ ए॒तस्य॒ शरी॑रं
गच्छ॑ति सोम॒ं रसो॒ यस्य॒ ज्यो॑गा॒मय॑त्य॒ग्नेरे॒वास्य॒ शरी॑रं
निष्क्री॑णाति सोमा॒द्रस॑मु॒त यदी॒तासु॑र्भवति जी॒वत्ये॑व सौम्यं
ब॒भ्रुमा॑ल॒भेता॑ग्ने॒यं कृ॑ष्ण॒ग्री॒वं प्र॒जाका॑मः सोमो॒ (१३)

वै रे॒तोधा॑ अ॒ग्निः प्र॒जाना॑ प्र॒जन॑यिता सोमं ए॒वास्मै॑
रेतो॒ दधा॑त्य॒ग्निः प्र॒जां प्र॒ज॑नयति वि॒न्दते॑ प्र॒जामा॑ग्ने॒यं

कृष्णग्रीवमालभेत सौम्यं बभ्रुं यो ब्राह्मणो विद्यामनूच्य
न विरोचेत् यदाग्नेयो भवति तेज एवास्मिन्तेन दधाति
यत्सौम्यो ब्रह्मवर्चसं तेन कृष्णग्रीव आग्नेयो भवति तम
एवास्मादपहन्ति श्वेतो भवति (१४)

रुचमेवास्मिन्दधाति बभ्रुः सौम्यो भवति ब्रह्मवर्चस-
मेवास्मिन्त्विषिं दधात्याग्नेयं कृष्णग्रीवमालभेत सौम्यं
बभ्रुमाग्नेयं कृष्णग्रीवं पुरोधायः स्पर्धमान आग्नेयो वै
ब्राह्मणः सौम्यो राजन्योऽभितः सौम्यमाग्नेयौ भवतस्तेजसैव
ब्रह्मणोभ्यतो राष्ट्रं परिगृह्णात्येकधा समावृङ्क्ते पुर एनं
दधते॥ (१५)

लभेत वरुणं वशैतामविं वशामादित्येभ्यः कामाय मल्हा आलभेत तान्येव सैवास्मिन्त्सोमः
श्वेतो भवति त्रिचंत्वारिंशच्च। (२)॥ [२]

देवासुरा एषु लोकेष्वस्पर्द्धन्त स एतं विष्णुर्वामनम-
पश्यत्तः स्वायै देवताया आलभत ततो वै स
इमाल्लोकानभ्यजयद्वैष्णवं वामनमालभेत स्पर्द्धमानो
विष्णुरेव भूत्वेमाल्लोकानभिजयति विषम आलभेत विषमा
इव हीमे लोकाः समृद्ध्या इन्द्राय मन्युमते मनस्वते ललामं

प्राशृङ्गमालभेत सङ्ग्रामे (१६)

सं यत्त इन्द्रियेण वै मन्युना मनसा सङ्ग्रामं जयतीन्द्रमेव
मन्युमन्तं मनस्वन्तुः स्वेन भागधेयेनोपधावति स
एवास्मिन्निन्द्रियं मन्युं मनो दधाति जयति तः
सङ्ग्राममिन्द्राय मरुत्वन्ते पृश्निसक्थमालभेत ग्रामकाम
इन्द्रमेव मरुत्वन्तुः स्वेन भागधेयेनोपधावति स एवास्मै
सजातान्प्रयच्छति ग्राम्यैव भवति यदृषभस्तेन (१७)

ऐन्द्रो यत्पृश्निस्तेन मारुतः समृद्धौ पश्चात्पृश्निसक्थो
भवति पश्चादन्ववसायिनीमेवास्मै विशङ्करोति सौम्यं
बभ्रुमालभेतान्नकामः सौम्यं वा अन्नं सोममेव स्वेन
भागधेयेनोपधावति स एवास्मा अन्नं प्रयच्छत्यन्नाद एव
भवति बभ्रुर्भवत्येतद्वा अन्नस्य रूपं समृद्धौ सौम्यं
बभ्रुमालभेत यमलम् (१८)

राज्याय सन्तः राज्यत्रोपनमेथसौम्यं वै राज्यं सोममेव
स्वेन भागधेयेनोपधावति स एवास्मै राज्यं प्रयच्छत्युपैनः
राज्यन्नमति बभ्रुर्भवत्येतद्वै सोमस्य रूपं समृद्ध्या इन्द्राय
वृत्रतुरै ललामं प्राशृङ्गमालभेत गतश्रीः प्रतिष्ठाकामः

पाप्मानमेव वृत्रन्तीर्त्वा प्रतिष्ठां गच्छतीन्द्रायाभिमातिघ्ने
ललामं प्राशृङ्गमा (१९)

लभेत यः पाप्मनां गृहीतः स्यात्पाप्मा वा
अभिमातिरिन्द्रमेवाभिमातिहन्ः स्वेन भागधेयेनोप-
धावति स एवास्मात्पाप्मानमभिमातिं प्रणुदत इन्द्राय
वज्रिणे ललामं प्राशृङ्गमालभेत यमलः राज्याय सन्तः
राज्यत्रोपनमेदिन्द्रमेव वज्रिणः स्वेन भागधेयेनोपधावति
स एवास्मै वज्रं प्रयच्छति स एनं वज्रो भूत्या इन्ध उपैनः
राज्यन्नमति ललामः प्राशृङ्गो भवत्येतद्वै वज्रस्य रूपः
समृद्धौ ॥ (२०)

सङ्ग्रामे तेनालमभिमातिघ्ने ललामं प्राशृङ्गमैनं पञ्चदश च।३। ॥ [३]

असावादित्यो न व्यरोचत तस्मै देवाः प्रायश्चित्ति-
मैच्छन्तस्मा एतान्दशर्षभामाऽलभन्त तयैवास्मिन्नुचमदधुर्यो
ब्रह्मवर्चसकामः स्यात्तस्मा एतान्दशर्षभामाऽलभेतामुमेवा-
दित्यः स्वेन भागधेयेनोपधावति स एवास्मिन्ब्रह्म-
वर्चसन्दधाति ब्रह्मवर्चस्यैव भवति वसन्तां प्रातस्त्रील्ललामाना-
लभेत ग्रीष्मे मध्यन्दिने (२१)

त्रीञ्छितिपृष्ठाञ्छुरद्यपराह्णे त्रीञ्छितिवारात्रीणि वा
 आदित्यस्य तेजांसि वसन्ता प्रातर्ग्रीष्मे मध्यन्दिने
 शरद्यपराह्णे यावन्त्येव तेजांसि तान्येवावरुन्धे त्रयस्त्रय
 आलभ्यन्तेऽभिपूर्वमेवास्मिन्तेजो दधाति संवत्सरं
 पर्यालभ्यन्ते संवत्सरो वै ब्रह्मवर्चसस्य प्रदाता सं
 वत्सर एवास्मै ब्रह्मवर्चसं प्रयच्छति ब्रह्मवर्चस्यैव भवति
 संवत्सरस्य परस्तात्प्राजापत्यङ्कद्रुम् (२२)

आलभेत प्रजापतिः सर्वा देवता देवतास्वेव
 प्रतितिष्ठति यदि बिभीयाद्दुश्चर्मा भविष्यामीति सोमापौष्णः
 श्याममालभेत सौम्यो वै देवतया पुरुषः पौष्णाः पशवः
 स्वयैवास्मै देवतया पशुभिस्त्वचङ्करोति न दुश्चर्मा भवति
 देवाश्च वै यमश्चास्मिन्नौकेऽस्पृद्धन्त स यमो देवानामिन्द्रियं
 वीर्यमयुवत् तद्यमस्य (२३)

यमत्वन्ते देवा अमन्यन्त यमो वा इदमभूद्यद्वयः
 स्म इति ते प्रजापतिमुपाधावन्त्स एतौ प्रजापतिरात्मनं
 उक्षवशौ निरमिमीत् ते देवा वैष्णावरुणीं वशामा-
 लभन्तैन्द्रमुक्षाणन्तं वरुणेनैव ग्राहयित्वा विष्णुना यज्ञेन

प्राणुदन्तैन्द्रेणैवास्यैन्द्रियमवृञ्जत यो भ्रातृव्यवान्स्यात्स
स्पर्द्धमानो वैष्णावरुणीम् (२४)

वशामालभेतैन्द्रमुक्षाणं वरुणेनैव भ्रातृव्यङ्गाहयित्वा
विष्णुना यज्ञेन प्रणुदत ऐन्द्रेणैवास्यैन्द्रियं वृङ्क्ते भवत्यात्मना
परास्य भ्रातृव्यो भवतीन्द्रो वृत्रमहन्तं वृत्रो हतः
षोडशभिर्भोगैरसिनात्तस्य वृत्रस्य शीर्षतो गाव उदायन्ता
वैदेह्योऽभवन्तासामृषभो जघनेऽनूदैत्तमिन्द्रः (२५)

अचायत्सोऽमन्यत यो वा इममालभेत मुच्येतास्मात्पा-
प्मन् इति स आग्नेयं कृष्णग्रीवमालभेतैन्द्रमृषभन्तस्याग्निरेव
स्वेन भागधेयेनोपसृतः षोडशधा वृत्रस्य भोगानप्यदह-
दैन्द्रेणैन्द्रियमात्मन्नधत्त यः पाप्मना गृहीतः स्यात्स
आग्नेयं कृष्णग्रीवमालभेतैन्द्रमृषभमग्निरेवास्य स्वेन
भागधेयेनोपसृतः (२६)

पाप्मानमपि दहत्यैन्द्रेणैन्द्रियमात्मन्यत्ते मुच्यन्ते पाप्मनो
भवत्येव द्यावापृथिव्यान्धेनुमालभेत ज्योगंपरुद्धोऽनयोर्हि वा
एषोऽप्रतिष्ठितोऽथैष ज्योगंपरुद्धो द्यावापृथिवी एव स्वेन
भागधेयेनोपधावति ते एवैनं प्रतिष्ठाङ्गमयतः प्रत्येव तिष्ठति

पर्या॒रिणी॑ भवति पर्या॒रीव॒ ह्येतस्य॑ रा॒ष्ट्रं यो ज्योग॑ंपरुद्धः
समृ॑द्धौ वाय॒व्यम् (२७)

व॒त्समा ल॑भेत वा॒युर्वा अ॒नयोर्व॑त्स इ॒मे वा ए॒तस्मै लो॒का
अप॑शुष्का॒ विडप॑शुष्काऽथैष ज्योग॑प॒रुद्धो वा॒युमे॒व स्वेन॑
भा॒ग॒धेये॒नोप॑धावति॒ स ए॒वास्मा॑ इ॒माल्लौ॑कान् वि॒शं प्र॑दा॒पय॑ति
प्रा॒स्मा इ॒मे लो॒काः स्तु॑वन्ति भु॒ञ्जत्ये॑नं वि॒डुप॑तिष्ठते॥ (२८)

म॒ध्यन्दि॑ने कद्रुं य॒मस्य॑ स्प॒र्द्धमा॑नो वैष्णावरु॑णीन्तमिन्द्रो॑ऽस्य स्वेन॑ भा॒ग॒धेये॒नोप॑सृतो वाय॒व्यं
द्विच॑त्वारि॒ंशच्च। (४)॥

[४]

इन्द्रो॑ व॒लस्य॑ बि॒लम॑पौर्णो॒त्स य उ॑त्त॒मः प॒शुरा॑सीत्तं पृ॒ष्ठं
प्रति॑ स॒ङ्ग॒ह्योद॑क्खिदत्तं स॒हस्रं॑ प॒शवो॑ऽनू॒दाय॑न्त्स उ॒न्नतो॑-
ऽभ॒वद्यः॑ प॒शुका॑मः स्यात्स ए॒तमै॑न्द्रमु॒न्नत॑माल॑भेतेन्द्र॒मेव स्वेन॑
भा॒ग॒धेये॒नोप॑धावति॒ स ए॒वास्मै॑ प॒शून्प्र॑यच्छति प॒शुमा॑ने॒व
भ॑वत्यु॒न्नतः॑ (२९)

भ॒वति॑ सा॒हस्री॑ वा ए॒षा ल॒क्ष्मी यदु॑न्न॒तो ल॒क्ष्मियै॑व
प॒शून॑वरु॒न्धे य॒दा स॒हस्रं॑ प॒शून्प्राप्सु॑यादथ॒ वैष्ण॒वं वा॑म॒नमा
ल॑भेतै॒तस्मि॒न्वै तत्स॒हस्र॑म॒र्द्ध्यति॑ष्ठत्तस्मा॑देष वा॑म॒नः समी॑षितः
प॒शुभ्य॑ ए॒व प्र॑जा॒तेभ्यः॑ प्र॒तिष्ठा॑न्दि॒धाति॑ कोऽ॒र्हति॑ स॒हस्रं॑

प॒शून्प्राप्तु॑मित्या॑हुरहो॒रात्रा॑ण्ये॒व स॒हस्र॑ः स॒म्पाद्या॑ल॒भेत॑
प॒शवः॑ (३०)

वा अ॑हो॒रात्रा॑णि प॒शूने॒व प्र॒जा॑ता॒न्प्रति॑ष्ठाङ्ग॑मय॒त्योष॑धी॒भ्यो
वे॒हत॑मा॒ल॒भेत॑ प्र॒जाका॑म॒ ओष॑धयो॒ वा ए॒तं प्र॒जायै॑ परि॒बाध॑न्ते
योऽलं॑ प्र॒जायै॑ स॒न्प्रजा॑ न वि॒न्दत॑ ओष॑धयः॒ खलु॑ वा ए॒तस्यै॑
सू॒तुम॑पि॒ घ्नन्ति॑ या वे॒हद्भव॑त्योष॑धीरे॒व स्वेन॑ भा॒ग॒धेये॒नोप॑-
धा॒वति॑ ता ए॒वास्मै॑ स्वा॒द्योनेः॑ प्र॒जां प्र॒ज॑नयन्ति वि॒न्दते॑ (३१)

प्र॒जामा॑पो॒ वा ओष॑धयोऽस॒त्पुरु॑ष॒ आप॑ ए॒वास्मा॑
अस॑तः स॒द्वद॑ति॒ तस्मा॑दा॒हुर्यश्चै॒वं वेद॑ यश्च॒ नाप॑स्त्वा॒वास॑तः
स॒द्वद॑तीत्यै॒न्द्रीः सू॒तव॑शा॒मा॒ल॒भेत॑ भू॒ति॒का॒मोऽजा॑तो॒ वा ए॒ष
योऽलं॑ भू॒त्यै स॒न्भूति॑न्न प्रा॒प्नोती॑न्द्रं॒ खलु॑ वा ए॒षा सू॒त्वा
व॒शाऽभ॑वत् (३२)

इन्द्र॑मे॒व स्वेन॑ भा॒ग॒धेये॒नोप॑धा॒वति॑ स ए॒वैनं॑ भू॒ति॒ङ्ग॑मयति॒
भव॑त्ये॒व यः सू॒त्वा व॒शा स्या॑त्तमै॒न्द्रमे॒वा॒ल॒भेतै॒तद्वा॑व
तदि॑न्द्रि॒यः सा॒क्षादे॒वेन्द्रि॒यम॑वरु॒न्ध ऐ॒न्द्राग्रं॑ पु॒नरु॑त्थ॒सृष्ट॑मा॒ल॒भेत॑
य आ॑ तृ॒तीया॒त्पुरु॑षा॒त्सोम॑न्न पि॒बेद्वि॑च्छि॒न्नो वा ए॒तस्य॑
सोम॑पी॒थो यो ब्रा॑ह्म॒णः स॒न्ना (३३)

तृतीयात्पुरुषात्सोमन् पिबतीन्द्राग्नी एव स्वेन
 भागधेयेनोपधावति तावेवास्मै सोमपीथं प्रयच्छत
 उपैन९ सोमपीथो नमति यदैन्द्रो भवतीन्द्रियं वै सोमपीथ
 इन्द्रियमेव सोमपीथमवरुन्धे यदाग्नेयो भवत्याग्नेयो वै
 ब्राह्मणः स्वामेव देवतामनु सन्तनोति पुनरुत्सृष्टो भवति
 पुनरुत्सृष्ट इव ह्येतस्य (३४)

सोमपीथः समृद्धौ ब्राह्मणस्पत्यन्तूपरमालभेताभि-
 चरन्ब्रह्मणस्पतिमेव स्वेन भागधेयेनोपधावति तस्मा एवैनमा
 वृश्चति ताजगार्तिमाच्छति तूपरो भवति क्षुरपविर्वा एषा
 लक्ष्मी यत्तूपरः समृद्धौ स्फ्यो यूषो भवति वज्रो वै स्फ्यो
 वज्रमेवास्मै प्रहरति शरमयं बर्हिः शृणात्येवैनं वैभीदक
 इद्धो भिनत्येवैनम्॥ (३५)

भवत्युन्नतः पशवो जनयन्ति विन्दतेऽभवत्सत्रैतस्येद्धास्त्रीणि च॥—————[५]

बार्हस्पत्यः शितिपृष्ठमालभेत ग्रामकामो यः
 कामयेत पृष्ठः संमानानां स्यामिति बृहस्पतिमेव स्वेन
 भागधेयेनोपधावति स एवैनं पृष्ठः संमानानांङ्करोति ग्राम्येव
 भवति शितिपृष्ठो भवति बार्हस्पत्यो ह्येष देवतया समृद्धौ

पौष्णः श्याममालभेतान्नकामोऽन्नं वै पूषा पूषणमेव स्वेन
भागधेयेनोपधावति स एवास्मै (३६)

अन्नं प्रयच्छन्त्यन्नाद एव भवति श्यामो भवत्येतद्वा
अन्नस्य रूपः समृद्धौ मारुतं पृश्निमालभेतान्नकामोऽन्नं वै
मारुतो मारुत एव स्वेन भागधेयेनोपधावति त एवास्मा अन्नं
प्रयच्छन्त्यन्नाद एव भवति पृश्निर्भवत्येतद्वा अन्नस्य रूपः
समृद्ध्या ऐन्द्रमरुणमालभेतेन्द्रियकाम इन्द्रमेव (३७)

स्वेन भागधेयेनोपधावति स एवास्मिन्निन्द्रियं
दधातीन्द्रियाव्येव भवत्यरुणो भ्रूमान्भवत्येतद्वा इन्द्रस्य
रूपः समृद्धौ सावित्रमुपद्धुस्तमालभेत सनिकामः सविता
वै प्रसवानामीशे सवितारमेव स्वेन भागधेयेनोपधावति स
एवास्मै सनिं प्रसुवति दानकामा अस्मै प्रजा भवन्त्युपद्धुस्तो
भवति सावित्रो ह्येषः (३८)

देवतया समृद्धौ वैश्वदेवं बहुरूपमालभेतान्नकामो वैश्वदेवं
वा अन्नं विश्वानेव देवान्स्वेन भागधेयेनोपधावति त एवास्मा
अन्नं प्रयच्छन्त्यन्नाद एव भवति बहुरूपो भवति बहुरूपः
ह्यन्नः समृद्धौ वैश्वदेवं बहुरूपमालभेत ग्रामकामो वैश्वदेवा
वै सजाता विश्वानेव देवान्स्वेन भागधेयेनोपधावति त

ए॒वास्मै (३९)

स॒जा॒तान्प्रयच्छन्ति॑ ग्रा॒म्ये॒व भ॑वति बहु॒रूपो भ॑वति
 बहु॒दे॒व॒त्यो ३ ह्ये॒ष स॑मृ॒द्धौ प्रा॒जाप॒त्यन्तू॒प॒र॒मा॒ल॒भेत्
 यस्याना॑ज्ञातमिव॒ ज्यो॒गा॒म॒ये॒त्प्रा॒जाप॒त्यो वै पु॑रुषः
 प्र॒जाप॑तिः खलु॒ वै तस्य॑ वेद॒ यस्याना॑ज्ञातमिव॒
 ज्यो॒गा॒म॒य॑ति प्र॒जाप॑तिमे॒व स्वेन॑ भा॒ग॒धे॒ये॒नोप॑धावति
 स ए॒वैन॑न्तस्मा॒त्स्त्रामा॑न्मु॒ञ्चति॑ तू॒प॒रो भ॑वति प्रा॒जाप॒त्यो ह्ये॒ष
 दे॒व॒त॒या स॑मृ॒द्धौ॥ (४०)

अस्मा॒ इन्द्र॑मे॒वेष॑ संजा॒ता वि॒श्वाने॒व दे॒वान्स्वेन॑ भा॒ग॒धे॒ये॒नोप॑धावति॒ त ए॒वास्मै॑ प्रा॒जाप॒त्यो
 हि त्रीणि॑ च॥ [६]

व॒ष॒ट्कारो॒ वै गा॑यत्रि॒ये शिरो॑ऽच्छि॒न॒त्तस्यै॒ रसः॒ परा॑-
 ऽप॒त॒त्तं बृ॒ह॒स्पति॑रुपा॒ंगृ॒ह्णा॒त्सा शि॑तिपृ॒ष्ठा व॒शाऽभ॑वद्यो
 द्वि॒तीयः॒ परा॑प॒त॒त्तं मि॒त्रावरु॑णा॒वुपा॑ंगृ॒ह्णीता॒ः सा द्वि॑रू॒पा
 व॒शाऽभ॑वद्यस्तृ॒तीयः॒ परा॑प॒त॒त्तं वि॒श्वे दे॒वा उपा॑ंगृ॒ह्ण॒त्सा
 बहु॑रू॒पा व॒शाऽभ॑वद्यश्चतु॒र्थः॒ परा॑प॒त॒त्स पृ॑थि॒वीं प्रा॑वि॒श॒त्तं
 बृ॒ह॒स्पति॑र॒भि (४१)

अ॒गृ॒ह्णा॒दस्त्वे॒वायं॑ भो॒गा॒येति॑ स उ॒क्ष॒व॒शः स॑म॒भ॒व॒द्यल्लो॒हितं॑

प॒राप॑त॒त्तद्रु॑द्र उपा॑गृह्णा॒त्सा रौ॒द्री रोहि॑णी व॒शाऽभ॑व-
 द्वा॒र्हस्प॑त्या ५ शि॑तिपृ॒ष्ठामा॑ल॒भेत॑ ब्रह्म॑वर्च॒सका॑मो
 बृह॑स्पति॒मेव॑ स्वेन॑ भा॒गधे॑येनोप॑धावति॒ स ए॒वास्मि॑न्ब्रह्म-
 वर्च॑स॒न्दधा॑ति ब्रह्म॑वर्च॒स्येव॑ भ॒वति॒ छन्द॑सां॒ वा ए॒ष रसो॑
 यद्व॒शा रसं॑ इव॒ खलु॑ (४२)

वै ब्रह्म॑वर्च॒सञ्छन्द॑सामे॒व रसे॑न॒ रसं॑ ब्रह्म॑वर्च॒समव॑रुन्धे
 मै॒त्रावरु॑णीं द्वि॒रूपा॑मा॒ल॒भेत॑ वृ॒ष्टि॒कामो॑ मै॒त्रं वा अ॑ह॒र्वारु॑णी
 रा॒त्रि॒रहो॑रा॒त्राभ्या॑ङ्ग॒लु वै प॒र्जन्यो॑ व॒र्षति॑ मि॒त्रावरु॑णावे॒व
 स्वेन॑ भा॒गधे॑येनोप॑धावति॒ तावे॒वास्मा॑ अ॒होरा॑त्राभ्यां॒ प॒र्जन्यं॑
 व॒र्षय॑त॒श्छन्द॑सां॒ वा ए॒ष रसो॑ यद्व॒शा रसं॑ इव॒ खलु॑ वै
 वृ॒ष्टि॒श्छन्द॑सामे॒व रसे॑न (४३)

रसं॑ वृ॒ष्टि॒मव॑रुन्धे मै॒त्रावरु॑णीं द्वि॒रूपा॑मा॒ल॒भेत॑ प्र॒जाका॑मो
 मै॒त्रं वा अ॑ह॒र्वारु॑णी रा॒त्रि॒रहो॑रा॒त्राभ्या॑ङ्ग॒लु वै प्र॒जाः प्र॒जाय॑न्ते
 मि॒त्रावरु॑णावे॒व स्वेन॑ भा॒गधे॑येनोप॑धावति॒ तावे॒वास्मा॑
 अ॒होरा॑त्राभ्यां॒ प्र॒जां प्र॒ज॑नय॒तश्छन्द॑सां॒ वा ए॒ष रसो॑ यद्व॒शा
 रसं॑ इव॒ खलु॑ वै प्र॒जा छन्द॑सामे॒व रसे॑न॒ रसं॑ प्र॒जाम॑व (४४)

रुन्धे॒ वैश्व॑दे॒वीं बहु॑रू॒पा॒मा॒ल॒भेता॑न्न॒कामो॑ वैश्व॑दे॒वं वा अ॒न्नं

विश्वानेव देवान्स्वेन भागधेयेनोपधावति त एवास्मा अन्नं प्रयच्छन्त्यन्नाद एव भवति छन्दसां वा एष रसो यद्वशा रसं इव खलु वा अन्नञ्छन्दसामेव रसेन रसमन्नमवरुन्धे वैश्वदेवीं बहुरूपामालभेत ग्रामकामो वैश्वदेवा वै (४५)

सजाता विश्वानेव देवान्स्वेन भागधेयेनोपधावति त एवास्मै सजातान्प्रयच्छन्ति ग्राम्येव भवति छन्दसां वा एष रसो यद्वशा रसं इव खलु वै सजाताश्छन्दसामेव रसेन रसं सजातानवरुन्धे बार्हस्पत्यमुक्षवशमालभेत ब्रह्मवर्चसकामो बृहस्पतिमेव स्वेन भागधेयेनोपधावति स एवास्मिन्ब्रह्मवर्चसम् (४६)

दधाति ब्रह्मवर्चस्यैव भवति वशं वा एष चरति यदुक्षा वशं इव खलु वै ब्रह्मवर्चसं वशेनैव वशं ब्रह्मवर्चसमवरुन्धे रौद्रीं रोहिणीमालभेताभिचरन्नुद्रमेव स्वेन भागधेयेनोपधावति तस्मा एवैनमावृश्चति ताजगार्तिमाच्छति रोहिणी भवति रौद्री ह्येषा देवतया समृद्धौ स्फ्यो यूपो भवति वज्रो वै स्फ्यो वज्रमेवास्मै प्रहरति शरमयं बर्हिः शृणात्येवैनं वैभीदक इच्छो भिनत्येवैनम्॥ (४७)

अभि खलु वृष्टिश्छन्दसामेव रसेन प्रजामवं वैश्वदेवा वै ब्रह्मवर्चसं यूप
एकान्नविंशतिश्च। (७)॥

[७]

असावा॑दि॒त्यो न व्य॑रोचत॒ तस्मै॑ दे॒वाः प्राय॑श्चित्ति॒मैच्छ॑न्तस्मा॒
ए॒ता९ सौ॒री९ श्वे॒तां व॒शामा॑ऽल॒भन्त॒ तयै॑वास्मि॒न्नुच॑मदधुर्यो
ब्र॒ह्मव॑र्च॒सका॑मः स्यात्तस्मा॑ ए॒ता९ सौ॒री९ श्वे॒तां
व॒शामा॑ल॒भेता॑मुमे॒वादित्य॑ः स्वेन॑ भा॒ग॒धेये॒नोप॑धावति
स ए॒वास्मि॑न्ब्रह्मवर्च॒सन्द॑धाति ब्रह्मवर्च॒स्यैव॑ भ॒वति॑ बै॒ल्वो
यूपो॑ भवत्य॒सौ (४८)

वा आ॑दि॒त्यो यतो॑ऽजायत॒ ततो॑ बि॒ल्वं उद॑तिष्ठ॒त्सयो॑न्ये॒व
ब्र॒ह्मव॑र्च॒समव॑रुन्धे ब्राह्मणस्प॒त्यां ब॑भ्रुक॒र्णीमा ल॑भेताभि॒-
च॑रन्वारु॒णं दश॑कपालं पुरस्ता॒न्निर्व॑पेद्वरु॒णेनै॒व भ्रातृ॑व्यङ्गाहयित्वा
ब्रह्म॑णा स्तृणुते बभ्रुक॒र्णी भ॑वत्येतद्वै ब्रह्म॑णो रू॒प९ समृ॑द्धौ
स्फ्यो॑ यूपो॑ भवति॒ वज्रो॒ वै स्फ्यो॑ वज्र॑मे॒वास्मै॒ प्रह॑रति
श॒र॒मयं॑ ब॒र्हिः शृ॒णाति॑ (४९)

ए॒वैनं॑ वैभी॑दक इ॒द्धो भि॑नत्ये॒वैनं॑ वैष्ण॒वं वा॑म॒नमा॑ल॒भेत॒
यं य॒ज्ञो नो॒प॒नमे॒द्विष्णु॑र्वै य॒ज्ञो वि॒ष्णुमे॒व स्वेन॑ भा॒ग॒धेये॒नोप॑-
धावति॒ स ए॒वास्मै॑ य॒ज्ञं प्र॑यच्छत्यु॒पैनं॑ य॒ज्ञो न॑मति॒ वाम॑नो

भवति वैष्णवो ह्येष देवताया समृद्धौ त्वाष्ट्रं वडुबमालभेत
पशुकामस्त्वष्टा वै पशूनां मिथुनानाम् (५०)

प्रजनयिता त्वष्टारमेव स्वेन भागधेयेनोपधावति स
एवास्मै पशून्मिथुनान्प्रजनयति प्रजा हि वा एतस्मिन्पशवः
प्रविष्टा अथैष पुमान्थ्सन्वडुबः साक्षादेव प्रजां पशूनवरुन्धे
मैत्रः श्वेतमालभेत सङ्ग्रामे सं यत्ते समयकामो मित्रमेव
स्वेन भागधेयेनोपधावति स एवैनं मित्रेण सन्नयति (५१)

विशालो भवति व्यवसाययत्येवैनं प्राजापत्यं
कृष्णमालभेत वृष्टिकामः प्रजापतिर्वै वृष्ट्या ईशे प्रजापतिमेव
स्वेन भागधेयेनोपधावति स एवास्मै पर्जन्यं वर्षयति
कृष्णो भवत्येतद्वै वृष्ट्यै रूपः रूपेणैव वृष्टिमवरुन्धे शबलो
भवति विद्युतमेवास्मै जनयित्वा वर्षयत्यवाशृङ्गो भवति
वृष्टिमेवास्मै नियच्छति॥ (५२)

शृणाति मिथुनानां नयति यच्छति॥ [८]

वरुणः सुषुवाणमन्नाद्यन्नोपानमथ्स एतां वारुणीं कृष्णां
वशामपश्यत्ताः स्वायै देवताया आऽलभत ततो वै
तमन्नाद्यमुपानमद्यमलमन्नाद्याय सन्तमन्नाद्यन्नोपनमेथ्स

ए॒तां वा॒रु॒णीं कृ॒ष्णां व॒शामा॑ल॒भेत॒ वरु॑णमे॒व स्वेन॑
भा॒ग॒धे॒ये॒नोप॑धावति॒ स ए॒वास्मा॒ अन्नं॒ प्रय॑च्छत्यन्ना॒दः (५३)

ए॒व भ॑वति कृ॒ष्णा भ॑वति वा॒रु॒णी ह्ये॒षा दे॒वता॑या॒
समृ॑द्ध्यै मै॒त्रः श्वे॑तमा॒ल॒भेत॒ वारु॑णं कृ॒ष्णम॒पाश्रौष॑धीनां च
स॒न्धाव॑न्न॒कामो॑ मै॒त्रीर्वा ओष॑धयो वा॒रु॒णीरापो॑ऽपां च॒ खलु॑
वा ओष॑धीनां च॒ रस॑मुप॒जीवामो॑ मि॒त्रावरु॑णावे॒व स्वेन॑
भा॒ग॒धे॒ये॒नोप॑धावति॒ तावे॒वास्मा॒ अन्नं॒ प्रय॑च्छतोऽन्ना॒द ए॒व
भ॑वति (५४)

अ॒पाश्रौष॑धीनाश्च स॒न्धावा॑ल॒भत उ॒भय॑स्याव॒रुद्ध्यै॒ विशा॑खो
यू॒पो भ॑वति॒ द्वे ह्ये॒ते दे॒वते॒ समृ॑द्ध्यै मै॒त्रः श्वे॑तमा॒ल॒भेत॒
वा॒रु॒णं कृ॒ष्णं ज्यो॑गा॒मया॑वी॒ यन्मै॒त्रो भ॑वति॒ मि॒त्रेणै॒वास्मै॒
वरु॑णः श॒मय॑ति॒ यद्वा॒रुणः॑ सा॒क्षादे॒वैनं॑ वरु॒णपा॒शान्मु॑ञ्चत्यु॒त
यदी॒तासु॑र्भवति॒ जीव॑त्ये॒व दे॒वा वै पु॑ष्टि॒न्नावि॑न्दन् (५५)

तां मि॒थुने॑ऽपश्य॒न्तस्या॒न्नं सम॑राधय॒न्ताव॑श्विना॒-
व॒ब्रूता॑मावयो॒र्वा ए॒षा मै॑तस्यां॑ वद॒द्धमि॑ति॒ सा-
ऽश्वि॑नो॒रेवा॑भ॒वद्भ्यः॑ पु॒ष्टि॑कामः॒ स्यात्स ए॒तामा॑श्वि॒नीं
य॒मीं व॒शामा॑ल॒भेता॑श्विना॒वे॒व स्वेन॑ भा॒ग॒धे॒ये॒नोप॑धावति॒

तावेवास्मिन्पुष्टिं धत्तः पुष्यति प्रजयां पशुभिः॥ (५६)

अन्नादौऽन्नाद एव भवत्यविन्दन्यश्चत्वारिंशच्च॥ [९]

आश्विनन्धूम्रललाममालभेत यो दुर्ब्राह्मणः सोमं
पिपासेदश्विनौ वै देवानामसोमपावास्तान्तौ पश्चा
सोमपीथं प्राप्तुतामश्विनावेतस्य देवता यो दुर्ब्राह्मणः
सोमं पिपासत्यश्विनावेव स्वेन भागधेयेनोपधावति
तावेवास्मै सोमपीथं प्रयच्छत उपैनः सोमपीथो नमति
यद्धूम्रो भवति धूम्रिमाणमेवास्मादपहन्ति ललामः (५७)

भवति मुखत एवास्मिन्तेजो दधाति वायव्यङ्गोमृगमालभेत
यमजघ्निवाः समभिः संयुरपूता वा एतं वागृच्छति
यमजघ्निवाः समभिः सन्ति नैष ग्राम्यः पशुनारण्यो
यद्गोमृगो नेवैष ग्रामे नारण्ये यमजघ्निवाः समभिः सन्ति
वायुर्वै देवानां पवित्रं वायुमेव स्वेन भागधेयेनोपधावति स
एव (५८)

एनं पवयति पराची वा एतस्मै व्युच्छन्ती व्युच्छति तमः
पाप्मानं प्रविशति यस्यश्विने शस्यमाने सूर्यो नाविर्भवति
सौर्यं बहुरूपमालभेतामुमेवादित्यः स्वेन भागधेयेनोप-

धावति॒ स ए॒वास्मा॒त्तमः॑ पा॒प्मान॒मप॑हन्ति प्र॒तीच्य॑स्मै
व्युच्छ॑न्ती व्युच्छ॑त्यप॒ तमः॑ पा॒प्मान॑ हते॥ (५९)

लुलामः स एव षड्वारिः शच॥ [१०]

इन्द्र॑ वो वि॒श्वत॒स्परीन्द्र॑न्नरो मरु॑तो यद्ध॑ वो दि॒वो या वः॑
शर्म॑। भरे॒ष्विन्द्र॑ ह॒वामहे॑ऽहोमुच॑ सु॒कृतं॑ दैव्यं
जन॑म्। अ॒ग्निं मि॒त्रं वरु॑णः सा॒तये॑ भग॒न्धावा॑पृथि॒वी म॒रुतः॑
स्व॒स्तये॑। म॒मत्तु॑ नः परि॑ज्मा वस॒र्हा म॒मत्तु॑ वातो॑ अ॒पां
वृष॑ण्वान्। शि॒शीत॑मिन्द्रा॒पर्वता॑ यु॒वन्न॑स्तन्नो वि॒श्वे वरि॑वस्यन्तु
दे॒वाः। प्रि॒या वो॒ नाम॑ (६०)

हुवे॑ तुराणा॑म्। आय॑त्तुप॒न्मरु॑तो वावशा॒नाः। श्रि॒यसे॑ कं
भा॒नुभिः॑ स॒म्मि॑मि॒क्षिरे॒ ते र॒श्मि॑भि॒स्त ऋ॑क्भिः सु॒खाद॑यः। ते
वा॒शीम॑न्त इ॒ष्मिणो॑ अ॒भीर॑वो वि॒द्रे प्रि॑यस्य मा॒रुत॑स्य धा॒मनः॑।
अ॒ग्निः प्र॑थ॒मो वसु॑भिर्नो॒ अव्या॒त्सोमो॑ रु॒द्रेभि॑र॒भिर॑क्षतु॒ त्मना॑।
इन्द्रो॑ म॒रुद्वि॑र॒ऋतु॑धा कृ॒णोत्वादि॒त्यैर्नो॑ वरु॑णः स॒ शि॑शातु।
सन्नो॑ दे॒वो वसु॑भि॒रग्निः॑ सम् (६१)

सोम॑स्त॒नूभी॑ रु॒द्रिया॑भिः। समिन्द्रो॑ म॒रुद्वि॑र्य॒ज्ञियैः॑
समा॑दि॒त्यैर्नो॑ वरु॑णो अ॒जि॒ज्ञिप॑त्। यथा॑ऽऽदि॒त्या

वसुभिः सम्बभूवुर्मरुद्भी रुद्राः समजानताभिः। एवा
 त्रिणामन्नहणीयमाना विश्वे देवाः समनसो भवन्तु।
 कुत्राचिद्यस्य समृतौ रण्वा नरो नृषदने। अरहन्तश्चिद्यमिन्धते
 संञ्जनयन्ति जन्तवः। सं यदिषो वनामहे सं हव्या
 मानुषाणाम्। उत द्युम्नस्य शवंसः (६२)

ऋतस्य रश्मिमाददे। यज्ञो देवानां प्रत्येति सुम्नमादित्यासो
 भवता मृडयन्तः। आवोऽर्वाचीं सुमतिर्ववृत्याद९होश्चिद्या
 वरिवोवित्तराऽसत्। शुचिरपः सूयवसा अदब्ध उपक्षेति
 वृद्धवयाः सुवीरः। नकिष्टं घ्नन्त्यन्तितो न दूराद्य आदित्यानां
 भवन्ति प्रणीतौ। धारयन्त आदित्यासो जगत्स्था देवा
 विश्वस्य भुवनस्य गोपाः। दीर्घार्धियो रक्षमाणाः (६३)

असुर्यमृतावानश्चयमाना ऋणानि। तिस्रो भूमीर्धारयन्त्री९
 रुत द्यूत्रीणि व्रता विदथे अन्तरेषाम्। ऋतेनादित्या महि
 वो महित्वन्तर्दयमन्वरुण मित्र चारु। त्यान्नु क्षत्रिया९
 अव आदित्यान् याचिषामहे। सुमृडीका९ अभिष्टये। न
 दक्षिणा विचिकिते न सव्या न प्राचीनमादित्या नोत पश्चा।
 पाक्याचिद्वसवो धीर्याचित् (६४)

युष्मानीतो अभयं ज्योतिरश्याम्। आदित्यानामवसा
 नूतनेन सक्षीमहि शर्मणा शन्तमेन। अनागास्त्वे अदितित्वे
 तुरासं इमं यज्ञन्दधतु श्रोषमाणाः। इमं मे वरुण श्रुधी
 हवमद्या च मृडय। त्वामवस्युराचके। तत्त्वां यामि ब्रह्मणा
 वन्दमानस्तदाशास्ते यजमानो हविर्भिः। अहँडमानो वरुणेह
 बोद्ध्युरुशंस मा न आयुः प्रमोषीः॥ (६५)

नामाग्निः स९ शवसो रक्षमाणा धीर्याचिदेकान्नपञ्चाशच्च॥—[११][वायव्यं प्रजापतिस्ता
 वरुणं देवासुरा एष्वंसावादित्यो दशरूपभामिन्द्रो वलस्यं बारहस्पत्यं वषट्कारोऽसौ सौरी
 वरुणमाश्विनमिन्द्रं वो नर एकादश॥११॥ वायव्यमाग्नेयीं कृष्णग्रीवीमसावादित्यो वा
 अंहोरात्राणि वषट्कारः प्रजनयिता हुवे तुराणां पञ्चषष्टिः॥६५॥ वायव्यं प्रमोषीः॥]

॥द्वितीयः प्रश्नः॥

॥तैत्तिरीयसंहितायां द्वितीयकाण्डे द्वितीयः प्रश्नः॥

प्रजापतिः प्रजा असृजत् ताः सृष्टा इन्द्राग्नी अपागूहता९
 सोऽचायत्प्रजापतिरिन्द्राग्नी वै मे प्रजा अपाघुक्षतामिति
 स एतमैन्द्राग्रमेकादशकपालमपश्यत्तन्निरवपत्तावस्मै प्रजाः
 प्रासाधयतामिन्द्राग्नी वा एतस्य प्रजामपगूहतो योऽलं प्रजायै

सन्प्रजां न विन्दत ऐन्द्राग्रमेकादशकपालन्निर्वपेत्प्रजाकाम
इन्द्राग्नी (१)

एव स्वेन भागधेयेनोपधावति तावेवास्मै प्रजां प्रसाधयतो
विन्दते प्रजामैन्द्राग्रमेकादशकपालन्निर्वपेत्स्पृष्टमानः क्षेत्रे
वा सजातेषु वेन्द्राग्नी एव स्वेन भागधेयेनोपधावति
ताभ्यामेवेन्द्रियं वीर्यं भ्रातृव्यस्य वृद्धे वि पाप्मना
भ्रातृव्येण जयतेऽप वा एतस्मादिन्द्रियं वीर्यं क्रामति यः
सङ्ग्राममुपप्रयात्यैन्द्राग्रमेकादशकपालन्निः (२)

वपेत्सङ्ग्राममुपप्रयास्यन्निन्द्राग्नी एव स्वेन भागधेयेनोप-
धावति तावेवास्मिन्निन्द्रियं वीर्यं धत्तः सहेन्द्रियेण
वीर्येणोपप्रयाति जयति तं सङ्ग्रामं वि वा एष
इन्द्रियेण वीर्येणर्ह्यते यः सङ्ग्रामञ्जयत्यैन्द्राग्रमेकादश-
कपालन्निर्वपेत्सङ्ग्रामञ्जित्वेन्द्राग्नी एव स्वेन भागधेयेनोप-
धावति तावेवास्मिन्निन्द्रियं वीर्यम् (३)

धत्तो नेन्द्रियेण वीर्येण व्यृध्यतेऽप वा एतस्मादिन्द्रियं
वीर्यङ्ग्रामति य एति जनतामैन्द्राग्रमेकादशकपालन्निर्वपेज्जनतामे

ए॒व स्वेन॑ भा॒ग॒धे॒ये॒नोप॑धावति॒ तावे॒वास्मि॑न्निन्द्रि॒यं वी॒र्यं॑ धत्तः
स॒हेन्द्रि॒येण॑ वी॒र्ये॑ण ज॒नता॑मेति पौ॒ष्णं च॒रुमनु॑निर्वपेत्पू॒षा वा
इन्द्रि॒यस्य॑ वी॒र्यस्यानु॑प्रदा॒ता पू॒षण॑मेव (४)

स्वेन॑ भा॒ग॒धे॒ये॒नोप॑धावति॒ स ए॒वास्मा॑ इन्द्रि॒यं वी॒र्यमनु॑
प्रय॑च्छति॒ क्षेत्र॑प॒त्यं च॒रुं निर्व॑पेज्ज॒नता॑मा॒गत्ये॒यं वै क्षेत्र॑स्य
पति॑र॒स्यामे॒व प्रति॑तिष्ठत्यैन्द्रा॒ग्रमेका॑दशकपालमु॒परि॑ष्टा॒न्निर्व॑पेद्
प्रति॑ष्ठायेन्द्रि॒यं वी॒र्यमु॒परि॑ष्टादात्मन्धत्ते॥॥ (५)

प्रजाकाम इन्द्राग्री उपप्रयात्यैन्द्राग्रमेकादशकपालन्निर्वीर्यं पूषणमेवैकान्नचत्वारिंशच्च॥१॥ [१]

अ॒ग्नये॑ प॒थि॒कृते॑ पु॒रोडा॑शम॒ष्टाक॑पाल॒न्निर्व॑पेद्यो
दर्श॑पूर्णमा॒सया॒जी सन्न॑मावा॒स्यां वा पौ॑र्णमा॒सीं वा
ऽति॑पा॒दये॑त्प॒थो वा ए॒षोऽद्ध॑प॒थेनै॑ति॒ यो दर्श॑पूर्णमा॒सया॒जी
सन्न॑मावा॒स्यां वा पौ॑र्णमा॒सीं वाऽति॑पा॒दय॑त्य॒ग्निमे॒व
प॒थि॒कृत॑ः स्वेन॑ भा॒ग॒धे॒ये॒नोप॑धावति॒ स ए॒वैन॑मप॒थात्प॒न्थाम॑पि
नय॑त्यन॒ङ्गान्दक्षि॑णा व॒ही ह्ये॑ष स॒मृद्ध्या॑ अ॒ग्नये॑ व्र॒तप॑तये (६)

पु॒रोडा॑शम॒ष्टाक॑पाल॒न्निर्व॑पेद्य आहि॑ताग्निः सन्न॑व्र॒त्यमि॑व
चरे॑द्द॒ग्निमे॒व व्र॒तप॑तिः स्वेन॑ भा॒ग॒धे॒ये॒नोप॑धावति॒

स ए॒वैन॑व्र॒तमाल॑भयति॒ व्रत्यो॑ भवत्य॒ग्रये॑ रक्षो॒घ्ने
 पु॒रोडा॑शम॒ष्टाक॑पाल॒न्निर्व॑पेद्य॒ रक्षा॑सि॒ सचै॑रन्न॒ग्निमे॑व
 र॒क्षो॒हण॑ꣳ स्वेन॑ भा॒ग॒धेये॑नोप॑धावति॒ स ए॒वास्मा॑द्रक्षा॒ꣳस्यप॑हन्ति॒
 नि॒शि॒ताया॑न्निर्व॑पेत् (७)

नि॒शि॒ताया॑ꣳ हि रक्षा॑सि॒ प्रेर॑ते॒ सम्प्रे॑र्णान्ये॒वैनानि॑
 हन्ति॒ परि॑श्रिते॒ याज॑येद्रक्ष॑साम॒नन्व॑वचाराय॒ रक्षो॑घ्नी
 या॑ज्यानुवा॒क्ये भव॑तो॒ रक्ष॑साꣳ स्तृ॒त्या अ॒ग्रये॑ रु॒द्रव॑ते
 पु॒रोडा॑शम॒ष्टाक॑पाल॒न्निर्व॑पेदभि॒चर॑न्नेषा॒ वा अ॑स्य॒ घो॒रा
 त॒नूर्य॑द्रु॒द्रस्त॑स्मा॒ ए॒वैन॑मावृ॑श्चति॒ ताज॑गार्ति॒माच्छ॑त्य॒ग्रये॑
 सु॒रभि॑मते॒ पु॒रोडा॑शम॒ष्टाक॑पाल॒न्निर्व॑पेद्यस्य॒ गावो॑ वा
 पु॒रुषाः॑ (८)

वा प्र॒मीये॑रन् यो वा॑ बिभी॒यादेषा॑ वा अ॑स्य
 भेष॑ज्या॒ त॒नूर्य॑त्सु॒रभि॑मती॒ तयै॑वास्मै॒ भेष॑जङ्क॒रोति॑
 सु॒रभि॑मते॒ भव॑ति॒ पू॒तीग॑न्धस्याप॑हत्या॒ अ॒ग्रये॑ क्षाम॑वते
 पु॒रोडा॑शम॒ष्टाक॑पाल॒न्निर्व॑पेत्सङ्ग्रा॒मे सं य॑त्ते भा॒ग॒धेये॑नै॒वैनꣳ
 श॑मयित्वा॒ परा॑न॒भि निर्दि॑शति॒ यम॑वरेषां॒ विच्छ॑न्ति॒ जीव॑न्ति॒

स यं परेषां प्र स मीयते जयति त९ सङ्ग्रामम् (९)

अभि वा एष एतानुच्यति येषां पूर्वापरा अन्वञ्चः
प्रमीयन्ते पुरुषाहुतिर्ह्यस्य प्रियतमाऽग्नये क्षामवते
पुरोडाशमष्टाकपालन्निर्वपेद्भागधेयेनैवैन९ शमयति नैषां पुरा-
ऽऽयुषोऽपरः प्रमीयतेऽभि वा एष एतस्य गृहानुच्यति यस्य
गृहान्दहत्यग्नये क्षामवते पुरोडाशमष्टाकपालन्निर्वपेद्भागधेयेनैवैन-
शमयति नास्यापरङ्गृहान्दहति॥ (१०)

व्रतपतये निशितायान्निर्वपेत्पुरुषाः सङ्ग्रामत्र चत्वारि च॥ [२]

अग्नये कामाय पुरोडाशमष्टाकपालन्निर्वपेद्यङ्कामो
नोपनमेदग्निमेव काम९ स्वेन भागधेयेनोप धावति स
एवैनङ्कामेन समर्द्धयत्युपैनङ्कामो नमत्यग्नये यविष्ठाय
पुरोडाशमष्टाकपालन्निर्वपेत्स्पर्द्धमानः क्षेत्रे वा सजातेषु
वाऽग्निमेव यविष्ठ९ स्वेन भागधेयेनोपधावति तेनैवेन्द्रियं
वीर्यं भ्रातृव्यस्य (११)

युवते वि पाप्मना भ्रातृव्येण जयतेऽग्नये यविष्ठाय
पुरोडाशमष्टाकपालन्निर्वपेदभिचर्यमाणोऽग्निमेव यविष्ठ९

स्वेन॑ भा॒ग॒धे॒ये॒नो॒प॒धा॒वति॑ स ए॒वास्मा॒द्रक्षा॑सि॒ यव॑यति॒
 नैन॑मभि॒चर॑न्त्स्त्वृ॒णुते॑ऽग्नये॒ आयु॑ष्मते॒ पुरो॒डाश॑म॒ष्टाक॑पाल॒न्निर्व॑पे॒द्य
 का॒मये॑त॒ सर्व॑मायु॒रिया॑मित्य॒ग्निमे॒वायु॑ष्मन्तः॒ स्वेन॑
 भा॒ग॒धे॒ये॒नो॒प॒धा॒वति॑ स ए॒वास्मिन् (१२)

आयु॑र्दधाति॒ सर्व॑मायु॒रेत्य॒ग्नये॑ जा॒तवे॑दसे॒ पुरो॒डाश॑म॒ष्टाक॑पाल॒
 ऽग्निमे॒व जा॒तवे॑दसः॒ स्वेन॑ भा॒ग॒धे॒ये॒नो॒प॒धा॒वति॑ स ए॒वैनं॑
 भूति॑ङ्गमयति॒ भव॑त्ये॒वाग्नये॑ रुक्म॑ते॒ पुरो॒डाश॑म॒ष्टाक॑पाल॒न्निर्व॑पे॒द्रुक्
 ऽग्निमे॒व रुक्म॑न्तः॒ स्वेन॑ भा॒ग॒धे॒ये॒नो॒प॒धा॒वति॑ स
 ए॒वास्मिन्नु॑च॒न्दधा॑ति॒ रोच॑त ए॒वाग्नये॑ तेज॑स्वते॒ पुरो॒डाश॑म् (१३)

अ॒ष्टाक॑पाल॒न्निर्व॑पे॒त्तेज॑स्कामो॒ऽग्निमे॒व तेज॑स्वन्तः॒ स्वेन॑
 भा॒ग॒धे॒ये॒नो॒प॒धा॒वति॑ स ए॒वास्मिन्ते॒जो द॑धाति॒ तेज॑स्यै॒व
 भ॑वत्य॒ग्नये॑ सा॒हन्त्या॑य॒ पुरो॒डाश॑म॒ष्टाक॑पाल॒न्निर्व॑पे॒त्सीक्ष॑माणो॒
 ऽग्निमे॒व सा॑ह॒न्त्यः॒ स्वेन॑ भा॒ग॒धे॒ये॒नो॒प॒धा॒वति॑ तेनै॒व स॑हते॒
 य॑सि॒क्षते॑॥ (१४)

भ्रातृ॒व्यस्या॑स्मिन्तेज॑स्वते॒ पुरो॒डाश॑म॒ष्टात्रि॑शब्च॥ [३]

अ॒ग्नये॑ऽन्न॑वते॒ पुरो॒डाश॑म॒ष्टाक॑पाल॒न्निर्व॑पे॒द्यः का॒मये॑ता॒न्न॑वान्त्स
 स्वेन॑ भा॒ग॒धे॒ये॒नो॒प॒धा॒वति॑ स ए॒वैन॑म॒न्न॑वन्तङ्क॒रोत्य॑न्न॒वाने॒व

भ॒वत्य॒ग्नये॑ऽन्ना॒दाय॑ पुरो॒डाश॑म॒ष्टाक॑पाल॒ त्रि॒र्वपे॑द्यः
 का॒मये॑ता॒न्नादः॑ स्या॒मित्य॒ग्निमे॒वान्ना॒दः॑ स्वेन॑ भा॒ग॒धेये॒नोप॑-
 धा॒वति॒ स ए॒वैन॑म॒न्नाद॑ङ्क॒रोत्य॒न्नादः॑ (१५)

ए॒व भ॒वत्य॒ग्नये॑ऽन्न॒पतये॑ पुरो॒डाश॑म॒ष्टाक॑पाल॒ त्रि॒र्वपे॑द्यः
 का॒मये॑ता॒न्नप॑तिः स्या॒मित्य॒ग्निमे॒वान्न॑पतिः॑ स्वेन॑ भा॒ग॒धेये॒नोप॑-
 धा॒वति॒ स ए॒वैन॑म॒न्नप॑तिङ्क॒रोत्य॒न्नप॑तिरे॒व भ॒वत्य॒ग्नये॑
 प॒व॒मा॒नाय॑ पुरो॒डाश॑म॒ष्टाक॑पाल॒ त्रि॒र्वपे॑द॒ग्नये॑ पा॒व॒काया॒ग्नये॑
 शु॒च॒ये ज्यो॒गा॒मया॑वी॒ यद॒ग्नये॑ प॒व॒मा॒नाय॑ नि॒र्वप॑ति
 प्रा॒णमे॒वास्मि॒न्तेन॑ दधाति॒ यद॒ग्नये॑ (१६)

पा॒व॒काय॑ वा॒चमे॒वास्मि॒न्तेन॑ दधाति॒ यद॒ग्नये॑ शु॒च॒य
 आ॒यु॒रे॒वास्मि॒न्तेन॑ दधात्यु॒त यदी॒तासु॑र्भवति॒ जीव॑त्ये॒वैतामे॒व
 नि॒र्वपे॑च्चक्षु॑ष्कामो॒ यद॒ग्नये॑ प॒व॒मा॒नाय॑ नि॒र्वप॑ति प्रा॒णमे॒वास्मि॒न्तेन॑
 दधाति॒ यद॒ग्नये॑ पा॒व॒काय॑ वा॒चमे॒वास्मि॒न्तेन॑ दधाति॒ यद॒ग्नये॑
 शु॒च॒ये चक्षु॑रे॒वास्मि॒न्तेन॑ दधाति (१७)

उ॒त यद्य॒न्धो भ॑वति॒ प्रै॒व प॑श्यत्य॒ग्नये॑ पु॒त्रव॑ते
 पुरो॒डाश॑म॒ष्टाक॑पाल॒ त्रि॒र्वपे॑दिन्द्रा॒य पु॒त्रिणे॑ पुरो॒डाश॑मेका॒दश॑कपा
 प्र॒जाका॑मो॒ऽग्निरे॒वास्मै॑ प्र॒जां प्र॑ज॒नय॑ति वृ॒द्धामि॒न्द्रः

प्रयच्छत्यग्रये रसंवतेऽजक्षीरे चरुं निर्वपेद्यः कामयेत
 रसवान्थस्यामित्यग्निमेव रसवन्तः३ स्वेन भागधेयेनोपधावति
 स एवैनः३ रसवन्तङ्करोति (१८)

रसवानेव भवत्यजक्षीरे भवत्याग्नेयी वा एषा यदजा
 साक्षादेव रसमवरुन्धेऽग्रये वसुमते पुरोडाशमष्टाकपालन्निर्वपेद्यः
 कामयेत वसुमान्थस्यामित्यग्निमेव वसुमन्तः३ स्वेन
 भागधेयेनोप धावति स एवैनं वसुमन्तङ्करोति वसुमानेव
 भवत्यग्रये वाजसूते पुरोडाशमष्टाकपालन्निर्वपेत्सङ्ग्रामे सं
 यत्ते वाजम् (१९)

वा एष सिंसीर्षति यः सङ्ग्रामजिगीषत्यग्निः
 खलु वै देवानां॑ वाजसूदग्निमेव वाजसूतः३ स्वेन
 भागधेयेनोपधावति धावति वाजः३ हन्ति वृत्रञ्जयति
 तः३ सङ्ग्राममथो अग्निरिव न प्रतिधृषे भवत्यग्रयेऽग्निवते
 पुरोडाशमष्टाकपालन्निर्वपेद्यस्याग्रावग्निमभ्युद्धरेयुर्निर्दिष्टभागो
 वा एतयोरन्योऽनिर्दिष्टभागोऽन्यस्तौ सम्भवन्तौ यजमानम् (२०)

अभिसम्भवतः स ईश्वर आर्तिमार्तोर्यदग्रयेऽग्निवते
 निर्वपति भागधेयेनैवैनौ शमयति नार्तिमार्छति यजमानो-

ऽग्नये॒ ज्योति॑ष्मते॒ पुरो॑डाशं॒ म॒ष्टाकं॑ पाल॒ त्रिर्व॑पेद्यस्या॒ग्निरुद्ध॑तो-
 ऽहु॑ते॒ ऽग्नि॑होत्र उ॒द्वाये॒दपर॑ आ॒दीप्या॑नूद्धृत्य॒ इत्या॑हुस्तत्तथा॒ न
 का॒र्यं यद्वा॑ग॒धेयं॑ म॒भि पूर्वं॑ उद्ध्रियते॒ किम॑परो॒ऽभ्युत् (२१)

ह्रिये॒तेति॒ तान्ये॒वाव॑क्षाणा॑नि सन्नि॒धाय॑ मन्थे॒दितः॑
 प्रथ॑मञ्ज॒ज्ञे अ॒ग्निः स्वा॒द्योने॑रधि॒ जात॑वे॒दाः। स गा॑यत्रिया
 त्रि॒ष्टुभा॒ जग॑त्या दे॒वेभ्यो॑ ह॒व्यं व॑हतु प्रजा॒नन्नि॑ति
 छन्दो॑भिरे॒वैन॑ꣳ स्वा॒द्योनेः॑ प्रज॑नयत्येष वाव सो-
 ऽग्निरि॒त्याहु॑ज्योति॑स्त्वा अ॒स्य परा॑पति॒तमि॑ति॒ यद॒ग्नये॒
 ज्योति॑ष्मते निर्व॒पति॒ यदे॒वास्य॒ ज्योतिः॑ परा॑पति॒तन्तदे॒वावरु॑न्धे।

करोत्यन्नादो दधाति यदग्नये शुचये चक्षुरेवास्मिन्तेन दधाति करोति वाजं यजमानमुदेवास्य

षट्॥ [४]

वैश्वान॑रन्द्वाद॒शक॑पाल॒ त्रिर्व॑पेद्वा॒रुणं॑ च॒रुन्द॑धि॒क्राव्णे॑
 च॒रुम॑भि॒शस्य॑मानो॒ यद्वै॑श्वान॒रो द्वाद॑शकपालो॒ भव॑ति
 संव॑त्स॒रो वा अ॒ग्निर्वै॑श्वान॒रः सं व॑त्स॒रेणै॒वैन॑ꣳ स्वद॑यत्यपं
 पापं॑ वर्णꣳ ह॒ते वा॒रुणे॑नै॒वैन॑ वरुणपा॒शान्मु॑ञ्चति
 दधि॒क्राव्णा पु॑नाति॒ हिर॑ण्य॒न्दक्षि॑णा प॒वित्रं॑ वै हिर॑ण्यं

पुनात्येवैनमाद्यमस्यान्नं भवत्येतामेव निर्वपेत्प्रजाकामः
संवत्सरः (२३)

वा एतस्याशान्तो योनिं प्रजायै पशूनान्निर्दहति योऽलं
प्रजायै सन्प्रजां न विन्दते यद्वैश्वानरो द्वादशकपालो भवति
संवत्सरो वा अग्निर्वैश्वानरः सं वत्सरमेव भागधेयेन शमयति
सोऽस्मै शान्तः स्वाद्योनेः प्रजां प्रजनयति वारुणेनैवैनं
वरुणपाशान्मुञ्चति दधिक्राव्णां पुनाति हिरण्यन्दक्षिणा
पवित्रं वै हिरण्यं पुनात्येवैनम् (२४)

विन्दते प्रजां वैश्वानरन्द्वादशकपालं निर्वपेत्पुत्रे जाते
यदष्टाकपालो भवति गायत्रियैवैनं ब्रह्मवर्चसेन पुनाति
यन्नवकपालस्त्रिवृतैवास्मिन्तेजो दधाति यद्वशकपालो
विराजैवास्मिन्नत्राद्यन्दधाति यदेकादशकपालस्त्रिष्टुभैवा-
स्मिन्निन्द्रियं दधाति यद्द्वादशकपालो जगत्यैवास्मिन्पशून्दधाति
यस्मिञ्जात एतामिष्टिन्निर्वपति पूतः (२५)

एव तेजस्व्यन्नाद इन्द्रियावी पशुमान्भवत्यव वा
एष सुवर्गाल्लोकाच्छिद्यते यो दर्शपूर्णमासयाजी
सन्नमावास्यां वा पौर्णमासीं वाऽतिपादयति सुवर्गाय

हि लो॒काय॑ द॒र्शपूर्ण॑मा॒सावि॒ज्येते॑ वै॒श्वान॒रन्द्वा॑द॒श-
क॒पाल॒न्निर्व॑पेदमावा॒स्याः॑ वा पौ॒र्णमा॒सीं वा॑ऽति॒पाद्य॑
सं॒वत्स॒रो वा अ॒ग्निर्वै॑श्वान॒रः सं॑ वत्स॒रमे॒व प्री॑णा॒त्यथो॑
सं॒वत्स॒रमे॒वास्मा॑ उ॒प॑दधाति सु॒वर्ग॑स्य॒ लोक॑स्य॒ सम॑ष्ट्यै (२६)

अथो॑ दे॒वता॑ ए॒वान्वा॒रभ्य॑ सु॒वर्ग॑ल्लो॒कमे॑ति वी॒रहा॑ वा
ए॒ष दे॒वानां॑ यो॑ऽग्निमु॒द्वास॑यते न वा ए॒तस्य॑ ब्राह्म॒णा ऋ॑ता॒यवः॑
पु॒राऽन्न॑मक्षन्नाग्ने॒यम॒ष्टाक॑पाल॒न्निर्व॑पेद्वैश्वान॒रन्द्वा॑द॒शक॑पालम॒ग्निमु॑
यद॒ष्टाक॑पालो भव॑त्य॒ष्टाक्ष॑रा गा॒यत्री॑ गा॒यत्रो॑ऽग्नि॒र्यावा॑ने॒वाग्नि॑स्तर
आ॒ति॒थ्यङ्क॑रोत्यथो॒ यथा॑ ज॒नं य॑ते॒ऽव॒सङ्क॑रोति॒ तादृ॑क् (२७)

ए॒व तद्वा॑द॒शक॑पालो वै॒श्वान॒रो भ॑वति॒ द्वा॑द॒श मा॒साः
सं॒वत्स॒रः सं॑ वत्स॒रः ख॒लु वा अ॒ग्नेर्यो॑निः स्वामे॒वैनं॑
यो॒निङ्ग॑मयत्याद्यम॒स्यान्नं॑ भवति वै॒श्वान॒रन्द्वा॑द॒शक॑पाल॒न्निर्व॑पेन्मा
स॒प्तक॑पाल॒ङ्गाम॑काम आ॒हव॒नीये॑ वै॒श्वान॒रम॑धि॒श्रय॑ति
गा॒र्हप॑त्ये मा॒रुतं॑ पा॒पव॑स्य॒सस्य॑ वि॒धृत्यै॑ द्वा॒दश॑कपालो
वै॒श्वान॒रो भ॑वति॒ द्वा॑द॒श मा॒साः सं॒वत्स॒रः सं॑ वत्स॒रेणै॒वास्मै॑
स॒जा॒ताऽश्वा॑वयति मा॒रुतो॑ भ॑वति (२८)

म॒रुतो॑ वै दे॒वानां॑ वि॒शो दे॒ववि॑शे॒नैवा॑स्मै म॒नुष्य॑वि॒शम॑वरु॒न्धे

स॒प्त॒क॒पा॒लो भ॒वति॑ स॒प्त॒ग॒णा॒ वै म॒रु॒तो ग॒ण॒श ए॒वास्मै॑
 स॒जा॒ता॒न॒व॒रु॒न्धेऽनु॒च्यमा॑न् आसा॑दयति॒ विश॑मे॒वास्मा॑
 अनु॑व॒र्त्मान॑ङ्करोति॥ (२९)

प्रजाकामः संवत्सरः पुनात्येवैनं पूतः समष्टौ तादृङ्गारुतो भवत्येकान्नत्रिंशच्च॥—[५]

आ॒दि॒त्यं च॒रुं निर्व॑पे॒त्सङ्गाम॑मु॒प॒प्रया॑स्यन्नि॒यं वा
 अ॒दि॒तिर॒स्यामे॒व पूर्वे॑ प्र॒ति॒ति॒ष्ठन्ति॑ वै॒श्वान॒र॒न्द्वाद॑शक॒पाल॒न्निर्व॑पे॒त्
 सं व॒त्स॒रो वा अ॒ग्निर्वै॑श्वान॒रः सं व॒त्स॒रः खलु॑ वै
 दे॒वाना॑मा॒यत॑नमे॒तस्मा॑द्वा आ॒यत॑नाद्दे॒वा अ॒सुरा॑न॒जय॑न्
 यद्वै॑श्वान॒र॒न्द्वाद॑शक॒पाल॒न्निर्व॑प॒ति दे॒वाना॑मे॒वाय॑त॒ने यत॑ते
 जय॑ति॒ त॑ सङ्गाममे॒तस्मि॒न्वा ए॒तौ मृ॑जाते (३०)

यो वि॒द्विषा॑णयो॒रन्न॑म॒त्ति वै॒श्वान॒र॒न्द्वाद॑शक॒पाल॒न्निर्व॑पे॒द्विद्विषा॑
 सं व॒त्स॒रो वा अ॒ग्निर्वै॑श्वान॒रः सं व॒त्स॒रस्व॑दि॒तमे॒वात्ति॑
 नास्मि॑न्मृजाते संव॒त्सरा॑य॒ वा ए॒तौ सम॑मा॒ते यौ
 संम॑मा॒ते तयो॑र्यः पूर्॒वोऽभि॑द्रुह्य॒ति तं वरु॑णो गृह्णाति
 वै॒श्वान॒र॒न्द्वाद॑शक॒पाल॒न्निर्व॑पे॒त्सम॑मा॒नयोः पूर्॒वोऽभि॑द्रुह्य
 संव॒त्सरो॑ वा अ॒ग्निर्वै॑श्वान॒रः सं व॒त्स॒रमे॒वात्वा

निर्वरुणम् (३१)

प॒रस्ता॑दभि॒द्रुह्य॑ति नैनं वरु॑णो गृ॒ह्णा॒त्या॒व्यं वा ए॒ष
प्रति॑गृ॒ह्णाति॒ योऽविं॑ प्रति॑गृ॒ह्णाति॒ वैश्वान॑र॒न्द्वाद॑शकपाल॒न्निर्व॑पे॒दविं॑
प्रति॑गृ॒ह्यं संव॑त्स॒रो वा अ॒ग्निर्वै॑श्वान॒रः सं व॑त्स॒रस्व॑दितामे॒व
प्रति॑गृ॒ह्णाति॒ ना॒व्यं प्रति॑गृ॒ह्णा॒त्या॒त्मनो॑ वा ए॒ष मा॒त्रा॑मा॒प्नोति॒ य
उ॒भया॑द॒त्प्रति॑गृ॒ह्णा॒त्यश्वं॑ वा पु॒रुषं॑ वा वैश्वान॑र॒न्द्वाद॑शकपाल॒न्निर्व॑पे

प्रति॑गृ॒ह्यं संव॑त्स॒रो वा अ॒ग्निर्वै॑श्वान॒रः सं व॑त्स॒रस्व॑दितमे॒व
प्रति॑गृ॒ह्णाति॒ ना॒त्मनो॑ मा॒त्रा॑मा॒प्नोति॒ वैश्वान॑र॒न्द्वाद॑शकपाल॒न्निर्व॑पे
व॒त्स॒रो वा अ॒ग्निर्वै॑श्वान॒रो य॒दा खलु॑ वै सं व॑त्स॒रञ्ज॒नता॑या॒श्चर॑त्य
स ध॑ना॒र्घो भ॑वति॒ यद्वै॑श्वान॒र॒न्द्वाद॑शकपाल॒न्निर्व॑पति
संव॑त्स॒रसा॑तामे॒व स॒निम॑भि॒ प्रच्य॑वते॒ दान॑कामा अस्मै प्र॒जा
भ॑वन्ति॒ यो वै सं व॑त्स॒रम् (३३)

प्र॒युज्य॒ न वि॑मु॒ञ्चत्य॑प्रति॒ष्ठानो॑ वै स भ॑वत्ये॒तमे॒व
वै॑श्वान॒रं पुन॑रा॒गत्य॒ निर्व॑पे॒द्यमे॒व प्र॑यु॒ङ्क्ते तं भा॑ग॒धेये॑न
वि॑मु॒ञ्चति॒ प्रति॑ष्ठित्यै॒ यया॒ रज्ज्वो॑त्त॒माङ्गामा॑जेत्तां भ्रातृ॑व्याय॒
प्रहि॑णुया॒न्निर्ऋ॑तिमे॒वास्मै॒ प्रहि॑णोति॥ (३४)

-[६]निर्वरुणं वपेदुभयादद्यो वै सं वथ्सरः षट्त्रिंशच्च।]

ऐन्द्रं चरुं निर्वपेत्पशुकाम ऐन्द्रा वै पशव इन्द्रमेव
स्वेनं भागधेयेनोपधावति स एवास्मै पशून्प्रयच्छति
पशुमानेव भवति चरुर्भवति स्वादेवास्मै योनेः
पशून्प्रजनयतीन्द्रायेन्द्रियावन्ते पुरोडाशमेकादशकपालन्निर्वपेत्पशून्
इन्द्रियं वै पशव इन्द्रमेवेन्द्रियावन्तः३ स्वेनं भागधेयेनोप
धावति सः (३५)

एवास्मा इन्द्रियं पशून्प्रयच्छति पशुमानेव भवतीन्द्राय
घर्मवन्ते पुरोडाशमेकादशकपालन्निर्वपेद्ब्रह्मवर्चसकामो
ब्रह्मवर्चसं वै घर्म इन्द्रमेव घर्मवन्तः३ स्वेनं भागधेयेनोप-
धावति स एवास्मिन्ब्रह्मवर्चसन्दधाति ब्रह्मवर्चस्यैव
भवतीन्द्रायार्कवन्ते पुरोडाशमेकादशकपालन्निर्वपेदन्नकामो-
ऽर्को वै देवानामन्नमिन्द्रमेवार्कवन्तः३ स्वेनं भागधेयेन (३६)

उपधावति स एवास्मा अन्नं प्रयच्छत्यन्नाद एव भवतीन्द्राय
घर्मवन्ते पुरोडाशमेकादशकपालन्निर्वपेदिन्द्रायेन्द्रियावन्त
इन्द्रायार्कवन्ते भूतिकामो यदिन्द्राय घर्मवन्ते निर्वपति शिर
एवास्य तेन करोति यदिन्द्रायेन्द्रियावन्त आत्मानमेवास्य

तेन करोति यदिन्द्रायार्कवते भूत एवान्नाद्ये प्रतितिष्ठति
भवत्येवेन्द्राय (३७)

अ॒होमुचै॑ पुरोडाशमेकादशकपालन्निर्वपेद्यः पाप्मना
गृहीतः स्यात्पाप्मा वा अ॒ह इन्द्रमेवा॒होमुच॑
स्वेन॑ भागधेयेनोपधावति स एवैनं पाप्मनोऽ॒हसो
मुञ्चतीन्द्राय वैमृधाय॑ पुरोडाशमेकादशकपालन्निर्वपेद्यं
मृधोऽभि प्रवेपेरन्नाष्ट्राणि वाऽभिसमियुरिन्द्रमेव वैमृध॑
स्वेन॑ भागधेयेनोपधावति स एवास्मान्मृधः (३८)

अपहन्तीन्द्राय त्रात्रे पुरोडाशमेकादशकपालन्निर्वपेद्वद्धो
वा परियत्तो वेन्द्रमेव त्रातार॑ स्वेन॑ भागधेयेनोपधावति स
एवैनत्रायत इन्द्रायार्कश्वमेधवते पुरोडाशमेकादशकपालन्निर्वपेद्यं
महायज्ञो नोपनमेदेते वै महायज्ञस्यान्त्ये तनू यदर्काश्वमेधाविन्द्र
स्वेन॑ भागधेयेनोपधावति स एवास्मा॑ अन्ततो
महायज्ञश्चावयत्युपैनं महायज्ञो नमति॥ (३९)

इन्द्रियावन्त॑ स्वेन॑ भागधेयेनोपधावति सोऽर्कवन्त॑ स्वेन॑ भागधेयेनैवेन्द्रायास्मान्मृधोऽस्मै
सप्त च।७।॥

इन्द्रायान्वृजवे पुरोडाशमेकादशकपालन्निर्वपेद्भामकाम
 इन्द्रमेवान्वृजुः स्वेन भागधेयेनोप धावति स एवास्मै
 सजाताननुकान्करोति ग्राम्यैव भवतीन्द्राण्यै चरुं निर्वपेद्यस्य
 सेनाऽसंशितेव स्यादिन्द्राणी वै सेनायै देवतेन्द्राणीमेव
 स्वेन भागधेयेनोपधावति सैवास्य सेना संश्रयति
 बल्वजानपि (४०)

इद्धे सन्नह्येद्वौर्यत्राधिष्कन्ता न्यमेहत्ततो बल्वजा
 उदतिष्ठन्गवामेवैनं न्यायमपिनीय गा वैदयतीन्द्राय मन्युमते
 मनस्वते पुरोडाशमेकादशकपालन्निर्वपेत्सङ्ग्रामे सं यत्त
 इन्द्रियेण वै मन्युना मनसा सङ्ग्रामञ्जयतीन्द्रमेव मन्युमन्तं
 मनस्वन्तुः स्वेन भागधेयेनोप धावति स एवास्मिन्निन्द्रियं
 मन्युं मनो दधाति जयति तम् (४१)

सङ्ग्राममेतामेव निर्वपेद्यो हृतमनाः स्वयं पाप इव
 स्यादेतानि हि वा एतस्मादपक्रान्तान्यथैष हृतमनाः स्वयं
 पाप इन्द्रमेव मन्युमन्तं मनस्वन्तुः स्वेन भागधेयेनोपधावति
 स एवास्मिन्निन्द्रियं मन्युं मनो दधाति न हृतमनाः स्वयं
 पापो भवतीन्द्राय दात्रे पुरोडाशमेकादशकपालन्निर्वपेद्यः

कामयेत् दानकामा मे प्रजाः स्युः (४२)

इतीन्द्रमेव दातारुः स्वेन भागधेयेनोपधावति स एवास्मै दानकामाः प्रजाः करोति दानकामा अस्मै प्रजा भवन्तीन्द्राय प्रदात्रे पुरोडाशमेकादशकपालन्निर्वपेद्यस्मै प्रत्तमिव सन्न प्रदीयेतेन्द्रमेव प्रदातारुः स्वेन भागधेयेनोपधावति स एवास्मै प्रदापयतीन्द्राय सुत्राम्णे पुरोडाशमेकादशकपालन्निर्वपेदपरुद्धो वा (४३)

अपरुद्धमानो वेन्द्रमेव सुत्रामाणः स्वेन भागधेयेनोपधावति स एवैनत्रायतेऽनपरुद्धो भवतीन्द्रो वै सदृङ् देवताभिरासीत्स न व्यावृतमगच्छत्स प्रजापतिमुपाधावत्तस्मा एतमैन्द्रमेकादशकपालन्निर्वपत्तेनैवास्मिन्निन्द्रियमदधाच्छक्करी याज्यानुवाक्ये अकरोद्वज्रो वै शक्करी स एनं वज्रो भूत्या ऐन्ध (४४)

सोऽभवत्सोऽबिभेद्भूतः प्र मां धक्ष्यतीति स प्रजापतिं पुनरुपाधावत्स प्रजापतिः शक्करीया अधि रेवतीन्निर्ममीत् शान्त्या अप्रदाहाय योऽलङ् श्रियै सन्त्सदृङ्ख्समानैः स्यात्तस्मा एतमैन्द्रमेकादशकपालन्निर्वपेदिन्द्रमेव स्वेन

भाग॒धेये॒नोप॑धावति॒ स ए॒वास्मि॑न्निन्द्रि॒यन्द॑धाति रे॒वतीं॑
पुरो॑नुवा॒क्या भ॑वति॒ शान्त्या॒ अप्र॑दाहाय॒ शक्न॑री या॒ज्या वज्रो॑
वै शक्न॑री॒ स ए॒नं वज्रो॑ भू॒त्या इ॒न्धे भ॑वत्ये॒व॥ (४५)

अपि॒ तश्च॑ स्युर्वे॒न्ध भ॑वति॒ चतु॑र्दश॒ च॥ [८]

आ॒ग्नावै॒ष्णव॑मेका॒दक॑पाल॒न्निर्व॑पेदभि॒चर॒न्त्सर॑स्व॒त्याज्य॑भागा
स्याद्वा॒र्हस्प॒त्यश्च॒रुर्य॑दा॒ग्नावै॒ष्णव॑ एका॒दश॑कपालो
भ॑वत्य॒ग्निः सर्वा॑ दे॒वता॒ विष्णु॑र्य॒ज्ञो दे॒वता॑भिश्चै॒वैनं॑ य॒ज्ञेन॑
चा॒भिच॑रति॒ सर॑स्व॒त्याज्य॑भागा भ॑वति॒ वाग्वै॑ सर॑स्वती
वा॒चैवैन॑म॒भिच॑रति॒ बार्ह॑स्प॒त्यश्च॒रुर्भ॑वति॒ ब्रह्म॒ वै दे॒वानां॑
बृ॒हस्प॑तिर्ब्रह्म॒णैवैन॑म॒भिच॑रति (४६)

प्रति॒ वै प॒रस्ता॑दभि॒चर॑न्तम॒भिच॑रन्ति॒ द्वेद्वे॑ पुरो॑नुवा॒क्ये
कुर्या॑दति॒प्रयु॑क्त्या ए॒तयै॑व य॒जेता॑भिच॒र्यमा॑णो दे॒वता॑भिरे॒व
दे॒वताः॑ प्रति॒चर॑ति॒ य॒ज्ञेन॑ य॒ज्ञं वा॒चा वाचं॑ ब्रह्म॒णा
ब्रह्म॒ स दे॒वता॑श्चै॒व य॒ज्ञं च॑ म॒द्ध्यतो॑ व्य॒वस॑र्पति॒
तस्य॒ न कु॑तश्च॒नोपा॑व्या॒धो भ॑वति॒ नैन॑म॒भिच॑रन्स्तृणु॑त
आ॒ग्नावै॒ष्णव॑मेका॒दश॑कपाल॒न्निर्व॑पेद्यं य॒ज्ञो न॑ (४७)

उ॒प॒न॒मे॒द॒ग्निः॑ सर्वा॑ दे॒वता॒ विष्णु॑र्य॒ज्ञोऽग्नि॑श्चै॒व विष्णुं॑ च॒

स्वेन॑ भा॒ग॒धे॒ये॒नोप॑धावति॒ तावे॒वास्मै॑ य॒ज्ञं प्र॑यच्छत॒ उपै॑नं
 य॒ज्ञो न॑मत्या॒ग्नावैष्ण॑वं घृ॒ते च॒रुं निर्व॑पेच्चक्षु॑ष्कामोऽग्ने॑र्वै चक्षु॑षा
 मनु॑ष्या॒ वि प॑श्यन्ति य॒ज्ञस्य॑ दे॒वा अ॒ग्निश्चै॒व विष्णुं॑ च॒ स्वेन॑
 भा॒ग॒धे॒ये॒नोप॑धावति॒ तावे॒व (४८)

अ॒स्मि॒श्चक्षु॑र्धत्त॒श्चक्षु॑ष्माने॒व भ॑वति धे॒न्वै वा ए॒तद्रेतो॑
 यदा॑ज्यम॒न॒डुह॑स्तण्डुला मि॒थुना॑दे॒वास्मै॑ चक्षुः प्र॒ज॒नय॑ति
 घृ॒ते भ॑वति॒ तेजो॑ वै घृ॒तन्तेज॑श्चक्षु॒स्तेज॑सै॒वास्मै॑
 तेज॑श्चक्षु॒रवरु॑न्ध इन्द्रि॒यं वै वी॒र्यं॑ वृ॒द्धे भ्रातृ॑व्यो यज॑मानो-
 ऽय॑जमानस्याद्ध॒रक॑ल्पां॒ प्रति॒ निर्व॑पेद्भ्रातृ॑व्ये यज॑माने
 नास्यै॑न्द्रि॒यम् (४९)

वी॒र्यं॑ वृ॒द्धे पु॒रा वा॒चः प्र॑व॒दितो॑र्निर्व॑पेद्वाव॒त्येव॑
 वा॒क्ताम॑प्रो॒दितां॑ भ्रातृ॑व्यस्य वृ॒द्धे ता॑म॒स्य वा॒चं प्र॑व॒दन्ती॑म॒न्या
 वा॒चोऽनु॑ प्र॒व॒दन्ति॒ ता इन्द्रि॒यं वी॒र्यं॑ यज॑माने दधत्या॒ग्नावैष्ण॑वमष्ट
 स॒वन॑स्या॒काले॑ स॒रस्व॑त्याज्यभा॒गा स्या॑द्वा॒र्हस्प॑त्यश्चरु॒र्यद॑ष्टाकं
 भ॒व॒त्यष्टा॑क्षरा गाय॒त्री गा॑य॒त्रं प्रा॑तः स॒वनं॑ प्रा॑तः स॒वनमे॒व
 तेना॑प्रोति (५०)

आ॒ग्नावै॒ष्ण॒वमे॒काद॑श॒कपाल॑न्निर्व॒पेन्मा॑द्ध्यन्दि॒नस्य॑
 स॒र्व॒नस्या॑क॒ाले स॒र॒स्व॒त्याज्य॑भागा॒ स्याद्वा॑र्ह॒स्पत्य॑श्च॒रुर्य॑दे॒काद॑श
 भ॒व॒त्येका॑द॒शाक्ष॑रा त्रि॒ष्टुत्रै॑ष्टु॒भं मा॑द्ध्यन्दि॒नः स॒र्व॒नं
 मा॑द्ध्यन्दि॒नमे॒व स॒र्व॒नन्ते॑ना॒प्रोत्या॑ग्नावै॒ष्ण॒वन्द्वाद॑श॒कपाल॑न्निर्व॒पेत्त॑
 स॒र॒स्व॒त्याज्य॑भागा॒ स्याद्वा॑र्ह॒स्पत्य॑श्च॒रुर्य॑द्वाद॒शक॑पालो
 भ॒व॒न्ति द्वा॑द॒शाक्ष॑रा जग॑ती जाग॑तन्तृ॒तीयस॑र्व॒नन्तृ॒तीयस॑र्व॒नमे॒व
 तेना॑प्रोति दे॒वता॑भिरे॒व दे॒वताः॑ (५१)

प्र॒तिच॑र॒न्ति य॒ज्ञेन॑ य॒ज्ञं वा॒चा वाचं॑ ब्र॒ह्मणा॑ ब्र॒ह्म
 क॒पालै॑रे॒व छ॒न्दाः॑ स्या॒प्रोति॑ पुरो॒डाशैः॑ स॒र्व॒नानि॑
 मै॒त्राव॑रु॒णमे॒क॒कपाल॑न्निर्व॒पेद्व॑शायै॒ क॒ाले यै॒वासौ॑ भ्रातृ॒व्यस्य॑
 व॒शाऽनू॑ब॒न्ध्या सो॑ ए॒वैषै॑तस्यै॒क॒कपालो॑ भवति॒ नहि॑ क॒पालैः॑
 प॒शुम॑र्ह॒त्याप्तु॑म्॥ (५२)

ब्रह्मणैवेनमभिचरन्ति यज्ञो न तावेवास्थैन्द्रियमाप्रोति देवताः सुप्तत्रिंशच्च।१॥ — [९]

अ॒सावा॑दि॒त्यो न व्य॑रोच॒त् तस्मै॑ दे॒वाः प्राय॑श्चित्ति॒मैच्छ॑न्तस्मा॒
 ए॒तः॑ सो॒मारौ॑द्रं च॒रुं नि॑र॒व॒प॒न्तेनै॒वास्मि॑न्नु॒चम॑दधुर्यो
 ब्र॒ह्मव॑र्च॒सका॑मः स्यात्तस्मा॑ ए॒तः॑ सो॒मारौ॑द्रं च॒रुं
 नि॑र्व॒पेत्सोमं॑ चै॒व रु॒द्रं च॒ स्वेन॑ भा॒गधे॑ये॒नोप॑धावति॒

तावेवास्मिन्ब्रह्मवर्चसन्धत्तो ब्रह्मवर्चस्यैव भवति तिष्यापूर्णमासे
निर्वपेद्रुद्रः (५३)

वै तिष्यः सोमः पूर्णमासः साक्षादेव ब्रह्मवर्चसमवरुन्धे
परिश्रिते याजयति ब्रह्मवर्चसस्य परिगृहीत्यै श्वेतायै
श्वेतवत्सायै दुग्धं मथितमाज्यं भवत्याज्यं प्रोक्षणमाज्येन
मार्जयन्ते यावदेव ब्रह्मवर्चसं तत्सर्वङ्करोत्यति ब्रह्मवर्चसङ्क्रियत
इत्याहुरीश्वरो दुश्श्र्मा भवितोरिति मानवी ऋचौ धार्ये
कुर्याद्यद्वै किं च मनुरवदत्तद्वैषजम् (५४)

भेषजमेवास्मै करोति यदि बिभीयाद्दुश्श्र्मा भविष्यामीति
सोमापौष्णं चरुं निर्वपेत्सौम्यो वै देवतया पुरुषः पौष्णाः
पशवः स्वयैवास्मै देवतया पशुभिस्त्वचङ्करोति न दुश्श्र्मा
भवति सोमारौद्रं चरुं निर्वपेत्प्रजाकामः सोमो वै रेतोधा
अग्निः प्रजानां प्रजनयिता सोमं एवास्मै रेतो दधात्यग्निः
प्रजां प्रजनयति विन्दते (५५)

प्रजाः सोमारौद्रं चरुं निर्वपेदभिचरन्सौम्यो वै देवतया
पुरुष एष रुद्रो यदग्निः स्वाया एवैनं देवतायै निष्क्रीय

रुद्रायापि दधाति ताजगार्तिमार्च्छति सोमारौद्रं चरुं
निर्वपेज्ज्योगामयावी सोमं वा एतस्य रसो गच्छत्यग्निः
शरीरं यस्य ज्योगामयति सोमादेवास्य रसन्निष्क्रीणात्यग्नेः
शरीरमुत यदि (५६)

इतासुर्भवति जीवत्येव सोमारुद्रयोर्वा एतङ्गसितः होता
निष्विन्दति स ईश्वर आर्तिमार्तोरनुद्वान् होत्रा देयो वहिर्वा
अनुद्वान् वहिर्होता वहिनैव वहिमात्मानः स्पृणोति
सोमारौद्रं चरुं निर्वपेद्यः कामयेत स्वऽस्मा आयतने भ्रातृव्यं
जनयेयमिति वेदिं परिगृह्यार्द्धमुद्धन्यादूर्ध्वन्नार्द्धं बर्हिषः
स्तृणीयादूर्ध्वं नार्द्धमिच्छस्यभ्यादृष्ट्यादूर्ध्वं न स्व एवास्मा
आयतने भ्रातृव्यं जनयति॥ (५७)

रुद्रो भेषजं विन्दते यदि स्तृणीयादूर्ध्वन्द्वादश च॥१०॥

ऐन्द्रमेकादशकपालन्निर्वपेन्मारुतः सप्तकपालङ्ग्रामकाम
इन्द्रश्चैव मरुतश्च स्वेन भागधेयेनोप धावति त एवास्मै
सजातान्प्रयच्छन्ति ग्राम्येव भवत्याहवनीयं ऐन्द्रमधिश्रयति
गार्हपत्ये मारुतं पापवस्यसस्य विधृत्यै सप्तकपालो
मारुतो भवति सप्तगणा वै मरुतो गणश एवास्मै

सजा॒तानवरु॑न्धेऽनू॒च्यमा॑न् आसा॑दयति॒ विश॑मे॒व (५८)

अ॒स्मा अनु॑व॒र्त्मानङ्क॑रोत्ये॒तामे॒व निर्व॑पे॒द्यः का॒मये॑त
क्ष॒त्राय॑ च वि॒शे च॑ स॒मद॑न्द॒ध्यामि॒त्यैन्द्र॑स्या॒वद्य॑न्ब्रूया॒दिन्द्रा॑यानु॒
ब्रू॒हीत्या॑श्राव्यं ब्रू॒यान्म॒रुतो॑ य॒जेति॑ मा॒रुत॑स्या॒वद्य॑न्ब्रू॒यान्म॒रुद्ध्यो॑-
ऽनु॑ब्रू॒हीत्या॑श्राव्यं ब्रू॒यादिन्द्र॑ य॒जेति॑ स्व ए॒वैभ्यो॑ भा॒गधे॑ये
स॒मद॑न्दधाति॒ वितृ॑ङ्हाणास्तिष्ठन्त्ये॒तामे॒व (५९)

निर्व॑पे॒द्यः का॒मये॑त क॒ल्पे॑र॒न्नि॒तिं यथा॑दे॒वत॑म॒वदा॑य
यथा॑दे॒वतं॑ य॒जेद्भा॒गधे॑ये॒नैवै॑नान् यथा॑यथङ्क॒ल्पय॑ति॒ कल्प॑न्त
ए॒वैन्द्र॑मेका॒दश॑क॒पाल॑न्निर्व॑पे॒द्वैश्व॑दे॒वन्द्वा॑द॒शक॑पाल॒ङ्गाम॑का॒म
इन्द्र॑श्चै॒व वि॒श्वाश्च॑ दे॒वान्श्स्वे॑न॒ भा॒गधे॑ये॒नोप॑धा॒वति॑ त
ए॒वास्मै॑ सजा॒तान्प्रय॑च्छन्ति॒ ग्राम्ये॑व भ॒वत्यै॑न्द्रस्या॒वदा॑य
वैश्व॑दे॒वस्या॑व॒द्येद॑थै॒न्द्रस्य॑ (६०)

उ॒परि॑ष्ठादिन्द्रि॒येणै॒वास्मा॑ उ॒भय॑तः सजा॒तान्प॑रिगृ॒ह्णात्यु॑पाधा॒य
वा॒सो दक्षि॑णा सजा॒ताना॑मुप॑हि॒त्यै पृ॒श्नि॒यै दु॒ग्धे प्रै॒यङ्ग॑वं च॒रुं
निर्व॑पेन्म॒रुद्ध्यो॑ ग्रा॒मका॑मः पृ॒श्नि॒यै वै प॑य॒सो म॒रुतो॑ जा॒ताः
पृ॒श्नि॒यै प्रि॒यङ्ग॑वो मा॒रुताः॑ खलु॒ वै दे॒वत॑या सजा॒ता म॒रुत॑
ए॒व स्वे॑न॒ भा॒गधे॑ये॒नोप॑धा॒वति॑ त ए॒वास्मै॑ सजा॒तान्प्रय॑च्छन्ति

ग्राम्यैव भवति प्रियवती याज्यानुवाक्ये (६१)

भवतुः प्रियमेवैनं समा नानाङ्करोति द्विपदा पुरोनुवाक्या
भवति द्विपद एवावरुन्धे चतुष्पदा याज्या चतुष्पद एव
पशूनवरुन्धे देवासुराः सं यत्ता आसन्ते देवा मिथो
विप्रिया आसन्ते ३ऽन्योन्यस्मै ज्यैष्ठ्यायातिष्ठमानाश्चतुर्धा
व्यक्रामन्नग्निर्वसुभिः सोमो रुद्रेरिन्द्रो मरुद्विर्वरुण आदित्यैः
स इन्द्रः प्रजापतिमुपाधावत्तम् (६२)

एतया संज्ञान्याऽयाजयेदग्नये वसुमते पुरोडाशमष्टाकपालं
रुद्रवते चरुमिन्द्राय मरुत्वते पुरोडाशमेकादशकपालं
वरुणायाऽऽदित्यवते चरुन्ततो वा इन्द्रं देवा ज्यैष्ठ्यायाभि
समजानत यः समानैर्मिथो विप्रियः स्यात्तमेतया संज्ञान्या
याजयेदग्नये वसुमते पुरोडाशमष्टाकपालं निर्वपेत्सोमाय
रुद्रवते चरुमिन्द्राय मरुत्वते पुरोडाशमेकादशकपालं
वरुणायाऽऽदित्यवते चरुमिन्द्रमेवैनं भूतज्यैष्ठ्याय समाना
अभिसञ्जानते वसिष्ठः समानानां भवति॥ (६३)

विशमेव तिष्ठन्त्येतामेवाथैन्द्रस्य याज्यानुवाक्ये तं वरुणाय चतुर्दश च॥१॥—[११]

हिरण्यगर्भ आपो ह यत्प्रजापते। स वेद पुत्रः पितरं स

मा॒तर॒ꣳ स॒ सून॑र्भुव॒त्स भु॑व॒त्पुन॑र्मघः। स द्यामौ॒र्णोद॑न्तरि॒क्षꣳ
 स सुवः॒ स वि॒श्वा भुवो॑ अभव॒त्स आ॒ऽभवत्। उदु॒त्यश्चि॒त्रम्।
 सप्र॑ल॒वन्नवी॑यसाऽग्रे॑ द्यु॒म्नेन॑ सं यता॑। बृ॒हत्त॑तन्थ भा॒नुना॑।
 नि॒काव्या॑ वे॒धसः॒ शश्व॑तस्कर॒हस्ते॒ दधानः॑ (६४)

नर्या॑ पु॒रूणि॑। अ॒ग्निर्भुव॑द्रयि॒पती॑ रयी॒णाꣳ स॒त्रा च॑क्रा॒णो
 अ॒मृता॑नि॒ विश्वा॑। हि॒र॒ण्यपा॑णिमृ॒तये॑ सवि॒तार॒मुप॑ ह्वये। स
 चेत्ता॑ दे॒वता॑ प॒दम्। वा॒मम॒द्य स॑वि॒तर्वा॒ममु॒ श्वो दि॒वेदि॑वे
 वा॒मम॒स्मभ्य॑ꣳ सा॒वीः। वा॒मस्य॑ हि क्षय॑स्य दे॒व भूरे॑र॒या धि॒या
 वा॒मभा॑जः स्याम। बडि॒त्था प॑र्व॒ताना॑ङ्घ्रि॒द्रं बि॑भर्षि पृथि॒वि।
 प्र या भू॑मि प्रव॒त्वति॑ म॒हा जि॒नोषि॑ (६५)

म॒हिनि॑। स्तोमा॑सस्त्वा वि॒चारि॑णि॒ प्रति॑ष्टोभन्त्य॒क्तुभिः॑। प्र
 या वा॒ज॒न्न हे॑ष॒न्तं पे॒रुम॑स्य॒स्यर्जु॑नि। ऋ॒दूद॑रेण॒ सख्या॑ स॒चेय॑
 यो मा॒ न रि॒ष्येद्ध॑र्यश्च पी॒तः। अ॒यं यः सोमो॑ न्यधा॒य्यस्मे
 तस्मा॒ इन्द्र॑ प्र॒तिर॑मे॒म्यच्छ॑। आपा॑न्तमन्युस्तृ॒पल॑प्रभर्मा॒ धुनिः॑
 शि॒मीवा॑ञ्छरु॒माꣳ ऋ॒जीषी॑। सोमो॑ वि॒श्वान्य॑त॒सा वना॑नि॒
 ना॒र्वागि॑न्द्र॒ प्रति॑माना॑नि दे॒भुः। प्र (६६)

सु॒वानः॒ सोम॑ ऋ॒तयु॑श्चि॒केते॑न्द्रा॒य ब्र॑ह्म ज॒मद॑ग्निर॒र्चन्।

वृषां यन्तासि शवसस्तुरस्यान्तर्यच्छ गृणते धूर्त्रं दृ॑ह।
 सबा॑र्धस्ते मद॑श्च शुष्म॑यं च ब्रह्म॑ नरो॑ ब्रह्म॑कृतः सपर्य॑न्।
 अ॒र्को वा॒ यत्तुरते॒ सोम॑चक्षा॒स्तत्रेदिन्द्रो॑ दधते पृ॒थ्सु तु॒र्याम्।
 वर्ष॑द्वे विष्णवा॒स आ कृ॑णोमि॒ तन्मे॑ जुषस्व शिपिविष्ट
 हव्यम्। (६७)

वर्ध॑न्तु त्वा सुष्टु॑तयो गि॒रो मे यू॒यं पा॑त स्व॒स्तिभिः॒ सदा॑
 नः। प्र॒ तत्ते॑ अ॒द्य शि॑पिविष्ट॒ नामा॑र्यः श॑सामि व॒युना॑नि
 वि॒द्वान्। तं त्वा॑ गृणामि त॒व स॒मर्त॑वीया॒न्क्षय॑न्तम॒स्य रज॑सः
 परा॒के। कि॒मित्ते॑ विष्णो परि॒चक्ष्य॑ भू॒त्प्रय॑द्व॒वक्षे॑ शि॑पिविष्टो
 अ॒स्मि। मा वर्षो॑ अ॒स्मदप॑गूह ए॒तद्य॑दन्य॒रूपः॑ समि॒थे
 ब॒भूथ॑। (६८)

अ॒ग्ने दा॑ दा॒शुषे॑ र॒यिं वी॒रव॑न्तं परी॑णसम्। शि॒शीहि॑ नः
 स॒नुम॑तः। दा नो॑ अ॒ग्ने श॒तिनो॑ दाः स॒हस्रि॑णो दुरो न वाज॑ः
 श्रु॒त्या अ॒पावृ॑धि। प्राची॒ द्यावा॑पृथि॒वी ब्रह्म॑णा कृधि॒ सुव॑र्ण
 शु॒क्रमु॑षसो विदि॑द्युतुः। अ॒ग्निर्दा॑ द्रवि॑णं वी॒रपे॑शा अ॒ग्निर्ऋषि॑
 यः स॒हस्रा॑ स॒नोति॑। अ॒ग्निर्दिवि॑ ह॒व्यमा॑त॒ताना॒ग्नेर्धामा॑नि
 विभृ॑ता पुरु॒त्रा। मा (६९)

नो म॒र्द्धी॒रा तू भ॑र। घृ॒तं न पू॑तं त॒नूर॑रे॒पाः शुचि॑ हिर॑ण्यम्।
 तत्ते रु॒क्मो न रो॑चत स्वधावः। उ॒भे सु॑श्चन्द्र स॒र्पिषो॒ दर्वी॑
 श्रीणीष आ॒सनि॑। उ॒तो न॒ उत्पु॑पू॒र्या उ॒क्थे॑षु शवसस्पत॒ इष॑ः
 स्तो॒तृभ्य॒ आ भ॑र। वायो॒ शत॑ ह॒रीणां॒ युवस्व॒ पोष्या॑णाम्।
 उ॒त वा॑ ते सह॒स्रिणो॒ रथ॒ आ या॑तु पाज॑सा। प्र याभिः (७०)

यासि॑ दा॒श्वाः स॒मच्छा॑ नि॒युद्धि॑र्वायविष्टये॒ दुरो॑णे। नि
 नो॑ र॒यिः सु॒भोज॑सं युवे॒ह नि वी॑रव॒द्रव्य॑मश्वि॒यं च॒
 राधः॑। रे॒वती॑र्नः सध॒माद् इन्द्रे॑ सन्तु तु॒विवा॑जाः। क्षु॒मन्तो॒
 याभि॑र्मदे॒म। रे॒वाः इ॒द्रेव॑तः स्तो॒ता स्या॑त्त्वाव॑तो म॒घोनः॑।
 प्रेदु॑ हरि॒वः श्रु॑तस्य॥ (७१)

जि॒नोषि॑ दे॒भुः प्र ह॒व्यं ब॒भूथ॒ मा याभि॑श्चत्वारि॒शच्च॑॥ (१२) ————— [१२]

प्रजाप॑ति॒स्ताः सृष्टा॑ अ॒ग्नये॑ पथि॒कृते॑ऽग्नये॒ कामा॑या॒ग्नये॑ऽन्न॒वते॑ वैश्वान॒रमा॑दित्यं च॒रुमै॑न्द्रं च॒रुमिन्द्रा॑यान्वृ॒जव॑ आ॒ग्रावै॑ष्ण॒वमसौ॑
 सोमा॑रो॒द्रमै॒न्द्रमे॒काद॑शकपाल॑ हिर॑ण्यग॒र्भो द्वाद॑श॥ (१२) प्रजा॑पति॒र॒ग्नये॑ कामा॑याभि॒ सम्भ॑वतो॒ यो वि॑द्वि॒षाण॑याँरि॒द्धौ
 सन्न॑हे॒दाग्रा॑वैष्ण॒वमु॑परि॒ष्टाद्या॑सि॒ दा॒श्वाः स॒मेक॑सप्ततिः॥ (७१) प्रजा॑पतिः प्रेदु॑ हरि॒वः श्रु॑तस्य॥

आ॒दि॒त्येभ्यो॑ दे॒वा वै मृ॒त्योर्दे॒वा वै स॒त्रम॑र्य॒म्यो प्रजा॑प॒तेभ्यस्त्रि॑श॒त्प्रजा॑पति॒र्देवेभ्यो॑ऽन्नाद्य॑न्दे॒वासुरा॑स्तात्र॒जो नो॑ ऋ॒वाँऽसि॑
 यन्न॑व॒मग्नि॑ वै प्रजा॑पति॒र्वरु॑णा॒य या वा॑मिन्द्रा॒वरु॑णा स॒प्र॒ब्र॒ह्मच॑तु॒र्दश॥ 14॥ आ॒दि॒त्येभ्य॑स्त्वष्ट॒रस्मै दान॑कामा ए॒वाव॑रु॒न्धेऽग्नि॑ वै
 स॒प्र॒ब्र॒ह्मव॑थ॒दंश्चा॑शत्॥ 56॥ आ॒दि॒त्येभ्यः॑ सु॒व॑र॒पो जि॑गाय॥

॥तृतीयः प्रश्नः॥

॥तैत्तिरीयसंहितायां द्वितीयकाण्डे तृतीयः प्रश्नः॥

आदित्येभ्यो भुवद्वच्चश्चरुं निर्वपेद्भूतिकाम आदित्या
वा एतम्भूत्यै प्रति नुदन्ते योऽलम्भूत्यै सन्भूतिं न
प्राप्नोत्यादित्यानेव भुवद्वतः स्वेन भागधेयेनोप धावति
त एवैनम्भूतिं गमयन्ति भवत्येवादित्येभ्यो धारयद्वच्चश्चरुं
निर्वपेदपरुद्धो वाऽपरुध्यमानो वाऽऽदित्या वा अपरोद्धारं
आदित्या अवगमयितारं आदित्यानेव धारयद्वतः (१)

स्वेन भागधेयेनोप धावति त एवैनं विशि दाध्रत्यनपरुध्यो
भवत्यदितेऽनु मन्यस्वेत्यपरुध्यमानोऽस्य पदमा ददीतेयं
वा अदितिरियमेवास्मै राज्यमनु मन्यते सत्याशीरित्याह
सत्यामेवाशिषं कुरुत इह मन इत्याह प्रजा एवास्मै
समनसः करोत्युप प्रेतं मरुतः (२)

सुदानव एना विशपतिनाभ्यमुं राजानमित्याह मारुती
वै विड्गुष्ठो विशपतिर्विशैवनं राष्ट्रेण समर्धयति यः
परस्ताद्वाम्यवादी स्यात्तस्य गृहाद्विहीना हरेच्छुक्लाःश्च
कृष्णाःश्च वि चिनुयाद्ये शुक्लाः स्युस्तमादित्यं चरुं

निर्वपेदादित्या वै देवतया विद्विशमेवाव गच्छति (३)

अवंगतास्य विडनवगतः राष्ट्रमित्याहुर्ये कृष्णाः स्युस्तं
वारुणं चरुं निर्वपेद्वारुणं वै राष्ट्रमुभे एव विशं च राष्ट्रं
चाव गच्छति यदि नावगच्छेदिममहमादित्येभ्यो भागं
निर्वपाम्यामुष्मादमुष्यै विशोऽवंगन्तोरिति निर्वपेदादित्या
एवैनम्भागधेयम्प्रेप्सन्तो विशमव (३)

गमयन्ति यदि नावगच्छेदाश्वत्थान्मयूखान्श्वसप्त
मध्यमेषायामुप हन्यादिदमहमादित्यान्बध्नाम्यामुष्मादमुष्यै
विशोऽवंगन्तोरित्यादित्या एवैनम्बद्धवीरा विशमव गमयन्ति
यदि नावगच्छेदेतमेवादित्यं चरुं निर्वपेदिध्मेऽपि मयूखान्श्वसं
नह्येदनपरुध्यमेवाव गच्छत्याश्वत्था भवन्ति मरुतां वा
एतदोजो यदश्वत्थ ओजसैव विशमव गच्छति सप्त भवन्ति
सप्तगणा वै मरुतो गणश एव विशमव गच्छति॥ (५)

धारयद्वतो मरुतो गच्छति विशमवैतदष्टादश च॥ [१]

देवा वै मृत्योरिभिभयुस्ते प्रजापतिमुपाधावन्तेभ्य
एताम्प्राजापत्याः शतकृष्णलां निरवपत्तयैवैष्वमृतमदधाद्यो
मृत्योर्बिभीयात्तस्मा एताम्प्राजापत्याः शतकृष्णलां

निर्वपेत्प्रजापतिमेव स्वेन भागधेयेनोप धावति स
 एवास्मिन्नायुर्दधाति सर्वमायुरेति शतकृष्णला भवति
 शतायुः पुरुषः शतेन्द्रिय आयुष्येवेन्द्रिये (६)

प्रति तिष्ठति घृते भवत्यायुर्वै घृतममृतं ५ हिरण्यमायुश्चैवास्मा
 अमृतं च समीचीं दधाति चत्वारिचत्वारि कृष्णलान्यव
 द्यति चतुरवत्तस्यास्या एकधा ब्रह्मण उप हरत्येकधैव
 यजमान आयुर्दधात्यसावादित्यो न व्यरोचत तस्मै देवाः
 प्रायश्चित्तिमैच्छन्तस्मा एत ५ सौर्यं चरुं निरवपन्तेनैवास्मिन् (७)

रुचमदधुर्यो ब्रह्मवर्चसकामः स्यात्तस्मा एत ५ सौर्यं
 चरुं निर्वपेदमुमेवादित्य ५ स्वेन भागधेयेनोप धावति स
 एवास्मिन्ब्रह्मवर्चसं दधाति ब्रह्मवर्चस्यैव भवत्युभयतो
 रुक्मौ भवत उभयत एवास्मिन्नुचं दधाति प्रयाजेप्रयाजे
 कृष्णलं जुहोति दिग्भ्य एवास्मै ब्रह्मवर्चसमव रुद्ध
 आग्नेयमष्टाकपालं निर्वपेत्सावित्रं द्वादशकपालम्भूम्यै (८)

चरुं यः कामयेत हिरण्यं विन्देय हिरण्यम्मोप
 नमेदिति यदाग्नेयो भवत्याग्नेयं वै हिरण्यं यस्यैव हिरण्यं
 तेनैवैनद्विन्दते सावित्रो भवति सवितृप्रसूत एवैनद्विन्दते

भूम्यै चरुर्भवत्यस्यामेवैनद्विन्दत उपैन् ५ हिरण्यं नमति वि
वा एष इन्द्रियेण वीर्येणर्ध्यते यो हिरण्यं विन्दत एताम् (९)

एव निर्वपेद्विरण्यं वित्त्वा नेन्द्रियेण वीर्येण व्यृध्यत
एतामेव निर्वपेद्यस्य हिरण्यं नश्येद्यदाग्नेयो भवत्याग्नेयं वै
हिरण्यं यस्यैव हिरण्यं तेनैवैनद्विन्दति सावित्रो भवति
सवितृप्रसूत एवैनद्विन्दति भूम्यै चरुर्भवत्यस्यां वा एतन्नश्यति
यन्नश्यत्यस्यामेवैनद्विन्दीन्द्रः (१०)

त्वष्टुः सोममभीषहापिबथ्स विष्वङ्वाच्छ्रुथ्स इन्द्रियेण
सोमपीथेन व्यार्ध्यत स यदूर्ध्वमुदवमीत्ते श्यामाका अभवन्थ्स
प्रजापतिमुपाधावत्तस्मा एत ५ सोमेन्द्र ५ श्यामाकं चरुं
निर्वपत्तेनैवास्मिन्निन्द्रिय ५ सोमपीथमदधाद्वि वा एष
इन्द्रियेण सोमपीथेनर्ध्यते यः सोमं वमिति यः सोमवामी
स्यात्तस्मै (११)

एत ५ सोमेन्द्र ५ श्यामाकं चरुं निर्वपेथ्सोमं चैवेन्द्रं च
स्वेन भागधेयेनोप धावति तावेवास्मिन्निन्द्रिय ५ सोमपीथं
धत्तो नेन्द्रियेण सोमपीथेन व्यृध्यते यथ्सौम्यो भवति
सोमपीथमेवाव रुन्दे यदैन्द्रो भवतीन्द्रियं वै सोमपीथ

इन्द्रियमेव सोमपीथमव रुन्दे श्यामाको भवत्येष वाव स
सोमः (१२)

साक्षादेव सोमपीथमव रुन्देऽग्नये दात्रे पुरोडाशमष्टाकपालं
निर्वपेदिन्द्राय प्रदात्रे पुरोडाशमेकादशकपालम् पशुकामो-
ऽग्निरेवास्मै पशून्प्रजनयति वृद्धानिन्द्रः प्र यच्छति दधि मधु
घृतमापो धाना भवन्त्येतद्वै पशूनां रूपं रूपेणैव पशूनव
रुन्दे पञ्चगृहीतम्भवति पाङ्गा हि पशवो बहुरूपम्भवति
बहुरूपा हि पशवः (१३)

समृद्धौ प्राजापत्यम्भवति प्राजापत्या वै पशवः
प्रजापतिरेवास्मै पशून्प्र जनयत्यात्मा वै पुरुषस्य मधु
यन्मध्वग्नौ जुहोत्यात्मानमेव तद्यजमानोऽग्नौ प्र दधाति
पङ्क्तौ याज्यानुवाक्ये भवतः पाङ्क्तः पुरुषः पाङ्क्ताः पशव
आत्मानमेव मृत्योर्निष्क्रीय पशूनव रुन्दे॥ (१४)

इन्द्रियेऽस्मिन्भूम्यां एतामिन्द्रः स्यात्तस्मै सोमो बहुरूपा हि पशव एकचत्वारिंशच्च॥[२]

देवा वै सत्रमासतर्द्धिपरिमितं यशस्कामास्तेषां सोमं
राजानं यशं आर्च्छथ्स गिरिमुदैत्तमग्निरनूदैत्तावग्नीषोमौ
समभवतान्ताविन्द्रो यज्ञविभ्रष्टोऽनु परैत्तावब्रवीद्याजयतम्मेति

तस्मा॑ ए॒तामिष्टिं॑ निर॑वपतामाग्ने॒यम॒ष्टाक॑पालमै॒न्द्रमेका॑दशकपालं
सौ॒म्यं च॒रुन्तयै॒वास्मिन्तेजः॑ (१५)

इन्द्रि॒यम्ब्र॑ह्मवर्च॒सम॑धत्तां॒ यो य॒ज्ञवि॑भ्रष्टः स्यात्तस्मा॑
ए॒तामिष्टिं॑ निर॑वपेदाग्ने॒यम॒ष्टाक॑पालमै॒न्द्रमेका॑दशकपालं
सौ॒म्यं च॒रुं यदा॑ग्ने॒यो भव॑ति तेज॑ ए॒वास्मिन्तेन॑
दधाति॒ यदै॒न्द्रो भव॑तीन्द्रि॒यमे॒वास्मिन्तेन॑ दधाति॒
यथ्सौ॒म्यो ब्र॑ह्मवर्च॒सं तेना॑ग्ने॒यस्य॑ च सौ॒म्यस्य॑ चै॒न्द्रे
स॒माश्ले॑षये॒त्तेज॑श्चै॒वास्मिन्ब्र॑ह्मवर्च॒सं च॑ स॒मीची॑ (१६)

द॒धात्य॒ग्नीषो॒मीय॑मेका॑दशकपालं निर॑वपेद्यं कामो॒
नोप॑नमे॒दाग्ने॒यो वै ब्रा॑ह्म॒णः स सोम॑मिबति स्वामे॒व दे॒वता॑
स्वेन॑ भा॒गधे॒येनोप॑ धावति॒ सैवैनं॑ कामे॒न स॑म॒र्धय॑त्युपैनं॒
कामो॑ नमत्य॒ग्नीषो॒मीय॑म॒ष्टाक॑पालं निर॑वपेद्ब्रह्मवर्च॒सकामो॑-
ऽग्नीषो॒मावे॒व स्वेन॑ भा॒गधे॒येनोप॑ धावति॒ तावे॒वास्मिन्ब्र॑ह्मवर्च॒सं
ध॑त्तो ब्रह्मवर्च॒स्यैव॑ (१७)

भ॒वति॒ यद॒ष्टाक॑पाल॒स्तेना॑ग्ने॒यो यच्छा॑मा॒कस्तेन॑
सौ॒म्यः समृ॑द्धौ सोमा॒य वा॒जिनै॑ श्यामा॒कं च॒रुं निर॑वपेद्यः
क्लै॒व्याद्वि॒भीया॑द्रेतो॒ हि वा॒ ए॒तस्मा॒द्वाजि॑नम॒पक्राम॑त्यथैष

क्लैव्या॑द्विभाय॒ सोम॑मे॒व वा॒जिन॑ꣳ स्वेन॑ भाग॒धेये॒नोप॑
धावति॒ स ए॒वास्मि॒न्नेतो॑ वाजिनं॑ दधाति॒ न क्ली॒बो भ॑वति
ब्राह्म॑णस्प॒त्यमेका॑दशकपालं॒ निर्व॑पे॒द्भाम॑कामः (१८)

ब्रह्म॑णस्पति॑मे॒व स्वेन॑ भाग॒धेये॒नोप॑ धावति॒ स ए॒वास्मै॑
सजा॒तान्प्र॑ यच्छति॒ ग्राम्ये॑व भ॑वति ग॒णव॑ती याज्यानुवा॒क्ये
भवतः॑ सजा॒तैरे॒वैनं॑ ग॒णव॑न्तं करोत्ये॒तामे॒व निर्व॑पेद्यः
का॒मये॑त ब्रह्म॒न्विशं॑ वि ना॑शयेयमिति॒ मारु॑ती या॒ज्यानुवा॒क्ये
कुर्या॑द्ब्रह्म॒न्नेव॑ विशं॑ वि ना॑शयति॥ (१९)

तेजः॑ समीचीं॑ ब्रह्मवर्च॑स्यैव॒ ग्राम॑काम॒स्त्रिच॑त्वारि॒ंशच्च॑॥ [३]

अ॒र्य॒म्णे च॒रुं निर्व॑पेथ्सुव॒र्गका॑मोऽसौ वा आ॑दि॒त्योऽर्य॒मा-
र्य॒मण॑मे॒व स्वेन॑ भाग॒धेये॒नोप॑ धावति॒ स ए॒वैनं॑ सुव॒र्गं
लो॒कं ग॑मयत्यर्य॒म्णे च॒रुं निर्व॑पेद्यः का॒मये॑त दान॑कामा मे
प्र॒जाः स्यु॑रित्यसौ वा आ॑दि॒त्योऽर्य॒मा यः खलु॑ वै ददा॑ति
सोऽर्य॒माऽर्य॒मण॑मे॒व स्वेन॑ भाग॒धेये॒नोप॑ धावति॒ स ए॒व (२०)

अ॒स्मै दान॑कामाः प्र॒जाः क॑रोति॒ दान॑कामा अ॒स्मै
प्र॒जा भ॑वन्त्यर्य॒म्णे च॒रुं निर्व॑पेद्यः का॒मये॑त स्व॒स्ति
ज॒नता॑मिया॒मित्य॒सौ वा आ॑दि॒त्योऽर्य॒माऽर्य॒मण॑मे॒व स्वेन॑

भाग॒धेये॒नोप॑ धावति॒ स ए॒वैनं॑ तद्गमयति॒ यत्र॑ जिगमिष॒तीन्द्रो॑
वै दे॒वाना॑मानुजा॒वर आ॑सी॒त्स प्र॒जाप॑तिमुपा॒धाव॑त्तस्मा॑
ए॒तमै॒न्द्रमा॑नुषू॒कमे॑कादशकपालं॒ निः (२१)

अ॒वप॑त्तेनै॒वैन॒मग्रं॑ दे॒वता॑नां॒ पर्य॑णयद्बुध्र॒वती॑ अग्र॒वती॑
याज्यानुवा॒क्ये अ॒करो॑द्बुध्रादे॒वैन॒मग्रं॑ पर्य॑णय॒द्यो रा॑ज॒न्य
आनु॒जावरः॑ स्यात्तस्मा॑ ए॒तमै॒न्द्रमा॑नुषू॒कमे॑कादशकपालं॒
निर्व॑पेदिन्द्रमे॒व स्वेन॑ भाग॒धेये॒नोप॑ धावति॒ स ए॒वैन॒मग्रं॑
समा॒नानां॑ परि॒ णय॑ति बुध्र॒वती॑ अग्र॒वती॑ याज्यानुवा॒क्ये
भव॑तो बुध्रादे॒वैन॒मग्रम् (२२)

परि॑ णयत्यानुषू॒को भ॑वत्येषा ह्येतस्य॑ दे॒वता॑ य
आ॒नुजा॒वरः समृ॑द्धौ यो ब्रा॒ह्मण॑ आ॒नुजा॒वरः स्यात्तस्मा॑
ए॒तम्बा॑र॒हस्प॑त्यमा॒नुषू॒कं च॒रुं निर्व॑पेद्बृहस्पतिमे॒व स्वेन॑
भाग॒धेये॒नोप॑ धावति॒ स ए॒वैन॒मग्रं॑ समा॒नानां॑ परि॒ णय॑ति
बुध्र॒वती॑ अग्र॒वती॑ याज्यानुवा॒क्ये भव॑तो बुध्रादे॒वैन॒मग्रं॑ परि॒
णय॑त्यानुषू॒को भ॑वत्येषा ह्येतस्य॑ दे॒वता॑ य आ॒नुजा॒वरः
समृ॑द्धौ॥ (२३)

प्रजापतेस्त्रयस्त्रिंशद्बृहतरं आसन्ताः सोमाय राज्ञे-
 ऽददात्तासां रोहिणीमुपैत्ता ईर्ष्यन्तीः पुनरगच्छन्ता अन्वैत्ताः
 पुनरयाचत ता अस्मै न पुनरददात्सोऽब्रवीदृतममीष्व यथा
 समावच्छ उपैष्याम्यथ ते पुनर्दास्यामीति स ऋतमामीत्ता
 अस्मै पुनरददात्तासां रोहिणीमेवोपै (२४)

ऐतं यक्ष्म आर्च्छद्राजानं यक्ष्म आरदिति तद्राजयक्ष्मस्य
 जन्म यत्पापीयानभवत्तत्पापयक्ष्मस्य यज्ञायाभ्यो-
 ऽविन्दत्तज्ञायेन्यस्य य एवमेतेषां यक्ष्माणां जन्म वेद
 नैनमेते यक्ष्मा विन्दन्ति स एता एव नमस्यन्नुपाधावत्ता
 अब्रुवन्वरं वृणामहै समावच्छ एव न उपाय इति तस्मा
 एतम् (२५)

आदित्यं चरुं निरवपन्तेनैवैनम्पापात्स्रामादमुश्चन्
 यः पापयक्ष्मगृहीतः स्यात्तस्मा एतमादित्यं चरुं
 निर्वपेदादित्यानेव स्वेन भागधेयेनोप धावति त एवैनं
 पापात्स्रामान्मुश्चन्त्यमावास्यायां निर्वपेदमुमेवैनमाप्यायमानमन
 प्याययति नवोनवो भवति जायमान इति पुरोनुवाक्या
 भवत्यायुरेवास्मिन्तया दधाति यमादित्या अं शुमाप्याययन्तीति

याज्ज्यैवैनमेतया प्याययति॥ (२६)

एवोपैतमस्मिन्नयोदश च॥ [५]

प्रजापतिर्देवेभ्योऽन्नाद्यं व्यादिशत्सोऽब्रवीद्यदिमाल्लोकानभ्यति
तन्ममांसदिति तदिमाल्लोकानभ्यत्यरिच्यतेन्द्रः राजानमिन्द्रमधि
स्वराजानन्ततो वै स इमाल्लोकाः स्त्रेधादुहत्तत्रिधातोस्त्रिधातुत्वय
कामयेतान्नादः स्यादिति तस्मा एतं त्रिधातुं निर्वपेदिन्द्राय
राज्ञे पुरोडाशम् (२७)

एकादशकपालमिन्द्रायाधिराजायेन्द्राय स्वराज्ञेऽयं वा
इन्द्रो राजायमिन्द्रोऽधिराजोऽसाविन्द्रः स्वराडिमानेव
लोकान्स्वेन भागधेयेनोप धावति त एवास्मा अन्नम्प्र
यच्छन्त्यन्नाद एव भवति यथा वत्सेन प्रत्तां गां
दुह एवमेवेमाल्लोकान्प्रत्तान्काममन्नाद्यं दुह उत्तानेषु
कपालेष्वधि श्रयत्ययातयामत्वाय त्रयः पुरोडाशा
भवन्ति त्रय इमे लोका एषाल्लोकानामास्या उत्तरउत्तरो
ज्यायान्भवत्येवमिव हीमे लोकाः समृद्धौ सर्वेषामभिगमयन्त्रव
द्यत्यच्छम्बद्वारव्यत्यासमन्वाहानिर्दाहाय॥ (२८)

पुरोडाशत्रयः षड्विंशतिश्च॥ [६]

दे॒वा॒सुराः संय॑त्ता आ॒स॒न्तां दे॒वान॑सुरा अज॒य॒न्ते
 दे॒वाः प॑राजिग्या॒ना अ॒सुरा॑णां वैश्य॒मुपा॑य॒न्तेभ्य॑
 इन्द्रि॑यं वी॒र्य॑मपा॑क्राम॒त्तदिन्द्रो॑ऽचाय॒त्तद॒न्वपा॑क्राम॒त्तद॒व॒रुध॑
 नाश॑क्रो॒त्तद॑स्माद॒भ्य॒र्धोऽच॑र॒त्स प्र॒जाप॑ति॒मुपा॑धाव॒त्तमे॒तया॑
 सर्व॑पृष्ठयाऽयाज॒य॒त्तयै॒वास्मि॑न्निन्द्रि॒यं वी॒र्य॑मदधा॒द्य
 इन्द्रि॑यका॒मः (२९)

वी॒र्य॑का॒मः स्या॑त्तमे॒तया॑ सर्व॑पृष्ठया याजयेदे॒ता ए॒व
 दे॒वताः स्वेन॑ भा॒ग॒धेये॒नोप॑ धावति॒ ता ए॒वास्मि॑न्निन्द्रि॒यं वी॒र्य॑
 दध॑ति॒ यदिन्द्रा॑य॒ राथ॑तराय॒ निर्व॑पति॒ यदे॒वाग्ने॑स्तेज॒स्तदे॒वाव॑
 रु॒न्ध्रे यदिन्द्रा॑य॒ बा॒र॒ह॑ताय॒ यदे॒वेन्द्र॑स्य॒ तेज॒स्तदे॒वाव॑ रु॒न्ध्रे
 यदिन्द्रा॑य॒ वैरू॒पाय॑ यदे॒व स॑वि॒तुस्तेज॒स्तत् (३०)

ए॒वाव॑ रु॒न्ध्रे यदिन्द्रा॑य॒ वैरा॒जाय॑ यदे॒व धा॑तुस्तेज॒स्तदे॒वाव॑
 रु॒न्ध्रे यदिन्द्रा॑य॒ शा॒क्क॒राय॑ यदे॒व म॒रुता॑ं तेज॒स्तदे॒वाव॑
 रु॒न्ध्रे यदिन्द्रा॑य॒ रै॒व॒ताय॑ यदे॒व बृ॒ह॒स्प॒तेस्तेज॒स्तदे॒वाव॑ रु॒न्ध्रे
 ए॒ताव॑न्ति॒ वै तेजा॑ंसि॒ तान्ये॒वाव॑ रु॒न्ध्रे उ॒त्ता॒नेषु॑ क॒पाले॒ष्वधि॑
 श्रय॑त्यया॑तयाम॒त्वाय॑ द्वाद॑शकपालः पुरो॒डाशः॑ (३१)

भ॒व॒ति वै॒श्वदे॒व॒त्वाय॑ स॒म॒न्त॒म्प॒र्य॒व॑द्यति स॒म॒न्त॒मे॒वेन्द्रि॑यं

वीर्यं यजमाने दधाति व्यत्यासमन्वाहानिर्दाहायाश्च ऋषभो
 वृष्णिर्बस्तः सा दक्षिणा वृषत्वायैतयैव यजेताभिःस्यमान
 एताश्चेद्वा अस्य देवता अन्नमदन्त्यदन्त्युवेवास्य
 मनुष्याः॥ (३२)

इन्द्रियकामः सवितुस्तोजस्तत्पुरोडाशोऽष्टात्रिंशच्च॥ [७]

रजनो वै कौणेयः क्रतुजितं जानकिं चक्षुर्वन्यमयात्तस्मा
 एतामिष्टिं निरवपदग्रये भ्राजस्वते पुरोडाशमष्टाकपालं
 सौर्यं चरुमग्रये भ्राजस्वते पुरोडाशमष्टाकपालन्तयैवास्मिश्चक्षुरव
 स्यात्तस्मा एतामिष्टिं निर्वपेदग्रये भ्राजस्वते पुरोडाशमष्टाकपाल
 सौर्यं चरुमग्रये भ्राजस्वते पुरोडाशमष्टाकपालमग्रेवै चक्षुषा
 मनुष्या वि (३३)

पश्यन्ति सूर्यस्य देवा अग्निं चैव सूर्यं च स्वेन
 भागधेयेनोप धावति तावेवास्मिश्चक्षुर्धत्तश्चक्षुष्मानेव भवति
 यदाग्नेयौ भवतश्चक्षुषी एवास्मिन्तत्प्रति दधाति यत्सौर्यो
 नासिकां तेनाभितः सौर्यमाग्नेयौ भवतस्तस्मादभितो नासिकां
 चक्षुषी तस्मान्नासिकया चक्षुषी विधृते समानी याज्यानुवाक्ये
 भवतः समानं हि चक्षुः समृद्ध्या उदु त्यं जातवेदसं सप्त

त्वां ह॒रितो॒ रथे॑ चि॒त्रं दे॒वाना॒मुद॑गा॒दनी॑क॒मिति॒ पिण्डा॒न्प्र
य॑च्छति॒ चक्षु॑रे॒वास्मै॒ प्र य॑च्छति॒ यदे॒व तस्य॒ तत्॥ (३४)

वि ह्य॑ष्टाविं॑शतिश्च॥ [८]

ध्रु॒वोऽसि॑ ध्रु॒वोऽह॑ संजा॒तेषु॑ भूयासं॒ धीर॒श्चेत्ता॑
वसु॒विद्धु॒वोऽसि॑ ध्रु॒वोऽह॑ संजा॒तेषु॑ भूयासमु॒ग्रश्चेत्ता॑
वसु॒विद्धु॒वोऽसि॑ ध्रु॒वोऽह॑ संजा॒तेषु॑ भूयासम॒भिभू॑श्चेत्ता॑
वसु॒विदाम॑नम॒स्याम॑नस्य दे॒वा ये संजा॒ताः कु॑मा॒राः
सम॑नस॒स्तान॒हं का॑मये ह॒दा ते मां का॑मयन्तां ह॒दा तान्म॒
आम॑नसः कृ॒धि स्वा॑हाम॒नमसि॑ (३५)

आम॑नस्य दे॒वा याः स्त्रियः॒ सम॑नस॒स्ता अ॒हं का॑मये
ह॒दा ता मां का॑मयन्तां ह॒दा ता म॒ आम॑नसः कृ॒धि
स्वाहा॑ वैश्वदे॒वी साङ्ग॑ह॒णीं निर्व॑पेद्दाम॒कामो॑ वैश्वदे॒वा वै
संजा॒ता वि॒श्वाने॒व दे॒वान्स्वेन॑ भाग॒धेये॒नोप॑ धावति॒ त
ए॒वास्मै॑ सजा॒तान्प्र य॑च्छन्ति॒ ग्राम्ये॑व भ॒वति साङ्ग॑ह॒णी
भ॒वति म॒नोग्र॑हणं॒ वै संग्र॑हण॒म्मन॑ ए॒व संजा॒ताना॑म् (३६)

गृ॒ह्णाति॒ ध्रु॒वोऽसि॑ ध्रु॒वोऽह॑ संजा॒तेषु॑ भूयास॒मिति॑
परि॒धीन्परि॑ दधा॒त्याशिष॑मे॒वैता॒मा शा॒स्तेऽथो॑ ए॒तदे॒व सर्व॑

सजातेष्वधि भवति यस्यैवं विदुषं एते परिधयः परिधीयन्तु
 आमनमस्यामनस्य देवा इति तिस्र आहुतीर्जुहोत्येतावन्तो
 वै सजाता ये महान्तो ये क्षुल्लका याः स्त्रियस्तानेवाव रुद्धे
 त एनमवरुद्धा उप तिष्ठन्ते॥ (३७)

स्वाहामनमसि सजातानां रुद्धे पञ्च च॥ [९]

यन्नवमैतन्नवनीतमभवद्यदसंपत्तत्सर्पिरभवद्यदधियत
 तद्धृतमभवदश्विनोः प्राणोऽसि तस्य ते दत्तां ययोः प्राणोऽसि
 स्वाहेन्द्रस्य प्राणोऽसि तस्य ते ददातु यस्य प्राणोऽसि
 स्वाहा मित्रावरुणयोः प्राणोऽसि तस्य ते दत्तां ययोः
 प्राणोऽसि स्वाहा विश्वेषां देवानां प्राणोऽसि (३८)

तस्य ते ददतु येषां प्राणोऽसि स्वाहा घृतस्य
 धाराममृतस्य पन्थामिन्द्रेण दत्ताम्प्रयताम्मरुद्भिः। तत्त्वा
 विष्णुः पर्यपश्यत्तत्त्वेडा गव्यैरयत्। पावमानेन त्वा स्तोमेन
 गायत्रस्य वर्तन्योपाशोर्वीर्येण देवस्त्वा सवितोऽसृजतु
 जीवातवे जीवनस्यायै बृहद्रथन्तरयोस्त्वा स्तोमेन त्रिष्टुभौ
 वर्तन्या शुक्रस्य वीर्येण देवस्त्वा सवितोत् (३९)

सृजतु जीवातवे जीवनस्याया अग्नेस्त्वा मात्रया

जगत्स्यै वर्तन्याग्रयणस्य वीर्येण देवस्त्वा सवितोऽथ्सृजतु
जीवातवे जीवनस्याया इममग्र आयुषे वर्चसे
कृधि प्रियं रेतो वरुण सोम राजन्। मातेवास्मा
अदिते शर्म यच्छु विश्वे देवा जरदष्टिर्यथासत्।
अग्निरायुष्मान्त्स वनस्पतिभिरायुष्मान्तेन त्वायुषायुष्मन्तं
करोमि सोम आयुष्मान्त्स ओषधीभिर्यज्ञ आयुष्मान्त्स
दक्षिणाभिर्ब्रह्मायुष्मत्तद्वाह्मणैरायुष्मद्देवा आयुष्मन्तस्तेऽमृतेन
पितर आयुष्मन्तस्ते स्वधयायुष्मन्तस्तेन त्वायुषायुष्मन्तं
करोमि॥ (४०)

विश्वेषां देवानां प्राणोऽसि त्रिष्टुभो वर्तन्या शुक्रस्य वीर्येण देवस्त्वा सवितोऽथ्सोम
आयुष्मान्पञ्चविंशतिश्च॥ [१०]

अग्निं वा एतस्य शरीरं गच्छति सोमं रसो
वरुण एनं वरुणपाशेन गृह्णाति सरस्वतीं वाग्नाविष्णू
आत्मा यस्य ज्योगामयति यो ज्योगामयावी स्याद्यो
वा कामयेत सर्वमायुरियामिति तस्मा एतामिष्टिं
निर्वपेदाग्नेयमष्टाकपालं सौम्यं चरुं वारुणं दशकपालं
सारस्वतं चरुमाग्नवैष्णवमेकादशकपालमग्नेरेवास्य शरीरं

निष्क्रीणाति सोमाद्रसम् (४१)

वारुणेनैवैनं वरुणपाशान्मुञ्चति सारस्वतेन वाचं
दधात्यग्निः सर्वा देवता विष्णुर्यज्ञो देवताभिश्चैवैनं
यज्ञेन च भिषज्यत्युत यदीतासुर्भवति जीवत्येव
यन्नवमैत्तन्नवनीतमभवदित्याज्यमवैक्षते रूपमेवास्यैतन्महिमानं
व्याचष्टेऽश्विनोः प्राणोऽसीत्याहाश्विनौ वै देवानाम् (४२)

भिषजौ ताभ्यामेवास्मै भेषजं करोतीन्द्रस्य प्राणो-
ऽसीत्याहेन्द्रियमेवास्मिन्नेतेन दधाति मित्रावरुणयोः
प्राणोऽसीत्याह प्राणापानावेवास्मिन्नेतेन दधाति विश्वेषां
देवानां प्राणोऽसीत्याह वीर्यमेवास्मिन्नेतेन दधाति घृतस्य
धाराममृतस्य पन्थामित्याह यथायजुरेवैतत्पावमानेन त्वा
स्तोमेनेति (४३)

आहु प्राणमेवास्मिन्नेतेन दधाति बृहद्रथन्तरयोस्त्वा
स्तोमेनेत्याहौजं एवास्मिन्नेतेन दधात्यग्नेस्त्वा मात्रयेत्याहात्मानं
दधात्यृत्विजः पर्याहुर्यावन्त एवर्त्विजस्त एनम्भिषज्यन्ति
ब्रह्मणो हस्तमन्वारभ्य पर्याहुरेकधैव यजमान आयुर्दधति
यदेव तस्य तद्धिरण्यात् (४४)

घृतं निष्पिबत्यायुर्वै घृतममृतं ५ हिरण्यममृतादेवायुर्निष्पिबति
 शतमानम्भवति शतायुः पुरुषः शतेन्द्रिय आयुष्येवेन्द्रिये
 प्रति तिष्ठत्यथो खलु यावन्तीः समा एष्यन्मन्येत
 तावन्मानं ५ स्यात्समृद्ध्या इममग्न आयुषे वर्चसे
 कृधीत्याहायुरेवास्मिन्वर्चो दधाति विश्वे देवा जरदष्टिर्यथासदिति
 जरदष्टिमेवैनं करोत्यग्निरायुष्मानिति हस्तं गृह्णात्येते वै देवा
 आयुष्मन्तस्त एवास्मिन्नायुर्दधति सर्वमायुरेति॥ (४५)

रसं देवानां ५ स्तोमेनेति हिरण्यादसदिति द्वाविंशतिश्च॥ [११]

प्रजापतिर्वरुणायाश्वमनयत्स स्वां देवतामार्च्छत्स
 पर्यदीर्यत स एतं वारुणं चतुष्कपालमपश्यत्तं निरवपत्ततो
 वै स वरुणपाशादमुच्यत वरुणो वा एतं गृह्णाति
 योऽश्वं प्रतिगृह्णाति यावतोऽश्वान्प्रतिगृह्णीयात्तावतो
 वारुणाश्चतुष्कपालान्निर्वपेद्वरुणमेव स्वेन भागधेयेनोप
 धावति स एवैनं वरुणपाशान्मुञ्चति (४६)

चतुष्कपाला भवन्ति चतुष्पाद्यश्वः समृद्ध्या एकमतिरिक्तं
 निर्वपेद्यमेव प्रतिग्राही भवति यं वा नाध्येति तस्मादेव

वरुणपाशान्मुच्यते यद्यपरं प्रतिग्राही स्यात्सौर्यमेककपालमनु
 निर्वपेदमुमेवादित्यमुच्चारं कुरुतेऽपोऽवभृथमवैत्यप्सु वै
 वरुणः साक्षादेव वरुणमव यजतेऽपोनप्रीयं चरुम्पुनरेत्य
 निर्वपेदप्सुयोनिर्वा अश्वः स्वामेवैनं योनिं गमयति स एनं
 शान्त उप तिष्ठते॥ (४७)

मुञ्चति चरुं सप्तदश च॥ [१२]

या वामिन्द्रावरुणा यतव्या तनूस्तयेममहंसो मुञ्चतं या
 वामिन्द्रावरुणा सहस्र्या रक्षस्या तेजस्या तनूस्तयेममहंसो
 मुञ्चतं यो वामिन्द्रावरुणावग्नौ सामस्तं वामेतेनाव यजे
 यो वामिन्द्रावरुणा द्विपाथ्सु पशुषु चतुष्पाथ्सु गोष्ठे
 गृहेष्वप्स्वोषधीषु वनस्पतिषु सामस्तं वामेतेनाव यज इन्द्रो
 वा एतस्य (४८)

इन्द्रियेणापं क्रामति वरुण एनं वरुणपाशेन गृह्णाति
 यः पाप्मना गृहीतो भवति यः पाप्मना गृहीतः स्यात्तस्मा
 एतामैन्द्रावरुणीम्पयस्यां निर्वपेदिन्द्र एवास्मिन्निन्द्रियं दधाति
 वरुण एनं वरुणपाशान्मुञ्चति पयस्या भवति पयो हि वा
 एतस्मादपक्रामत्यथैष पाप्मना गृहीतो यत्पयस्या भवति

पयं ए॒वास्मिन्त॑यां दधाति पय॒स्यायाम् (४९)

पुरो॒डाश॑मव॑ दधा॒त्यात्म॒न्वन्त॑मे॒वैनं॑ करोत्यथो॑
आ॒यत॑नवन्तमे॒व च॑तु॒र्धा व्यू॑हति दि॒क्ष्वे॒व प्रति॑ तिष्ठति
पुनः॑ समू॒हति दि॒ग्भ्य ए॒वास्मै॑ भेष॒जं क॑रोति समू॒ह्याव॑ द्यति
यथावि॑द्धं निष्कृ॒न्तति॑ ता॒दृगे॒व तद्यो॑ वा॒मिन्द्रा॑वरुणाव॒ग्नौ
स्राम॒स्तं वा॑मे॒तेना॑व॒ यज॒ इत्या॑ह॒ दुरि॑ष्ट्या ए॒वैन॑म्पाति॒ यो
वा॑मिन्द्रावरुणा द्वि॒पाथ्सु॑ प॒शुषु॑ स्राम॒स्तं वा॑मे॒तेना॑व॒ यज॒
इत्या॑हैताव॒तीर्वा॑ आप॒ ओष॑धयो॒ वन॒स्पत॑यः प्र॒जाः प॒शव॑
उपजी॒वनी॒यास्ता॑ ए॒वास्मै॑ वरुणपा॒शान्मु॑ञ्चति॥ (५०)

एतस्य॑ पय॒स्यायाम्पाति॑ षड्विंशतिश्च॥ [१३]

स प्र॑ल॒वन्नि॑ का॒व्येन्द्रं॑ वो वि॒श्वत॒स्परीन्द्रं॑ नरः। त्वं नः॑
सोम॑ वि॒श्वतो॒ रक्षा॑ राजन्नघाय॒तः। न रि॑ष्ये॒त्त्वाव॑तः सखा॑।
या ते॒ धामा॑नि दि॒वि या पृ॑थि॒व्यां या पर्व॑तेष्वोष॒धीष्व॑प्सु।
तेभि॑र्नो॒ विश्वैः॑ सु॒मना॒ अहै॑ड॒न्नाज॑न्त्सोम॒ प्रति॑ ह॒व्या गृ॑भाय।
अग्नी॑षोमा॒ सवे॑दसा॒ सह॑ती वनतं॒ गिरः॑। सं दे॒वत्रा॑ ब॒भूव॑थुः।
युवम् (५१)

ए॒तानि॑ दि॒वि रो॑च॒नान्य॒ग्निश्च॑ सोम॒ सक्र॑तू अध॒त्तम्।

युव९ सिन्धू९ र॒भि॒श॒स्ते॒र॒व॒द्या॒द॒ग्री॒षो॒मा॒व॒मु॒ञ्च॒तं॑ गृ॒भी॒ता॒न्।
 अ॒ग्री॒षो॒मा॒वि॒म९ सु मे॑ शृ॒णु॒तं वृ॒षणा॒ हव॑म्। प्र॒ति॑
 सू॒क्ता॒नि॒ ह॒र्य॑त॒म्भ॒व॑तं द॒ाशु॒षे म॑यः। आ॒न्यं दि॒वो मा॑त॒रि॒श्वा
 ज॒भा॒रा॒म॑श्चा॒द॒न्यं प॑रि॒ श्ये॒नो अ॒द्रेः॑। अ॒ग्री॒षो॒मा ब्र॑ह्म॒णा
 वा॒वृ॒धा॒नो॒रुं य॒ज्ञाय॑ च॒क्र॒थु॒रु लो॒कम्। अ॒ग्री॒षो॒मा ह॒विषः॑
 प्र॒स्थि॑त॒स्य वी॒तम् (५२)

ह॒र्य॑तं वृ॒षणा जु॒षे॒थाम्। सु॒श॒र्मा॒णा स्व॑व॒सा हि॒ भू॒त॒म॒था
 ध॒त्तं य॑ज॒मा॒नाय॒ शं योः॑। आ॒ प्या॑य॒स्व सं ते॑। ग॒णा॒नां त्वा
 ग॒ण॒प॑ति९ ह॒वा॒म॒हे क॒विं क॑वी॒नामु॑प॒म॒श्र॑व॒स्त॒मम्। ज्ये॒ष्ठ॒राजं॑
 ब्र॒ह्म॒णां ब्र॑ह्म॒ण॒स्प॒त॒ आ नः॑ शृ॒ण्व॒न्नृ॒तिभिः॑ सी॒द सा॑द॒नम्। स
 इ॒ज्ज॒ने॒न स॒ वि॒शा स॒ जन्म॑ना॒ स पु॒त्रैर्वा॑ज॒म्भ॒र॒ते ध॒ना नृ॑भिः।
 दे॒वा॒नां यः पि॒तर॑मा॒विवा॑सति (५३)

श्र॒द्धा॒म॒ना ह॒विषा॒ ब्र॑ह्म॒ण॒स्प॒ति॑म्। स सु॒ष्टु॒भा स ऋ॑क॒ता
 ग॒णे॒न व॒ल९ रु॒रोज॑ फ॒लि॒ग९ र॒वे॒ण। बृ॒ह॒स्प॒ति॑रु॒स्त्रिया॑
 ह॒व्य॒सू॒दः क॒नि॒क्र॒द॒द्वा॒व॒श॒ती॒रु॒दा॒ज॒त्। म॒रु॒तो य॒द्ध वो॒ दि॒वो
 या वः॑ श॒र्म। अ॒र्य॒मा या॑ति वृ॒षभ॑स्तुवि॒ष्मा॒न्दा॒ता व॑सू॒नां
 पु॒रु॒हू॒तो अ॒र॒ह॒न्। स॒ह॒स्रा॒क्षो गो॑त्रि॒भि॒द्वज्र॑बा॒हुर॒स्मासु॑ दे॒वो

द्रविणं दधातु। ये तैऽर्यमन्बृहवो देवयानाः पन्थानः (५४)

राजन्दिव आचरन्ति। तेभिर्नो देव महि शर्म यच्छु शं
न एधि द्विपदे शं चतुष्पदे। बुध्रादग्रमङ्गिरोभिर्गृणानो वि
पर्वतस्य दृ० हितान्यैरत्। रुजद्रोधा० सि कृत्रिमाण्येषा०
सोमस्य ता मद इन्द्रश्चकार। बुध्रादग्रेण वि मिमाय
मानैर्वज्रेण खान्यतृणन्नदीनाम्। वृथासृजत्पृथिभिर्दीर्घयाथैः
सोमस्य ता मद इन्द्रश्चकार (५)

प्र यो जज्ञे विद्वा० अस्य बन्धुं विश्वानि देवो जनिमा
विवक्ति। ब्रह्म ब्रह्मण उज्जभार मध्या० त्रीचादुच्चा स्वधयाभि प्र
तस्थौ। महान्मही अस्तभायद्वि जातो द्या० सन्न पार्थिवं च
रजः। स बुध्रादौष्ट जनुषाभ्यग्रम्बृहस्पतिर्देवता यस्य सम्राट्।
बुध्राद्यो अग्रमभ्यर्त्योजसा बृहस्पतिमा विवासन्ति देवाः।
मिनद्वलं वि पुरो दर्दरीति कनि० क्रदत्सुवरपो जिगाय॥ (५६)

युवं वीतमा विवासति पन्थानो दीर्घयाथैः सोमस्य ता मद इन्द्रश्चकार देवा नवं
च॥ [१४]

देवा मनुष्या देवासुरा अंब्रुवन्देवासुरास्तेषां ज्ञायत्री प्रजापतिस्ता यत्राग्रे गोभिश्चित्रया
मारुतन्देवा वसव्या अग्रे मारुतमिति देवा वसव्या देवाः शर्मण्यास्त्वष्टा हतपुत्रो देवा

वै राज्ञ्यन्त्रवोनवश्चतुर्दश॥ ————— [१५]

[देवा मनुष्याः प्रजां पशून्देवा वसव्याः परिदध्यादिदमस्म्यष्टाचत्वारिंशत्॥४४॥ देवा मनुष्या मादयध्वम्॥]

॥चतुर्थः प्रश्नः॥

॥तैत्तिरीयसंहितायां द्वितीयकाण्डे चतुर्थः प्रश्नः॥

देवा मनुष्याः पितरस्तेऽन्यत आसन्नसुरा रक्षांसि पिशाचास्तेऽन्यतस्तेषां देवानामृत यदल्पं लोहितमकुर्वन्तद्रक्षांसि रात्रौभिरसुभ्रन्तान्सुब्धान्मृतान्भि व्योच्छृत्ते देवा अविदुर्यो वै नोऽयमिन्द्रियते रक्षांसि वा इमं घृन्तीति ते रक्षांस्युपांमन्नयन्त तान्यंब्रुवन्वरं वृणामहे यत् (१)

असुराञ्जयाम तन्नः सहासदिति ततो वै देवा असुरानजयन्तेऽसुराञ्जित्वा रक्षांस्युपांनुदन्त तानि रक्षांस्यनृतमकर्तेति समन्तं देवान्पर्यविशन्ते देवा अग्रावनाथन्त तैऽग्नये प्रवन्ते पुरोडाशमृष्टाकपालं निर्वपन्नग्नये विबाधवन्तेऽग्नये प्रतीकवते यदग्नये प्रवन्ते निर्वपन् यान्येव पुरस्ताद्रक्षांसि (२)

आसन्तानि तेन प्राणुदन्त यदग्नये विबाधवन्ते यान्येवाभितो रक्षांस्युपासन्तानि तेन व्यबाधन्त यदग्नये प्रतीकवते यान्येव पश्चाद्रक्षांस्युपासन्तानि तेनापांनुदन्त ततो देवा अभवन्परासुरा यो भ्रातृव्यवान्स्यात्स स्पर्धमान एतयेष्ट्या यजेताग्नये प्रवन्ते पुरोडाशमृष्टाकपालं निर्वपेदग्नये विबाधवन्ते (३)

अग्नये प्रतीकवते यदग्नये प्रवन्ते निर्वपति य एवास्माच्छ्रेयान्भ्रातृव्यस्तं तेन प्र णुदते यदग्नये विबाधवन्ते य एवैनं सदृङ्गं तेन वि बाधते यदग्नये प्रतीकवते य एवास्मात्पापीयान्तं तेनाप नुदते प्र श्रेयांसम्भ्रातृव्यं नुदतेऽति सदृशं क्रामति नैनम्पापीयानाप्नोति य एवं विद्वानेतयेष्ट्या यजते॥ (४)

वृणामहे यत्पुरस्ताद्रक्षांसि वपेदग्नये विबाधवन्त एवं चत्वारि च॥ ————— [१]

देवासुराः संयत्ता आसन्ते देवा अंब्रुवन् यो नो वीर्यावत्तमस्तमनुं समारंभामहा इति
त इन्द्रमब्रुवन्त्वं वै नो वीर्यावत्तमोऽसि त्वामनुं समारंभामहा इति सोऽब्रवीत्तिस्रो मं
इमास्तनुवो वीर्यावतीस्ताः प्रीणीताथासुरानभि भविष्यथेति ता वै ब्रूहीत्यंब्रुवन्नियमं होमुगियं
विमृधेयमिन्द्रियावती (५)

इत्यंब्रवीत् इन्द्राया होमुचं पुरोडाशमेकादशकपालं निरवपन्निन्द्राय
वैमृधायेन्द्रायेन्द्रियावते यदिन्द्राया होमुचं निरवपन्नं हंस एव तेनामुच्यन्ते
यदिन्द्राय वैमृधाय मृधं एव तेनापान्नं यदिन्द्रायेन्द्रियावत इन्द्रियमेव तेनात्मन्नं दधत्
त्रयस्त्रिंशत्कपालं पुरोडाशं निरवपन्नयस्त्रिंशद्वै देवतास्ता इन्द्र आत्मन्नं समारंभयत्
भूत्यै (६)

तां वाव देवा विजितिमुत्तमामसुरैर्व्यजयन्त यो भ्रातृव्यवान्स्थ्याथ्स स्पर्धमान एतयेष्ट्या
यजेतेन्द्राया होमुचं पुरोडाशमेकादशकपालं निरवपेदिन्द्राय वैमृधायेन्द्रायेन्द्रियावतेऽहंसा वा
एष गृहीतो यस्माच्छ्रेयान्भ्रातृव्यो यदिन्द्राया होमुचं निरवपत्यं हंस एव तेन मुच्यते मृधा
वा एषोऽभिषण्णो यस्मात्समानेष्वन्यः श्रेयानुत (७)

अभ्रातृव्यो यदिन्द्राय वैमृधाय मृधं एव तेनापं हते यदिन्द्रायेन्द्रियावत इन्द्रियमेव
तेनात्मन्यत्ते त्रयस्त्रिंशत्कपालं पुरोडाशं निरवपति त्रयस्त्रिंशद्वै देवतास्ता एव यजमान
आत्मन्नं समारंभयते भूत्यै सा वा एषा विजितिर्नामिष्टिर्य एवं विद्वानेतयेष्ट्या यजंत
उत्तमामेव विजितिम्भ्रातृव्येण विजयते॥ (८)

इन्द्रियावती भूत्या उत्तैकान्नपञ्चाशच्च॥ [२]

देवासुराः संयत्ता आसन्तेषां गायत्र्योजो बलमिन्द्रियं वीर्यं प्रजां
पशून्संगृह्यादायापक्रम्यातिष्ठत्तेऽमन्यन्त यत्रान् वा इयमुपावर्त्स्यति त इदम्भविष्यन्तीति
तां व्यह्वयन्त विश्वकर्मन्निति देवा दाभीत्यसुराः सा नान्यत्राश्च नोपावर्तत ते देवा
एतद्यजुरपश्यन्नोजोऽसि सहोऽसि बलमसि (९)

भ्राजोऽसि देवानां धाम नामासि विश्वमसि विश्वायुः सर्वमसि सर्वायुरभिभूरिति वाव
देवा असुराणामोजो बलमिन्द्रियं वीर्यं प्रजां पशून्वृजत यद्गायत्र्यपक्रम्यातिष्ठत्तस्मादेतां
गायत्रीतीष्टिमाहुः संवत्सरो वै गायत्री संवत्सरो वै तदपक्रम्यातिष्ठद्यदेतया देवा

असुराणामोजो बलमिन्द्रियं वीर्यम् (१०)

प्रजां पशूनवृञ्जत तस्मादेताः संवर्ग इतीष्टिमाहुर्यो भ्रातृव्यवान्स्यात्स स्पर्धमान एतयेष्ट्या यजेताग्रये संवर्गाय पुरोडाशमष्टाकपालं निर्वपेत् शृतमासन्नमेतेन यजुषाभि मृशेदोज एव बलमिन्द्रियं वीर्यं प्रजां पशून्भ्रातृव्यस्य वृङ्क्ते भवत्यात्मना परास्य भ्रातृव्यो भवति॥ (११)

बलमस्येतया देवा असुराणामोजो बलमिन्द्रियं वीर्यं पञ्चत्वारिंशच्च॥ [३]

प्रजापतिः प्रजा असृजत ता अस्मात्सृष्टाः पराचीरायन्ता यत्रावसन्ततो गर्मुददतिष्ठता बृहस्पतिश्चान्ववैताः सौऽब्रवीद्बृहस्पतिरनयां त्वा प्र तिष्ठान्यथ त्वा प्रजा उपावर्त्स्यन्तीति तस्मातिष्ठत्तो वै प्रजापतिं प्रजा उपावर्तन्त यः प्रजाकामः स्यात्तस्मा एतस्माजापत्यं गौर्मुतं चरुं निर्वपेत्प्रजापतिम् (१२)

एव स्वेन भागधेयेनोप धावति स एवास्मै प्रजाम्प्र जनयति प्रजापतिः पशून्सृजत तैः अस्मात्सृष्टाः पराश्च आयन्ते यत्रावसन्ततो गर्मुददतिष्ठतान्पूषा चान्ववैताः सौऽब्रवीत्पूषानयां मा प्र तिष्ठान्यथ त्वा पशवं उपावर्त्स्यन्तीति माम्प्र तिष्ठेति सोमोऽब्रवीन्मम वै (१३)

अकृष्टपच्यमित्युभौ वाम्प्र तिष्ठानीत्यब्रवीत्तौ प्रातिष्ठत्तो वै प्रजापतिम्पशवं उपावर्तन्त यः पशुकामः स्यात्तस्मा एतः सोमापोष्णं गौर्मुतं चरुं निर्वपेत्सोमापूषणावेव स्वेन भागधेयेनोप धावति तावेवास्मै पशून्प्र जनयतः सोमो वै रेतोधाः पूषा पशूनाम्प्रजनयिता सोम एवास्मै रेतो दधाति पूषा पशून्प्र जनयति॥ (१४)

वपेत्प्रजापतिं वै दधाति पूषा त्रीणि च॥ [४]

अग्ने गोभिर्न आ गृहीन्दौ पुष्ट्या जुषस्व नः। इन्द्रो धृता गृहेषु नः॥ सविता यः संहस्त्रियः स नो गृहेषु रारणत्। आ पूषा एत्वा वसु॥ धाता ददातु नो रयिमीशानो जगतस्पतिः। स नः पूर्णेन वावनत्॥ त्वष्टा यो वृषभो वृषा स नो गृहेषु रारणत्। सहस्रेणायुतेन च॥ येन देवा अमृतम् (१५)

दीर्घः श्रवो दिव्यैरयन्त। रायस्पोष त्वमस्मभ्यं गवां कुल्मिं जीवस आ युवस्वा। अग्निर्गृहपतिः सोमो विश्वविनिः सविता सुमेधाः स्वाहा॥ अग्ने गृहपते यस्ते घृत्यो भागस्तेन सह ओज आक्रममाणाय धेहि श्रेष्ठ्यात्पथो मा योषं मूर्धा भूयासः स्वाहा॥ (१६)

अमृतमृष्टात्रिंशच्च॥ [५]

चित्रया यजेत पशुकाम इयं वै चित्रा यद्वा अस्यां विश्वम्भूतमधि प्रजायते तेनेयं चित्रा य एवं विद्वाश्चित्रया पशुकामो यजते प्र प्रजया पशुभिर्मिथुनैर्जायते प्रैवाग्नेयेन वापयति रेतः सौम्येन दधाति रेत एव हितं त्वष्टा रूपाणि वि करोति सारस्वतौ भवत एतद्वै दैव्यमिथुनं दैव्यमेवास्मै (१७)

मिथुनम्मध्यतो दधाति पुष्ट्यै प्रजननाय सिनीवाल्थै चरुर्भवति वाग्वै सिनीवाली पुष्टिः खलु वै वाक्पुष्टिमेव वाचमुपैत्येन्द्र उत्तमो भवति तेनैव तन्मिथुनं सप्तैतानि हवींषि भवन्ति सप्त ग्राम्याः पशवः सप्तरण्याः सप्त छन्दास्स्युभयस्यावरुद्धा अथैता आहुतीर्जुहोत्येते वै देवाः पुष्टिपतयस्त एवास्मिन्पुष्टिं दधति पुष्यति प्रजया पशुभिरथो यदेता आहुतीर्जुहोति प्रतिष्ठित्यै॥ (१८)

अस्मे त एव द्वादश च॥ [६]

मारुतमसि मरुतामोजोऽपां धारां भिन्धि रमयंत मरुतः श्येनमायिनम्मनोजवसं वर्षणं सुवृक्तिम्। येन शर्ध उग्रमवसृष्टमेति तदश्विना परि धत्तस्वस्ति। पुरोवातो वर्षञ्जिन्वरावृथ्वाहा वातावद्वर्षन्नुग्ररावृथ्वाहा स्तनयन्वर्षन्मीमरावृथ्वाहानशन्यवस्फूर्जन्दिद्युद्व वर्षन्पृतिरावृत् (१९)

स्वाहा बहु हायमवृषादिति श्रुतरावृथ्वाहातपति वर्षन्विराडावृथ्वाहावस्फूर्जन्दिद्युद्वर्षन्भूत मान्दा वाशाः शुन्ध्यूरजिराः। ज्योतिष्मतीस्तमस्वरौरुन्दतीः सुफेनाः। मित्रंभृतः क्षत्रंभृतः सुराष्ट्रा इह माऽवत। वृष्णो अश्वंस्य सदानमसि वृष्ट्यै त्वोपं नह्यामि॥ (२०)

पृतिरावृद्धिचत्वारिंशच्च॥ [७]

देवा वसव्या अग्ने सोम सूर्य। देवाः शर्मण्या मित्रावरुणार्यमन्त्र। देवाः सपीतयोऽपां नपादाशुहेमन्त्र। उद्रो दन्तोऽधिम्मिन्त दिवः पर्जन्यादन्तरिक्षात्पृथिव्यास्ततो नो वृष्ट्याऽवत। दिवा चित्तमः कृण्वन्ति पर्जन्येनोदवाहेन। पृथिवीं यद्बुन्दन्ति। आ यं नरः सुदानवो ददाशुषे दिवः कोशमचुच्यवुः। वि पर्जन्याः सृजन्ति रोदसी अनु धन्वना यन्ति (२१)

वृष्टयः। उदीरयथा मरुतः समुद्रतो यूयं वृष्टिं वर्षयथा पुरीषिणः। न वो दस्त्रा

उपं दस्यन्ति धेनवः शुभं यातामनु रथा अवृत्सत। सृजा वृष्टिं दिव आद्विः समुद्रं पृण। अजा असि प्रथमजा बलमसि समुद्रियम्। उन्नम्भय पृथिवीम्भिन्द्दीदं दिव्यं नभः। उद्रो दिव्यस्यं नो देहीशानो वि सृजा दृतिम्। ये देवा दिविभागा यैः स्तरिक्षभागा ये पृथिविभागाः। त इमं यज्ञमवन्तु त इदं क्षेत्रमा विंशन्तु त इदं क्षेत्रमनु वि विंशन्तु॥ (२२)

यन्ति देवा विंशतिश्च॥ [८]

मारुतमसि मरुतामोज इति कृष्णं वासः कृष्णातूपं परि धत्त एतद्वै वृष्टे रूपां सरूप एव भूत्वा पर्जन्यं वर्षयति रमयंत मरुतः श्येनमायिनमिति पश्चाद्वातं प्रति मीवति पुरोवातमेव जनयति वर्षस्यावरुद्धौ वातनामानि जुहोति वायुर्वै वृष्ट्या ईशे वायुमेव स्वेन भागधेयेनोप धावति स एवास्मै पर्जन्यं वर्षयत्यष्टौ (२३)

जुहोति चतस्रो वै दिशश्चतस्रोऽवान्तरदिशा दिग्भ्य एव वृष्टिः सम्प्र च्यावयति कृष्णाजिने सं यौति हविरेवाकरन्तर्वेदि सं यौत्यवरुद्धौ यतीनामद्यमानानां शीर्षाणि परापतन्ते खर्जुरां अभवन्तेषां रसं ऊर्ध्वोऽपतत्तानि करीराण्यभवन्सौम्यानि वै करीराणि सौम्या खलु वा आहुतिर्दिवो वृष्टिं च्यावयति यत्करीराणि भवन्ति (२४)

सौम्यैवाहुत्या दिवो वृष्टिमव रुद्धे मधुषा सं यौत्यपां वा एष ओषधीनां रसो यन्मध्वञ्च एवौषधीभ्यो वर्षत्यथो अञ्च एवौषधीभ्यो वृष्टिं नि नयति मान्दा वाशा इति सं यौति नामधेयैरेवेना अच्छैत्यथो यथा ब्रूयादसावेहीत्यवमेवेनां नामधेयैरा (२५)

च्यावयति वृष्णो अश्वस्य सदानमसि वृष्टे त्वोपं नह्यामीत्याहु वृषा वा अश्वो वृषा पर्जन्यः कृष्ण इव खलु वै भूत्वा वर्षति रूपेणैवैनं समर्धयति वर्षस्यावरुद्धौ॥ (२६)

अष्टौ भवन्ति नामधेयैरेकात्रिंशच्च॥ [९]

देवा वसव्या देवाः शर्मण्या देवाः सपीतय इत्या बभ्राति देवताभिरैवान्वहं वृष्टिंमिच्छति यदि वर्षेतावत्येव होतव्यं यदि न वर्षेच्छो भूते हविर्निर्वपेदहोरात्रे वै मित्रावरुणावहोरात्राभ्यां खलु वै पर्जन्यो वर्षति नक्तं वा हि दिवा वा वर्षति मित्रावरुणावेव स्वेन भागधेयेनोप धावति तावेवास्मै (२७)

अहोरात्राभ्यां पर्जन्यं वर्षयतोऽग्नये धामच्छदे पुरोडाशमष्टाकपालं निर्वपेन्मारुतं

सप्तकपालः सौर्यमेककपालमग्निर्वा इतो वृष्टिमुदीरयति मरुतः सृष्टां नयन्ति यदा खलु वा असावादित्यो न्यङ्गिभिः पर्यावर्ततेऽथ वर्षति धामच्छदिव खलु वै भूत्वा वर्षत्येता वै देवता वृष्ट्या ईशते ता एव स्वेन भागधेयेनोप धावति ताः (२८)

एवास्मै पर्जन्यं वर्षयन्त्युतावर्षिष्यन्वर्षत्येव सृजा वृष्टिं दिव आद्भिः समुद्रं पृणेत्याहेमाश्चैवामृषापः समर्धयत्यथो आभिरैवामूरच्छैत्यब्जा असि प्रथमजा बलमसि समुद्रियमित्याह यथायजुरेवैतदुन्नम्भय पृथिवीमिति वर्षाह्वा जुहोत्येषा वा ओषधीनां वृष्टिर्वनिस्तथैव वृष्टिमा च्यावयति ये देवा दिविभागा इति कृष्णाजिनमव धूनीतीम एवास्मै लोकाः प्रीता अभीष्टा भवन्ति॥ (२९)

अस्मै धावति ता वा एकविंशतिश्च॥ [१०]

सर्वाणि छन्दाः स्येतस्यामिष्ट्यामनूच्यानीत्याहुस्त्रिष्टुभो वा एतद्वीर्यं यत्कुदुष्णिहा जगत्ये यदुष्णिहक्कुभावन्वाह तेनैव सर्वाणि छन्दाः स्युर्व रुद्धे गायत्री वा एषा यदुष्णिहा यानि चत्वार्यध्यक्षराणि चतुष्पाद एव ते पशवो यथा पुरोडाशे पुरोडाशोऽध्यमेव तद्यद्व्यध्यक्षराणि यज्जगत्या (३०)

परिदध्यादन्तं यज्ञं गमयेन्निष्टुभा परि दधातीन्द्रियं वै वीर्यं त्रिष्टुगिन्द्रिय एव वीर्यं यज्ञं प्रतिं षापयति नान्तं गमयत्यग्रे त्री ते वाजिना त्री षधस्थेति त्रिवत्या परि दधाति सरूपत्वाय सर्वो वा एष यज्ञो यत्रैधातवीयङ्कामायकामाय प्र युज्यते सर्वेभ्यो हि कामेभ्यो यज्ञः प्रयुज्यते त्रैधातवीयेन यजेताभिचरन्सर्वो वै (३१)

एष यज्ञो यत्रैधातवीयः सर्वणैवेन यज्ञेनाभि चरति स्तृणुत एवेनमेतथैव यजेताभिचर्यमाणः सर्वो वा एष यज्ञो यत्रैधातवीयः सर्वणैव यज्ञेन यजते नैनमभिचरन्स्तृणुत एतथैव यजेत सहस्रेण यक्ष्यमाणः प्रजातमेवैनद्वदात्येतथैव यजेत सहस्रेणेजानोऽन्तं वा एष पशूनां गच्छति (३२)

यः सहस्रेण यजते प्रजापतिः खलु वै पशूनसृजत ताः स्रैधातवीयेनैवासृजत य एवं विद्वाः स्रैधातवीयेन पशुकामो यजते यस्मादेव योनैः प्रजापतिः पशूनसृजत तस्मादेवैनान्त्सृजत उपैनमुत्तरः सहस्रं नमति देवताभ्यो वा एष आ वृश्च्यते यो यक्ष्य इत्युक्त्वा न यजते त्रैधातवीयेन यजेत सर्वो वा एष यज्ञः (३३)

यत्रैधातवीयः सर्वेणैव यज्ञेन यजते न देवताभ्य आ वृश्च्यते द्वादशकपालः पुरोडाशो भवति ते त्रयश्चतुष्कपालास्त्रिः षमृद्धत्वाय त्रयः पुरोडाशा भवन्ति त्रय इमे लोका एषां लोकानामास्या उत्तरउत्तरो ज्यायान्भवत्येवमिव हीमे लोका यवमयो मध्य एतद्वा अन्तरिक्षस्य रूपः समृद्धौ सर्वेषामभिगमयन्नव द्यत्यच्छम्बद्वारः हिरण्यं ददाति तेज एव (३४)

अव रुद्धे तार्प्यं ददाति पशूनेवाव रुद्धे धेनुं ददात्याशिष एवाव रुद्धे साम्नो वा एष वर्णो यद्विरण्यं यजुषां तार्प्यमुक्थामदानां धेनुरेतानेव सर्वान् वर्णानव रुद्धे॥ (३५)

जगत्याभिचरन्सर्वो वै गच्छति यज्ञस्तेज एव त्रिःशच्च॥ [११]

त्वष्टा हतपुत्रो वीन्द्रः सोममाहरत्तस्मिन्निन्द्र उपहवमैच्छत् तं नोपाह्वयत् पुत्रम्मे-
ऽवधीरिति स यज्ञवेशसं कृत्वा प्रासहा सोममपिबत्तस्य यदत्यशिष्यत् तत्त्वष्टाहवनीयमुप-
प्रावर्तयत्स्वाहेन्द्रशत्रुर्वधस्वेति स यावदूर्ध्वः पराविध्यति तावति स्वयमेव व्यरमत् यदि
वा तावत्प्रवणम् (३६)

आसीद्यदि वा तावदध्यग्रेरासीत्स सम्भवन्नग्नीषोमावभि समभवत्स इषुमात्रमिषुमात्रं
विष्वङ्मुखवर्धत् स इमाल्लोकानवृणोद्यदिमाल्लोकानवृणोत्तद्वृत्रस्य वृत्रत्वन्तस्मादिन्द्रोऽबिभेदपि
त्वष्टा तस्मै त्वष्टा वज्रमसिञ्चत्तपो वै स वज्र आसीत्तमुद्यन्तुं नाशक्रोदथ वै तर्हि
विष्णुः (३७)

अन्या देवतासीत्सोऽब्रवीद्विष्णवेहीदमा हरिष्यावो येनायमिदमिति स विष्णुस्त्रेधात्मानं
वि न्यधत्त पृथिव्यां तृतीयमन्तरिक्षे तृतीयं दिवि तृतीयमभिपर्यावर्ताद्यबिभेद्यत्पृथिव्यां
तृतीयमासीत्तेनेन्द्रो वज्रमुदयच्छद्विष्ण्वनुस्थितः सोऽब्रवीन्मा मे प्र हारस्ति वा इदम् (३८)

मयि वीर्यं तत्ते प्र दास्यामीति तदस्मै प्रायच्छत्तत्प्रत्यंगृह्णादधा मेति तद्विष्णवेति
प्रायच्छत्तद्विष्णुः प्रत्यंगृह्णादस्मास्विन्द्र इन्द्रियं दधात्विति यदन्तरिक्षे तृतीयमासीत्तेनेन्द्रो
वज्रमुदयच्छद्विष्ण्वनुस्थितः सोऽब्रवीन्मा मे प्र हारस्ति वा इदम् (३९)

मयि वीर्यं तत्ते प्र दास्यामीति तदस्मै प्रायच्छत्तत्प्रत्यंगृह्णाद्विर्माधा इति तद्विष्णवेति
प्रायच्छत्तद्विष्णुः प्रत्यंगृह्णादस्मास्विन्द्र इन्द्रियं दधात्विति यद्वि वि तृतीयमासीत्तेनेन्द्रो
वज्रमुदयच्छद्विष्ण्वनुस्थितः सोऽब्रवीन्मा मे प्र हार्येनाहम् (४०)

इदमस्मि तत्ते प्र दास्यामीति त्वी (३) इत्यब्रवीत्सन्धान्तु सं दधावहै त्वामेव
प्र विशानीति यन्माम्रविशेः किम्मा भुञ्या इत्यब्रवीत्त्वामेवेन्धीय तव भोगाय त्वाम्र
विशेयमित्यब्रवीत्त वृत्रः प्राविशदुदरं वै वृत्रः क्षुत्खलु वै मनुष्यस्य भ्रातृव्यो यः (४१)

एवं वेद हन्ति क्षुधम्रातृव्यन्तदस्मै प्रायच्छुत्तत्प्रत्यगृह्णात्रिमाधा इति तद्विष्णुवेति
प्रायच्छुत्तद्विष्णुः प्रत्यगृह्णादस्मास्विन्द्रं इन्द्रियं दधात्विति यन्त्रिः प्रायच्छुत्रिः
प्रत्यगृह्णात्त्रिधातोस्त्रिधातुत्वं यद्विष्णुरन्वतिष्ठत् विष्णुवेति प्रायच्छुत्तस्मादैन्द्रावैष्णवः
हविर्भवति यद्वा इदं किं च तदस्मै तत्प्रायच्छुदृचः सामानि यजूंषि सहस्रं वा अस्मै
तत्प्रायच्छुत्तस्मात्सहस्रदक्षिणम्॥ (४२)

प्रवणं विष्णुर्वा इदमिदमहं यो भवत्येकविंशतिश्च॥ [१२]

देवा वै राजन्याञ्जायमानादविभयुस्तमन्तरेव सन्तं दाम्नापौम्भुत्स वा एषोऽपौब्धो
जायते यद्राजिन्यौ यद्वा एषोऽनपोब्धो जायेत वृत्रान्ध्रश्चरेद्यं कामयेत राजन्यमनपोब्धो
जायेत वृत्रान्ध्रश्चरेदिति तस्मा एतमैन्द्राबारहस्पत्यं चरुं निर्वपेदैन्द्रो वै राजन्यौ ब्रह्म
बृहस्पतिर्ब्रह्मणैवेनं दाम्नोऽपोम्भनान्मुञ्चति हिरण्मयं दाम दक्षिणा साक्षादेवेनं दाम्नो-
ऽपोम्भनान्मुञ्चति॥ (४३)

एनन्दादश च॥ [१३]

नवोनवो भवति जायमानोऽह्ना केतुरुषसामेत्यग्रे। भागं देवेभ्यो वि दधात्यायन्प्र
चन्द्रमस्तिरति दीर्घमायुः। यमादित्या अशुमाप्याययन्ति यमक्षितमक्षितयः पिबन्ति। तेन
नो राजा वरुणो बृहस्पतिरा प्याययन्तु भुवनस्य गोपाः। प्राच्या दिशि त्वमिन्द्रासि
राजोतोदीच्या वृत्रहन्वृत्रहासि। यत्र यन्ति स्रोत्यास्तत् (४४)

जितं तै दक्षिणतो वृषभ एधि हव्यः। इन्द्रो जयाति न परां जयाता अधिराजो
राजसु राजयाति। विश्वा हि भूयाः पृतना अभिष्टीरुपसद्यो नमस्यो यथासत्। अस्येदेव
प्र रिरिचे महित्वं दिवः पृथिव्याः पर्यन्तरिक्षात्। स्वराडिन्द्रो दम् आ विश्वगूर्तः स्वरिरमत्रो
ववक्षे रणांय। अभि त्वा शूर नोनूमोऽदुग्धा इव धेनवः। ईशानम् (४५)

अस्य जगतः सुवर्दशमीशानमिन्द्र तस्थुषः। त्वामिद्धि हवांमहे साता वाजस्य कारवः।
त्वां वृत्रेष्विन्द्र सत्पतिं नरस्त्वां काष्ठास्वर्वतः। यद्वाव इन्द्र ते शतं शतम्भूर्मीरुत स्युः।

न त्वां वज्रिन्सहस्रं सूर्या अनु न जातमष्ट रोदसी। पिबा सोममिन्द्र मन्दतु त्वा यं तै सुषाव हर्यश्वाद्रिः। (४६)

सोतुर्बाहुभ्यां सुयतो नार्वा। रेवतीर्नः सधमाद इन्द्रे सन्तु तुविवाजाः। क्षुमन्तो याभिर्मदेम। उदग्ने शुचयस्तव वि ज्योतिषोदु त्यं जातवेदसं सप्त त्वां हरितो रथे वहन्ति देव सूर्या। शोचिष्केशं विचक्षण। चित्रं देवानामुदगादनीकं चक्षुर्मित्रस्य वरुणस्याग्नेः। आऽप्रा द्यावापृथिवी अन्तरिक्षं सूर्य आत्मा जगत्स्तस्थुषः (४७)

चा विश्वे देवा ऋतावृधं ऋतुभिर्हवनश्रुतः। जुषन्तां युज्यम्पयः। विश्वे देवाः शृणुतेमं हवाम्मे ये अन्तरिक्षे य उप द्यवि ष्ठा। ये अग्निजिह्वा उत वा यजत्रा आसद्यास्मिन्बर्हिषि मादयध्वम् (४८)

तदीशानमद्रिस्तस्थुषस्त्रिंशच्च॥ [१४]

विश्वरूपस्त्वष्ट्रेन्द्रं वृत्रम्ब्रह्मादिनः स त्वे नासौमयाज्येष वै देवस्थो देवा वै नर्चि नायज्ञोऽग्ने महाग्निर्वीतमायुष्टे द्वादश॥—[१५][विश्वरूपो नैनं शीतरूरावद्य वसुं पूर्वद्युर्वाजा इत्यग्ने महान्निर्वीतमन्या यन्ति चतुःसप्ततिः॥७४॥ विश्वरूपोऽनु ते दायि॥]

॥पञ्चमः प्रश्नः॥

॥तैत्तिरीयसंहितायां द्वितीयकाण्डे पञ्चमः प्रश्नः॥

विश्वरूपो वै त्वाष्ट्रः पुरोहितो देवानामासीत्स्वस्रीयोऽसुराणान्तस्य त्रीणि शीर्षाण्यांसन्थोमपानं सुरापानमन्नादनं स प्रत्यक्षं देवेभ्यो भागमवदत्परोक्षमसुरेभ्यः सर्वस्मै वै प्रत्यक्षं भागं वदन्ति यस्मा एव परोक्षं वदन्ति तस्य भाग उदितस्तस्मादिन्द्रोऽविभेदीदृङ्क्ते राष्ट्रं वि पर्यावर्तयतीति तस्य वज्रमादाय शीर्षाण्यच्छिनद्यत्सोमपानम् (१)

आसीत्स कपिञ्जलोऽभवद्यत्सुरापानं स कलविङ्को यदन्नादनं स तित्तिरिस्तस्याञ्जलिना ब्रह्महत्यामुपागृह्णात्ता संवत्सरमभिभस्तम्भूतान्यभ्यक्रोशन्नब्रह्महन्ति स पृथिवीमुपासीददस्यै ब्रह्महत्यायै तृतीयं प्रति गृह्णाणेति साब्रवीद्वरं वृणै खातात्पराभविष्यन्ती मन्ये ततो मा परा भूवमिति पुरा तै (२)

संवत्सरादपि रोहादित्यब्रवीत्तस्मात्पुरा संवत्सरात्पृथिव्यै खातमपि रोहति वारंवृतुः
 ह्यस्यै तृतीयं ब्रह्महत्यायै प्रत्यंगृह्णात्तत्स्वकृतमिरिणमभवत्तस्मादाहिताग्निः श्रद्धादेवः स्वकृत
 इरिणे नावं स्येद्ब्रह्महत्यायै ह्येष वर्णः स वनस्पतीनुपासीददस्यै ब्रह्महत्यायै तृतीयं प्रति
 गृहीतेति तैऽब्रुवन्वरं वृणामहे वृक्णात् (३)

पुराभविष्यन्तो मन्यामहे ततो मा परा भूमेत्याब्रश्चनाद्भो भूयांस
 उत्तिष्ठानित्यब्रवीत्तस्मादाब्रश्चनाद्वृक्षाणाम्भूयांस उत्तिष्ठन्ति वारंवृतुः ह्येषान्तृतीयं ब्रह्महत्यायै
 प्रत्यंगृह्णन्स निर्यासोऽभवत्तस्मान्निर्यासस्य नाशयं ब्रह्महत्यायै ह्येष वर्णोऽथो खलु य एव
 लोहितो यो वाऽऽब्रश्चनान्निर्येषति तस्य नाशयम् (४)

काममन्यस्य स स्त्रीषंसादमुपासीददस्यै ब्रह्महत्यायै तृतीयं प्रति गृहीतेति
 ता अब्रुवन्वरं वृणामहा ऋत्विधात्प्रजां विन्दामहे काममा विजनितोः सम्भवामेति
 तस्मादृत्विधात्स्त्रियः प्रजां विन्दन्ते काममा विजनितोः सम्भवन्ति वारंवृतुः ह्यासान्तृतीयं
 ब्रह्महत्यायै प्रत्यंगृह्णन्सा मलंवद्वासा अभवत्तस्मान्मलंवद्वाससा न सं वदेत (५)

न सहासीत् नास्या अन्नमद्याद्ब्रह्महत्यायै ह्येषा वर्णं प्रतिमुच्यास्तेऽथो खत्वाहुरभ्यञ्जनं
 वाव स्त्रिया अन्नमभ्यञ्जनमेव न प्रतिगृह्यं काममन्यदिति याम्मलंवद्वाससः सम्भवन्ति
 यस्ततो जायते सोऽभिश्स्तो यामरण्ये तस्यै स्तेनो यां पराचीं तस्यै हीतमुख्यपगल्भो
 या स्नाति तस्यां अप्सु मारुको या (६)

अभ्यङ्गे तस्यै दुश्कर्मा या प्रलिखते तस्यै खलतिरपमारी याऽऽङ्गे तस्यै काणो या
 दतो धावते तस्यै श्यावदन् या नखानि निकृन्तते तस्यै कुन्खी या कृणत्ति तस्यै
 क्लीबो या रञ्जुः सृजति तस्यां उद्वन्धुको या पर्णेन पिबति तस्यां उन्मादुको या खर्वेण
 पिबति तस्यै खर्वस्तिस्त्रो रात्रीर्व्रतं चरेदञ्जलिनां वा पिबेदखर्वेण वा पात्रेण प्रजायै
 गोपीथाय॥ (७)

यथ्सोमपानन्ते वृक्णात्तस्य नाशयं वदेत मारुको याऽखर्वेण वा त्रीणि च॥ [१]

त्वष्टा हतपुत्रो वीन्द्रः सोममाहरत्तस्मिन्निन्द्रं उपह्वमैच्छत् तं नोपाह्वयत् पुत्रम्मे-
 ऽवधीरिति स यज्ञवेशसं कृत्वा प्रासहा सोममपिबत्तस्य यदत्यशिष्यत् तत्त्वष्टाहवनीयमुप
 प्रावर्तयत्स्वाहेन्द्रशत्रुर्वधस्वेति यदवर्तयत्तद्वृत्रस्य वृत्रत्वं यदब्रवीत्स्वाहेन्द्रशत्रुर्वधस्वेति
 तस्मादस्य (८)

इन्द्रः शत्रुरभवत्स सम्भवन्नग्नीषोमावभि समभवत्स इषुमात्रमिषुमात्रं विष्वङ्बुवर्धत
स इमाल्लौकानवृणोद् यदिमाल्लौकानवृणोत्तद्वृत्रस्य वृत्रत्वन्तस्मादिन्द्रोऽविभेत्स
प्रजापतिमुपाधावच्छत्रुर्मेऽजनीति तस्मै वज्रं सिक्त्वा प्रायच्छदेतेन जहीति तेनाभ्यायत
तावंब्रूतामग्नीषोमौ मा (१)

प्र हारावमन्तः स्व इति मम वै युवः स्थ इत्यब्रवीन्मामभ्येतमिति तौ
भागधेयमैच्छेतान्ताभ्यामेतमग्नीषोमीयमेकादशकपालम्पूर्णमासे प्रायच्छत्तावंब्रूतामभि सन्दद्यौ
वै स्वो न शक्नुव ऐतुमिति स इन्द्र आत्मनः शीतरूरावजनयत्तच्छीतरूरयोर्जन्म य
एवः शीतरूरयोर्जन्म वेदं (१०)

नैनः शीतरूरौ हतस्ताभ्यामेनमभ्यनयत्तस्माञ्ज्जभ्यमानादग्नीषोमौ निरक्रामतां प्राणापानौ
वा एनं तदजहिताम् प्राणो वै दक्षोऽपानः क्रतुस्तस्माञ्ज्जभ्यमानो ब्रूयान्मयि दक्षक्रतु
इति प्राणापानावेवात्मन्धत्ते सर्वमायुरेति स देवता वृत्रान्निरहूय वार्त्रघ्नः हविः पूर्णमासे
निरवपद्दन्ति वा एनम्पूर्णमास आ (११)

अमावास्यायाम्याययन्ति तस्माद्वात्रघ्नी पूर्णमासेऽनूच्येते वृधन्वती अमावास्यायान्तथ्सुस्था
वार्त्रघ्नः हविर्वज्रमादाय पुनरभ्यायत ते अब्रूतान्द्यावापृथिवी मा प्र हारावयोर्वै श्रित
इति ते अब्रूतां वरं वृणावहे नक्षत्रविहिताऽहमसानीत्युसावब्रवीच्चित्रविहिता-
ऽहमितीयन्तस्मान्नक्षत्रविहिताऽसौ चित्रविहितेयं य एवं द्यावापृथिव्योः (१२)

वरं वेदेनं वरो गच्छति स आभ्यामेव प्रसूत इन्द्रो वृत्रमहन्ते देवा वृत्रः हत्वा-
ऽग्नीषोमावब्रुवन्हुयं नो वहतमिति तावंब्रूतामपतेजसौ वै त्यौ वृत्रे वै त्ययोस्तेज इति
तैऽब्रुवन्क इदमच्छेतीति गौरित्यब्रुवन्नौर्वाव सर्वस्य मित्रमिति साऽब्रवीत् (१३)

वरं वृणै मय्येव सतोभयेन भुनजाध्वा इति तद्गौराहरत्तस्माद्गवि सतोभयेन भुञ्जत
एतद्वा अग्नेस्तेजो यद्धृतमेतत्सोमस्य यत्पयो य एवमग्नीषोमयोस्तेजो वेदं तेजस्व्यैव
भवति ब्रह्मवादिनो वदन्ति किन्देवत्यम्पूर्णमासमिति प्राजापत्यमिति ब्रूयत्तेनेन्द्र ज्येष्ठम्पुत्रं
निरवासाययदिति तस्माज्ज्येष्ठम्पुत्रं धनेन निरवासाययन्ति॥ (१४)

अस्य मा वेदा द्यावापृथिव्योरब्रवीदिति तस्माच्चत्वारि च॥ [२]

इन्द्रं वृत्रं जग्निवाः सम्मृधोऽभि प्रावैपन्त स एतं वैमृधम्पूर्णमासेऽनुनिर्वाप्यमपश्यन्तं

निरवपत्तेन वै स मृधोऽपाहृत यद्वैमृधः पूर्णमासेऽनुनिर्वाप्यो भवति मृध एव तेन यजमानोऽप हृत इन्द्रो वृत्रं हत्वा देवताभिश्चेन्द्रियेण च व्याध्यत स एतमग्नेयमष्टाकपालममावास्यायामपश्यदैन्द्रं दधि (१५)

तं निरवपत्तेन वै स देवताश्चेन्द्रियं चावारुन्ध यदाग्नेयोऽष्टाकपालोऽमावास्यायाम्भवत्येन्द्रं दधि देवताश्चैव तेनैन्द्रियं च यजमानोऽव रुन्ध इन्द्रस्य वृत्रं जघ्रुष इन्द्रियं वीर्यं पृथिवीमनु व्याच्छुत्तदोषधयो वीरुधोऽभवन्त्स प्रजापतिमुपाधावद्वृत्रं मे जघ्रुष इन्द्रियं वीर्यम् (१६)

पृथिवीमनु व्यारुत्तदोषधयो वीरुधोऽभूवन्निति स प्रजापतिः पशूनब्रवीदेतदस्मै सं नयतेति तत्पशव ओषधीभ्योऽध्यात्मन्समनयन्तत्प्रत्यदुहन् यत्समनयन्तत्सान्नाय्यस्य सान्नाय्यत्वं यत्प्रत्यदुहन्तत्प्रतिधुषः प्रतिधुक्च समनैषुः प्रत्यधुक्च तु मयि श्रयत इत्यब्रवीदेतदस्मै (१७)

शृतं कुरुतेत्यब्रवीत्तदस्मै शृतमकुर्वन्निन्द्रियं वावास्मिन्वीर्यं तदश्रयन्तच्छृतस्य शृतत्वं समनैषुः प्रत्यधुक्छृतमक्रुन्न तु मा धिनोतीत्यब्रवीदेतदस्मै दधि कुरुतेत्यब्रवीत्तदस्मै दध्यकुर्वन्तदेनमधिनोत्तद्दध्नो दधित्वं ब्रह्मवादिनो वदन्ति दध्नः पूर्वस्यावदेयम् (१८)

दधि हि पूर्वं क्रियत इत्यनादृत्य तच्छृतस्यैव पूर्वस्याव चेदिन्द्रियमेवास्मिन्वीर्यं श्रित्वा दध्नोपरिष्ठाद्धिनोति यथापूर्वमुपैति यत्पृतीकैर्वा पर्णवल्कैर्वातुष्ट्यात्सौम्यं तद्यत्कलै राक्षसं तद्यत्तण्डुलैर्वैश्वदेवं तद्यदातश्चनेन मानुषं तद्यद्दध्ना तथ्येन्द्रं दध्ना तनक्ति (१९)

सेन्द्रत्वायाग्निहोत्रोच्छेषणमभ्यातनक्ति यज्ञस्य सन्तत्या इन्द्रो वृत्रं हत्वा परा परावर्तमगच्छदपाराधमिति मन्यमानस्तं देवताः प्रैषमैच्छन्त्सोऽब्रवीत्प्रजापतिर्यः प्रथमोऽनुविन्दति तस्य प्रथमम्भागधेयमिति तम्पितरोऽन्विन्दन्तस्मात्पितृभ्यः पूर्वद्युः क्रियते सोऽमावास्यां प्रत्यागच्छुत्तं देवा अभि समगच्छन्तामा वै नः (२०)

अद्य वसु वसतीतीन्द्रो हि देवानां वसु तदमावास्याया अमावास्यत्वं ब्रह्मवादिनो वदन्ति किन्देवत्यं सान्नाय्यमिति वैश्वदेवमिति ब्रूयाद्विश्वे हि तद्देवा भागधेयमभि समगच्छन्तेत्यथो खल्वैन्द्रमित्येव ब्रूयादिन्द्रं वाव ते तद्विषज्यन्तोऽभि समगच्छन्तेति॥ (२१)

दधि मे जघ्रुष इन्द्रियं वीर्यमित्यब्रवीदेतदस्मा अवदेयन्तनक्ति नो द्विचत्वारिंशच्च॥—[३]

ब्रह्मवादिनो वदन्ति स त्वे दर्शपूर्णमासौ यजेत य एनौ सेन्द्रौ यजेतेति वैमृधः

पूर्णमासेऽनुनिर्वाप्यो भवति तेन पूर्णमासः सेन्द्रं ऐन्द्रं दध्यमावास्यायां तेनामावास्यां सेन्द्रा य एवं विद्वान्दर्शपूर्णमासौ यजते सेन्द्राविवैनौ यजते श्वःश्वोऽस्मा ईजानाय वसीयो भवति देवा वै यद्यज्ञेऽकुर्वत तदसुरा अकुर्वत ते देवा एताम् (२२)

इष्टिमपश्यन्नाग्रावैष्णवमेकादशकपालं सरस्वत्यै चरुं सरस्वते चरुं ताम्पौर्णमासं सऽऽस्थाप्यानु निर्वपन्ततो देवा अभवन्परासुरा यो भ्रातृव्यवान्थस्याथ्स पौर्णमासं सऽऽस्थाप्यैतामिष्टिमु निर्वपेत्पौर्णमासेनैव वज्रमभ्रातृव्याय प्रहृत्याग्रावैष्णवेन देवतांश्च यज्ञं च भ्रातृव्यस्य वृद्धे मिथुनान्पशून्त्सारस्वताभ्यां यावदेवास्यास्ति तत् (२३)

सर्वं वृद्धे पौर्णमासीमेव यजेत भ्रातृव्यवान्नामावास्यां हत्वा भ्रातृव्यं ना प्याययति साकम्प्रस्थायीयेन यजेत पशुकामो यस्मै वा अल्पेनाहरन्ति नात्मना तृप्यति नान्यस्मै ददाति यस्मै महता तृप्यत्यात्मना ददात्यन्यस्मै महता पूर्णं होतृव्यन्तुप्त एवैनमिन्द्रः प्रजयां पशुभिस्तर्पयति दारुपात्रेण जुहोति न हि मृन्मयमाहुतिमान्श औदुम्बरम् (२४)

भूवत्यूर्वा उदुम्बर ऊर्कपशवं ऊर्जेवास्मा ऊर्जं पशूनं रुद्धे नागतश्रीमहेन्द्रं यजेत त्रयो वै गतश्रियः शुश्रुवान्ग्रामिणी राजन्यस्तेषाम्महेन्द्रो देवता यो वै स्वां देवतामति यजते प्र स्वायै देवतायै च्यवते न पराम्प्राप्नोति पापीयान्भवति संवत्सरमिन्द्रं यजेत संवत्सरं हि व्रतं नाति स्वा (२५)

एवैनं देवतेज्यमाना भूत्या इद्धे वसीयान्भवति संवत्सरस्यं प्रस्तादग्नये व्रतपतये पुरोडाशमष्टाकपालं निर्वपेत्संवत्सरमेवैनं वृत्रं जघ्निवांसमग्निव्रतपतिव्रतमा लम्भयति ततोऽधि कामं यजेत॥ (२६)

एतान्तदौदुम्बरं स्वा त्रिंशच्च॥ [४]

नासौमयाजी सं नयेदनागतं वा एतस्य पयो योऽसौमयाजी यदसौमयाजी संनयेत्परिमोष एव सोऽनृतं करोत्यथो परैव सिंच्यते सोमयाज्यैव सं नयेत्पयो वै सोमः पयः सान्नाय्यम्पयसैव पयं आत्मन्ते वि वा एतम्प्रजयां पशुभिरर्धयति वर्धयत्यस्य भ्रातृव्यं यस्य हविर्निरुप्तपुरस्ताच्चन्द्रमाः (२७)

अभ्युदेति त्रेधा तण्डुलान् वि भजेद्ये मध्यमाः स्युस्तान्ग्नये दात्रे पुरोडाशमष्टाकपालं कुर्याद्ये स्थविष्ठास्तानिन्द्राय प्रदात्रे दधंश्चरुं येऽणिष्ठास्तान् विष्णावे शिपिविष्टाय शृते

चरुमग्निरेवासमै प्रजाम्प्रजनयति वृद्धामिन्द्रः प्र यच्छति यज्ञो वै विष्णुः पशवः शिपिर्यज्ञ एव पशुषु प्रति तिष्ठति न द्वे (२८)

यजेत यत्पूर्वया सम्प्रति यजेतोत्तरया छम्बर्कुर्याद्यदुत्तरया सम्प्रति यजेत पूर्वया छम्बर्कुर्यान्नेष्टिर्भवति न यज्ञस्तदनु हीतमुख्यपगल्भो जायत एकामेव यजेत प्रगल्भोऽस्य जायतेऽनादृत्य तद्वै एव यजेत यज्ञमुखमेव पूर्वयालभते यजत उत्तरया देवता एव पूर्वयारुन्ध इन्द्रियमुत्तरया देवलोकमेव (२९)

पूर्वयाभिजयति मनुष्यलोकमुत्तरया भूयंसो यज्ञक्रतूनुपैत्येषा वै सुमना नामेष्टिर्यमद्येजानम्यश्वाच्चन्द्रमा अभ्युदेत्यस्मिन्नेवासमै लोकेऽर्धुकम्भवति दाक्षायणयज्ञेन सुवर्गकामो यजेत पूर्णमासे सं नयेन्मैत्रावरुण्याऽऽमिक्षयामावास्यायां यजेत पूर्णमासे वै देवानां सुतस्तेषामेतमर्धमासम्प्रसुतस्तेषाम्मैत्रावरुणी वशामावास्यायामनूबन्ध्या यत् (३०)

पूर्वेद्युर्यजते वेदिमेव तत्करोति यद्वत्शानपाकरोति सदोहविधाने एव सम्मिनोति यद्यजते देवैरेव सुत्यां सम्पादयति स एतमर्धमासं संधमाद देवैः सोमंम्पिबति यन्मैत्रावरुण्यामिक्षयामावास्यायां यजते यैवासौ देवानां वशानूबन्ध्या सो एवैषेतस्य साक्षाद्वा एष देवानभ्यारोहति य एषां यज्ञम् (३१)

अभ्यारोहति यथा खलु वै श्रेयानभ्यारूढः कामयते तथा करोति यद्यवविध्यति पापीयान्भवति यदि नावविध्यति सदृष्ट्वावृत्काम एतेन यज्ञेन यजेत क्षुरपविर्ह्येष यज्ञस्ताजकपुण्यो वा भवति प्र वा मीयते तस्यैतद्वतं नानृतं वदेन्न मांसमश्रीयान्न स्त्रियमुपैयान्नास्य पल्पूलनेन वासः पल्पूलयेयुरेतद्धि देवाः सर्वं न कुर्वन्ति॥ (३२)

चन्द्रमा द्वे देवलोकमेव यद्यज्ञं पल्पूलयेयुः षट्॥ [५]

एष वै देवस्थो यदंशपूर्णमासौ यो दंशपूर्णमासाविष्टा सोमेन यजते रथस्पष्ट एवावसाने वरं देवानामव स्यत्येतानि वा अङ्गापरूषि संवत्सरस्य यदंशपूर्णमासौ य एवं विद्वान्दंशपूर्णमासौ यजतेऽङ्गापरूष्येव संवत्सरस्य प्रति दधात्येते वै संवत्सरस्य चक्षुषी यदंशपूर्णमासौ य एवं विद्वान्दंशपूर्णमासौ यजते ताभ्यामेव सुवर्गं लोकमनु पश्यति (३३)

एषा वै देवानां विक्रान्तिर्यद्वर्शपूर्णमासौ य एवं विद्वान्दर्शपूर्णमासौ यजते देवानामेव विक्रान्तिमनु वि क्रमत एष वै देवयानः पन्था यद्वर्शपूर्णमासौ य एवं विद्वान्दर्शपूर्णमासौ यजते य एव देवयानः पन्थास्तः समारोहत्येतौ वै देवानाः हरी यद्वर्शपूर्णमासौ य एवं विद्वान्दर्शपूर्णमासौ यजते यावेव देवानाः हरी ताभ्याम् (३४)

एवैभ्यो हव्यं वहत्येतद्वै देवानामास्यं यद्वर्शपूर्णमासौ य एवं विद्वान्दर्शपूर्णमासौ यजते साक्षादेव देवानामास्यं जुहोत्येष वै हविर्धानी यो दर्शपूर्णमासयाजी सायम्प्रातरग्निहोत्रं जुहोति यजते दर्शपूर्णमासावहरहरहविर्धानिनाः सुतो य एवं विद्वान्दर्शपूर्णमासौ यजते हविर्धान्यस्मीति सर्वमेवास्यं बरहिष्यं दत्तम्भवति देवा वा अहः (३५)

यज्ञियं नाविन्दन्ते दर्शपूर्णमासावपुनन्तौ वा एतौ पूतौ मेध्यौ यद्वर्शपूर्णमासौ य एवं विद्वान्दर्शपूर्णमासौ यजते पूतावेवैनौ मेध्यौ यजते नामावास्यायां च पौर्णमास्यां च स्त्रियमुपेयाद्यदुपेयान्निरिन्द्रियः स्यात्थोमस्य वै राज्ञोऽर्धमासस्य रात्रयः पत्नय आसन्तासाममावास्यां च पौर्णमासीं च नोपैत् (३६)

ते एनम्भि समनह्येतान्तं यक्ष्मं आर्च्छुद्राजानं यक्ष्मं आरदिति तद्राजयक्ष्मस्य जन्म यत्पार्षीयानभवत्तत्पापयक्ष्मस्य यज्ञाभ्यामविन्दत्तज्ञायेन्यस्य य एवमेतेषां यक्ष्माणां जन्म वेद नैनमेते यक्ष्मा विन्दन्ति स एते एव नमस्यन्नुपाधावत्ते अब्रूतां वरं वृणावहा आवं देवानां भागधे अंसाव (३७)

आवदधि देवा इज्यान्ता इति तस्मात्सदृशीनाः रात्रीणाममावास्यायां च पौर्णमास्यां च देवा इज्यन्त एते हि देवानां भागधे भागधा अस्मै मनुष्या भवन्ति य एवं वेद भूतानि क्षुधमघ्नश्सद्यो मनुष्या अर्धमासे देवा मासि पितरः संवत्सरे वनस्पतयस्तस्मादहरहर्मनुष्या अशनमिच्छन्तेऽर्धमासे देवा इज्यन्ते मासि पितृभ्यः क्रियते संवत्सरे वनस्पतयः फलं गृह्णन्ति य एवं वेद हन्ति क्षुधम्प्रातृव्यम्॥ (३८)

पश्यति ताभ्यामहरैदसाव फलं सप्त च॥ [६]

देवा वै नर्वि न यजुष्यश्रयन्त ते सामन्नेवाश्रयन्त हिं करोति सामैवाकर्हिं करोति यत्रैव देवा अश्रयन्त तत् एवेनान्न युङ्क्ते हिं करोति वाच एवैष योगो हिं करोति प्रजा एव तद्यजमानः सृजते त्रिः प्रथमामन्वाह त्रिरुत्तमां यज्ञस्यैव तद्वत्सम् (३९)

नृहृत्यप्रसन्नं सायु सन्ततमन्वाह प्राणानामन्नाद्यस्य सन्तत्या अथो रक्षसामपंहृत्यै
राथंतरीम्प्रथमामन्वाह राथंतरो वा अयं लोक इममेव लोकमभि जयति त्रिवि गृह्णाति
त्रयं इमे लोका इमानेव लोकानभि जयति बारहतीमुत्तमामन्वाह बारहतो वा असौ
लोकौऽमुमेव लोकमभि जयति प्र वोः (४०)

वाजा इत्यनिरुक्ताम्प्राजापत्यामन्वाह यज्ञो वै प्रजापतिर्यज्ञमेव प्रजापतिमा रभते प्र
वो वाजा इत्यन्वाहान्नं वै वाजोऽन्नमेवाव रुद्धे प्र वो वाजा इत्यान्वाह तस्मात्प्राचीनं
रेतो धीयतेऽग्र आ याहि वीतय इत्याह तस्मात्प्रातीचीः प्रजा जायन्ते प्र वो वाजाः (४१)

इत्यन्वाह मासा वै वाजा अर्धमासा अभिद्यवो देवा हविष्मन्तो गौर्धृताची यज्ञो
देवाजिगाति यजमानः सुम्रयुरिदमसीदमसीत्येव यज्ञस्य प्रियं धामाव रुद्धे यं कामयेत्
सर्वमायुरियदिति प्र वो वाजा इति तस्यानूच्याग्र आ याहि वीतय इति सन्ततमुत्तरमर्धर्चमा
लभेत (४२)

प्राणेनैवास्यापानं दाधार सर्वमायुरेति यो वा अंरन्निः सामिधेनीनां वेदारत्नावेव भ्रातृव्यं
कुरुतेऽर्धर्चौ सं दधात्येष वा अंरन्निः सामिधेनीनां य एवं वेदारत्नावेव भ्रातृव्यं कुरुत
ऋषेर्ऋषेर्वा एता निर्मिता यत्सामिधेन्यस्ता यदसंयुक्ताः स्युः प्रजयां पशुभिर्यजमानस्य
वि तिष्ठेरन्नर्धर्चौ सन्दधाति सं युनक्त्येवैनास्ता अस्मै संयुक्ता अवरुद्धाः सर्वामाशिषं
दुहे (४३)

वृसं वो जायन्ते प्र वो वाजा लभेत दधाति सन्दशं च॥ [७]

अयं यज्ञो वा एष योऽसामाऽग्र आ याहि वीतय इत्याह रथन्तरस्येष वर्णस्तं
त्वां समिद्धिरङ्गिर इत्याह वामदेव्यस्येष वर्णो बृहदग्रे सुवीर्यमित्याह बृहत एष वर्णो
यदेतं तृचमन्वाह यज्ञमेव तत्सामन्वन्तं करोत्यग्निमुष्मिँल्लौक आसीदादित्योऽस्मिन्ताविमौ
लोकावशान्तौ (४४)

आस्तान्ते देवा अंब्रवन्तेमौ वि पर्यूहामेत्यग्र आ याहि वीतय इत्यस्मिँल्लौकै-
ऽग्निमदधुर्बृहदग्रे सुवीर्यमित्यमुष्मिँल्लौक आदित्यन्ततो वा इमौ लोकावशाम्यतां
यदेवमन्वाहानयोर्लोकयोः शान्त्यै शाम्यतोऽस्मा इमौ लोकौ य एवं वेद पञ्चदश
सामिधेनीरन्वाह पञ्चदश (४५)

वा अर्धमासस्य रात्रयोऽर्धमासशः संवत्सर औप्यते तासां त्रीणि च शतानि
षष्टिश्चाक्षराणि तावन्तीः संवत्सरस्य रात्रयोऽक्षरश एव संवत्सरमाप्नोति नृमेधश्च परुच्छेपश्च
ब्रह्मवाद्यमवदेतामस्मिन्दारावाद्भेदं जंनयाव यतरो नौ ब्रह्मीयानिति नृमेधोऽभ्यवदत्स
धूममजनयत्परुच्छेपोऽभ्यवदत्सोऽग्निमजनयदृष इत्यब्रवीत् (४६)

यथ्समावद्विद्व कथा त्वमग्निमजीजनो नाहमिति सामिधेनीनामेवाहं वर्णं
वेदेत्यब्रवीद्यद्वृतवत्पदमनूच्यते स आसां वर्णस्तं त्वां समिद्धिरङ्गिर इत्याह सामिधेनीष्वेव
तज्ज्योतिर्जंनयति स्त्रियस्तेन यद्वचः स्त्रियस्तेन यद्वायत्रियः स्त्रियस्तेन यथ्सामिधेन्यो
वृषण्वतीमन्वाह (४७)

तेन पुङ्ग्वस्तीस्तेन सेन्द्रास्तेन मिथुना अग्निर्देवानां दूत आसीदुशनां काव्यो-
ऽसुराणान्तौ प्रजापतिमश्रमैतां स प्रजापतिरग्निं दूतं वृणीमह इत्यभि पर्यावर्तत ततो
देवा अभवन्पुरासुरा यस्यैवं विदुषोऽग्निं दूतं वृणीमह इत्यन्वाह भवत्यात्मना परास्य
भ्रातृव्यो भवत्यध्वरवतीमन्वाह भ्रातृव्यमेवैतया (४८)

ध्वरति शोचिर्ष्वेकशस्तमीमह इत्याह पवित्रमेवैतद्यजमानमेवैतया पवयति समिद्धो अग्न
आहुतेत्याह परिधिमेवैतं परि दधात्यस्कन्दाय यदत ऊर्ध्वमभ्यादध्याद्यथा बहिःपरिधि
स्कन्दति तादृगेव तत्रयो वा अग्नयो हव्यवाहनो देवानां कव्यवाहनः पितृणां सहर्क्षा
असुराणान्त एतर्ह्या शंसन्ते मां वरिष्यते माम् (४९)

इति वृणीध्वं हव्यवाहनमित्याह य एव देवानां तं वृणीत आर्षेयं वृणीते
बन्धोरेव नैत्यथो सन्तत्यै परस्ताद्वाचो वृणीते तस्मात्परस्ताद्वाचो मनुष्यान्पितरोऽनु प्र
पिपते॥ (५०)

अशान्तावाह पञ्चदशाब्रवीदन्वाहेतया वरिष्यते मामेकान्नत्रिंशच्च॥ [८]

अग्ने मूहा असीत्याह महान् ह्येष यदग्निर्ब्राह्मणेत्याह ब्राह्मणो ह्येष भारतेत्याहैष
हि देवेभ्यो हव्यम्भरति देवेद्ध इत्याह देवा ह्येतमैन्धत् मन्विद्ध इत्याह मनुर्ह्येतमुत्तरो
देवेभ्य ऐन्द्रर्षिष्टुत इत्याहरषयो ह्येतमस्तुवन्विप्रानुमदित इत्याह (५१)

विप्रा ह्येते यच्छुश्रुवांसः कविशस्त इत्याह कवयो ह्येते यच्छुश्रुवांसो ब्रह्मसंशित
इत्याह ब्रह्मसंशितो ह्येष घृताहवन इत्याह घृताहुतिरहस्य प्रियतमा प्रणीर्यज्ञानमित्याह

प्रणीर्ह्येष यज्ञानां रथीरध्वराणामित्याहैष हि देवर्थोऽतूर्तो होतेत्याह न ह्येतं कश्चन (५२)

तरन्ति तूर्णिरह्यवाडित्याह सर्वं ह्येष तरत्यास्पात्रं जुहूर्देवानामित्याह जुहूर्ह्येष देवानांश्चमसो देवपान इत्याह चमसो ह्येष देवपानोऽरा इवाग्ने नेमिर्देवास्त्वं परिभूरसीत्याह देवान् ह्येष परिभूर्यद्रूयादा वह देवान्देवयते यजमानायेति भ्रातृव्यमस्मै (५३)

जनयेदा वह देवान् यजमानायेत्याह यजमानमेवैतेन वर्धयत्यग्निमग्न आ वह सोममा वहेत्याह देवता एव तद्यथापूर्वमुप ह्वयत आ चाग्ने देवान् वह सुयजा च यज जातवेद इत्याहाग्निमेव तत्स इत्येति सौऽस्य सशितो देवेभ्यो हव्यं वहत्यग्निर्होता (५४)

इत्याहाग्निर्वै देवानां होता य एव देवानां होता तं वृणीते स्मो वयमित्याहात्मानमेव सत्त्वं गमयति साधु ते यजमान देवतेत्याहाशिषमेवैतामा शास्ते यद्रूयाद्यौऽग्निं होतांरमवृथा इत्यग्निर्नोभयतो यजमानं परि गृह्णीयात् प्रमायुकः स्याद्यजमानदेवत्या वै जुहूर्भ्रातृव्यदेवत्योपभृत् (५)

यद्वे इव ब्रूयाद्भ्रातृव्यमस्मै जनयेद्धृतवतीमध्वर्यो सुचमास्यस्वेत्याह यजमानमेवैतेन वर्धयति देवायुवमित्याह देवान् ह्येषावति विश्ववारामित्याह विश्वं ह्येषावतीडामहै देवा इडेन्यान्नमस्यामं नमस्यान् यजाम यज्ञियानित्याह मनुष्या वा इडेन्याः पितरो नमस्या देवा यज्ञिया देवता एव तद्यथाभागं यजति॥ (५६)

विप्रानुमदित इत्याह चनास्मै होतोपभृद्देवता एव त्रीणि च॥ [९]

त्रीं स्तृचाननु ब्रूयाद्राजन्यस्य त्रयो वा अन्ये राजन्यात्पुरुषा ब्राह्मणो वैश्यः शूद्रस्तानेवास्मा अनुकान्करोति पञ्चदशानु ब्रूयाद्राजन्यस्य पञ्चदशो वै राजन्यः स्व एवेन स्तोमे प्रतिं छापयति त्रिष्टुभा परि दध्यादिन्द्रियं वै त्रिष्टुगिन्द्रियकामः खलु वै राजन्यो यजते त्रिष्टुभेवास्मा इन्द्रियं परि गृह्णाति यदि कामयेत (५७)

ब्रह्मवर्चसमस्त्विति गायत्रिया परि दध्याद्ब्रह्मवर्चसं वै गायत्री ब्रह्मवर्चसमेव भवति सप्तदशानु ब्रूयाद्वैश्यस्य सप्तदशो वै वैश्यः स्व एवेन स्तोमे प्रतिं छापयति जगत्या परि दध्याज्जागता वै पशवः पशुकामः खलु वै वैश्यो यजते जगत्यैवास्मै पशून्परि गृह्णात्येकविंशतिमनु ब्रूयात्प्रतिष्ठाकामस्यैकविंशः स्तोमानां प्रतिष्ठा प्रतिष्ठित्यै (५८)

चतुर्विंशतिमनु ब्रूयाद्ब्रह्मवर्चसकामस्य चतुर्विंशत्यक्षरा गायत्री गायत्री

ब्रह्मवर्चसङ्गायत्रियैवास्मै ब्रह्मवर्चसमव रुन्दे त्रिंशत्तमनु ब्रूयादन्नकामस्य त्रिंशदक्षरा
विराडन्न विराड्विराजैवास्मा अन्नाद्यमव रुन्दे द्वात्रिंशत्तमनु ब्रूयात्प्रतिष्ठाकामस्य
द्वात्रिंशदक्षरानुष्टुगनुष्टुप्छन्दसां प्रतिष्ठा प्रतिष्ठित्यै षट्त्रिंशत्तमनु ब्रूयात्पशुकामस्य
षट्त्रिंशदक्षरा बृहती बारहताः पशवो बृहत्यैवास्मै पशून् (५९)

अव रुन्दे चतुश्चत्वारिंशत्तमनु ब्रूयादिन्द्रियकामस्य चतुश्चत्वारिंशदक्षरा त्रिष्टुगिन्द्रियं
त्रिष्टुत्रिष्टुभैवास्मा इन्द्रियमव रुन्देऽष्टाचत्वारिंशत्तमनु ब्रूयात्पशुकामस्याष्टाचत्वारिंशदक्षरा
जगती जागताः पशवो जगत्यैवास्मै पशून्व रुन्दे सर्वाणि छन्दांस्यनु
ब्रूयाद्बहुयाजिनः सर्वाणि वा एतस्य छन्दांस्यवरुन्दानि यो बहुयाज्यपरिमितमनु
ब्रूयादपरिमितस्यावरुन्दौ ॥ (६०)

कामयेत् प्रतिष्ठित्यै पशून्ऽसप्तचत्वारिंशच्च ॥ [१०]

निर्वीतम्मनुष्याणाम्प्राचीनावीतम्पितृणामुपवीत देवानामुप व्ययते देवलक्षममेव तत्कुरुते
तिष्ठन्नन्वाह तिष्ठन् ह्याश्रुततरं वदति तिष्ठन्नन्वाह सुवर्गस्य लोकस्याभिजित्या आसीनो
यजत्यस्मिन्नेव लोके प्रति तिष्ठति यत्क्रोश्चमन्वाहासुरं तद्यन्मन्द्रम्मानुपं तद्यदन्तरा
तथ्सदेवमन्तरानूच्य सदेवत्वाय विद्वांसो वै (६१)

पुरा होतारोऽभूवन्तस्माद्विधृता अध्वानोऽभूवन्न पन्थानः समरुक्षन्नन्तर्वेद्यन्यः पादो भवति
बहिर्वेद्यन्योऽथान्वाहाध्वना विधृत्यै पथामसंरोहायाथो भूतं चैव भविष्यच्चाव रुन्देऽथो
परिमितं चैवापरिमितं चाव रुन्देऽथो ग्राम्याश्चैव पशून्ऽरण्याश्चाव रुन्देऽथो (६२)

देवलोके चैव मनुष्यलोके चाभि जयति देवा वै सामिधेनीरनूच्य यज्ञं नान्वपश्यन्ऽस
प्रजापतिस्तृष्णीमाधारमाधारयत्ततो वै देवा यज्ञमन्वपश्यन् यत्तृष्णीमाधारमाधारयति
यज्ञस्यानुख्यात्या अथो सामिधेनीरेवाभ्यनन्तद्यलूक्षो भवति य एवं वेदाथो
तर्पयत्येवैनास्तृप्यति प्रजया पशुभिः (६३)

य एवं वेद यदेकयाधारयेदेकां प्रीणीयाद्यद्वाभ्यां द्वे प्रीणीयाद्यत्तिसृभिरति तद्रैचयेन्मनसा
धारयति मनसा ह्यनसमाप्यते तिर्यश्चमा धारयत्यच्छम्बद्वारं वाक्च मनश्चार्तीयेतामहं देवेभ्यो
हव्यं वंहामीति वागंब्रवीदहं देवेभ्य इति मनस्तौ प्रजापतिम्प्रश्नमैतां सौऽब्रवीत् (६४)

प्रजापतिर्दूतीरेव त्वं मनसोऽसि यद्धि मनसा ध्यायति तद्वाचा वदतीति तत्खलु
तुभ्यं न वाचा जुहवन्नित्यंब्रवीत् तस्मान्मनसा प्रजापतये जुह्वति मन इव हि प्रजापतिः

प्रजापतेराप्त्यै परिधीन्सम्माष्टिं पुनात्येवैनान्त्रिर्मध्यमं त्रयो वै प्राणाः प्राणानेवाभि जयति
त्रिर्दक्षिणार्ध्यं त्रयः (६५)

इमे लोका इमानेव लोकानभि जयति त्रिरुत्तरार्ध्यं त्रयो वै देवयानाः पन्थानस्तानेवाभि
जयति त्रिरुपं वाजयति त्रयो वै देवलोका देवलोकानेवाभि जयति द्वादश सम्पद्यन्ते
द्वादश मासाः संवत्सरः संवत्सरमेव प्रीणात्यथो संवत्सरमेवास्मा उप दधाति सुवर्गस्य
लोकस्य समष्ट्या आघारमा घारयति तिर इव (६६)

वै सुवर्गो लोकः सुवर्गमेवास्मै लोकम्प रीयत्युजुमा घारयत्युजुरिव हि प्राणः
सन्ततमा घारयति प्राणानामन्नाद्यस्य सन्तत्या अथो रक्षसामपहत्यै यं कामयेत प्रमार्युकः
स्यादिति जिह्मं तस्या घारयेत्प्राणमेवास्माज्जिह्मं नयति ताजकप्र मीयते शिरो वा एतद्यज्ञस्य
यदाघार आत्मा ध्रुवा (६७)

आघारमाघार्य ध्रुवाः समनक्त्यात्मन्नेव यज्ञस्य शिरः प्रति दधात्यग्निर्देवानां दूत
आसीदेव्योऽसुराणान्तौ प्रजापतिम्प्रश्नमेताः स प्रजापतिर्ब्राह्मणमब्रवीदेतद्वि ब्रूहीत्या
श्रावयेतीदं देवाः शृणुतेति वाव तदब्रवीदग्निर्देवो होतेति य एव देवानां तमवृणीत ततो
देवाः (६८)

अभेवन्परांसुरा यस्यैवं विदुषः प्रवरम्प्रवृणते भवत्यात्मना परास्य भ्रातृव्यो
भवति यद्ब्राह्मणश्चाब्राह्मणश्च प्रश्नमेयातां ब्राह्मणायाधिं ब्रूयाद्यद्ब्राह्मणायाध्याहात्मनेऽध्याह्
यद्ब्राह्मणम्पराहात्मनं पराह तस्माद्ब्राह्मणो न परोच्यः॥ (६९)

वा आरण्याश्चाव रुन्धेऽथो पशुभिः सोऽब्रवीदक्षिणार्ध्यं त्रयं इव ध्रुवा देवाश्चत्वारिंशच्च॥[११]

आयुष्ट आयुर्दा अग्न आ प्यायस्व सं तेऽवं ते हेड उदुत्तमम्प णो देव्या नो
दिवोऽग्नाविष्णू अग्नाविष्णू इमं मे वरुण तत्त्वा याम्युदु त्यं चित्रम्। अपां नपादा
ह्यस्थादुपस्थं जिह्वानामूर्ध्वो विद्युतं वसानः। तस्य ज्येष्ठम्महिमानं वहन्तीरहिरण्यवर्णाः
परि यन्ति यद्हीः। सम् (७०)

अन्या यन्त्युप यन्त्यन्याः समानमूर्वं नद्यः पृणन्ति। तमू शुचिः शुचयो दीदिवाःसम्पां
नपातं परि तस्थुरापः। तमस्मेरा युवतयो युवानम्मर्मज्यमानाः परि यन्त्यापः। स शुक्लेण
शिकना रेवदग्निर्दीदायानिध्नो घृतनिर्णिगप्सु। इन्द्रावरुणयोरहः सम्राजोरव आ वृणे। ता

नो मृडात ईदृशौ। इन्द्रावरुणा युवमध्वराय नः (७१)

विशे जनाय महि शर्म यच्छतम्। दीर्घप्रयज्युमति यो वनुष्यति वयं जयेम पृतनासु
दूढः। आ नो मित्रावरुणा प्र बाहवा। त्वं नो अग्ने वरुणस्य विद्वां देवस्य हेडोऽवं
यासिसीष्ठाः। यजिष्ठो वह्नितमः शोशुचानो विश्वा द्वेषांसि प्र मुमुग्ध्यस्मत्। स त्वं नो
अग्नेऽवमो भवोती नेदिष्ठो अस्या उपसो व्युष्टौ। अवं यक्ष्व नो वरुणम् (७२)

रराणो वीहि मृडीकः सुहवो न एधि। प्रप्रायमग्निर्भरतस्य शृण्वे वि यथ्सूर्यो न
रोचते बृहद्वाः। अभि यः पूरु पृतनासु तस्थौ दीदाय दैव्यो अतिथिः शिवो नः। प्र
ते यक्षि प्र तं इयमि मन्म भुवो यथा वन्द्यो नो हवेषु। धन्वन्निव प्रपा असि त्वमग्न
इयक्ष्वे पूरवे प्रल राजन्। (७३)

वि पाजंसा वि ज्योतिषा। स त्वमग्ने प्रतीकेन प्रत्योष यातुधान्यः। उरुक्षयेषु दीद्यत।
तः सुप्रतीकः सुदृशः स्वश्चमविद्वांसो विदुष्टरः सपेमा। स यक्षद्विष्वा वयुनानि
विद्वान्प्र हव्यमग्निर्मृतेषु वोचत्। अहोमुचं विवेष यन्मा वि न इन्द्रेन्द्र क्षत्रमिन्द्रियाणि
शतक्रतोऽनु ते दायि (७४)

युहीः समध्वराय नो वरुणः राजः श्रतुश्चत्वारिंशच्च॥ [१२]

[समिधश्चक्षुषी प्रजापतिराज्यं देवस्य स्फघम्ब्रह्मवादिनोऽद्विरेण्यो मनः पृथिव्याः
पशवोऽग्निर्धे देवा वै यज्ञस्य युक्ष्वोशन्तस्त्वा द्वादश]

॥षष्ठमः प्रश्नः॥

॥तैत्तिरीयसंहितायां द्वितीयकाण्डे षष्ठमः प्रश्नः॥

समिधो यजति वसन्तमेवर्तुनामवं रुन्दे तनूनपातं यजति ग्रीष्ममेवावं रुन्दे इडो
यजति वर्षा एवावं रुन्दे बर्हिर्यजति शरदमेवावं रुन्दे स्वाहाकारं यजति हेमन्तमेवावं
रुन्दे तस्मात्स्वाहाकृता हेमन्त्यशवोऽवं सीदन्ति समिधो यजत्युषसं एव देवतानामवं रुन्दे
तनूनपातं यजति यज्ञमेवावं रुन्दे (१)

इडो यजति पशूमेवावं रुन्दे बर्हिर्यजति प्रजामेवावं रुन्दे समानयत उपभृतस्तेजो

वा आज्यं प्रजा बर्हिः प्रजास्वेव तेजो दधाति स्वाहाकारं यंजति वाचमेवाव रुद्धे दश सम्पद्यन्ते दशाक्षरा विराड्विराजैवान्नाद्यमव रुद्धे समिधो यजत्यस्मिन्नेव लोके प्रति तिष्ठति तनूनपातं यजति (२)

यज्ञ एवान्तरिक्षे प्रति तिष्ठतीडो यंजति पशुष्वेव प्रति तिष्ठति बर्हिर्यजति य एव देवयानाः पन्थानस्तेष्वेव प्रति तिष्ठति स्वाहाकारं यंजति सुवर्ण एव लोके प्रति तिष्ठत्येतावन्तो वै देवलोकास्तेष्वेव यथापूर्वं प्रति तिष्ठति देवासुरा एषु लोकेष्वस्पर्धन्त ते देवाः प्रयाजैरेभ्यो लोकेभ्योऽसुरान्प्राणुदन्त तत्प्रयाजानाम् (३)

प्रयाजत्वं यस्येवं विदुषः प्रयाजा इज्यन्ते प्रैभ्यो लोकेभ्यो भ्रातृव्यान्नुदतेऽभिक्रामं जुहोत्यभिजित्यै यो वै प्रयाजानाम्मिथुनं वेद प्र प्रजयां पशुभिर्मिथुनैर्जायते समिधो बर्हीरिव यजति तनूनपातमेकमिव मिथुनं तदिडो बर्हीरिव यजति बर्हिरेकमिव मिथुनं तदेतद्वै प्रयाजानाम्मिथुनम् य एवं वेद प्र (४)

प्रजयां पशुभिर्मिथुनैर्जायते देवानां वा अनिष्टा देवता आसन्नथासुरा यज्ञमंजिघांसन्ते देवा गायत्रीं व्यौहन् पश्चाक्षराणि प्राचीनानि त्रीणि प्रतीचीनानि ततो वर्म यज्ञायाम्बद्धर्म यजमानाय यत्प्रयाजानूयाजा इज्यन्ते वर्मेव तद्यज्ञाय क्रियते वर्म यजमानाय भ्रातृव्याभिभूत्यै तस्माद्वरूथम्पुरस्ताद्वर्षीयः पश्चाद्वर्षीयो देवा वै पुरा रक्षोभ्यः (५)

इति स्वाहाकारेण प्रयाजेषु यज्ञः सऽऽस्थाप्यमपश्यन्तः स्वाहाकारेण प्रयाजेषु समंस्थापयन्ति वा एतद्यज्ञं छिन्दन्ति यथस्वाहाकारेण प्रयाजेषु सऽऽस्थापयन्ति प्रयाजानिद्धा हवीःष्यभि घारयति यज्ञस्य सन्तत्या अथो हविरैवाकरथो यथापूर्वमुपैति पिता वै प्रयाजाः प्रजानूयाजा यत्प्रयाजानिद्धा हवीःष्यभिघारयति पितैव तत्पुत्रेण साधारणम् (६)

कुरुते तस्मादाहुयश्चैवं वेद यश्च न कथा पुत्रस्य केवलं कथा साधारणम्पितुरित्यस्कन्नमेव तद्यत्प्रयाजेष्विष्टेषु स्कन्दति गायत्र्यैव तेन गर्भं धत्ते सा प्रजां पशून् यजमानाय प्र जनयति॥ (७)

यजति यज्ञमेवावरुन्धे तनूनपातं यजति प्रयाजानामेवं वेद प्र रक्षोभ्यः साधारणं पञ्चत्रिंशच्च॥

चक्षुषी वा एते यज्ञस्य यदाज्यभागौ यदाज्यभागौ यजति चक्षुषी एव तद्यज्ञस्य प्रति

दधाति पूर्वार्धं जुहोति तस्मात्पूर्वार्धं चक्षुषी प्रबाहुं जुहोति तस्मात्प्रबाहुकक्षुषी देवलोकं वा अग्निना यजमानोऽनु पश्यति पितृलोकं सोमैर्नोत्तरार्धेऽग्नये जुहोति दक्षिणार्धं सोमायैवमिव हीमौ लोकावनयोर्लोकयोरनुख्यात्यै राजानौ वा एतौ देवतानाम् (८)

यदग्नीषोमावन्तरा देवता इज्येते देवतानां विधृत्यै तस्माद्वाज्ञा मनुष्या विधृता ब्रह्मवादिनो वदन्ति किं तद्यज्ञे यजमानः कुरुते येनान्यतोदतश्च पशून्दाधारोभयतोदतश्चेत्यृचमनूच्याज्यभागस्य जुषाणेन यजति तेनान्यतोदतो दाधारर्चमनूच्यं हविषं ऋचा यजति तेनोभयतोदतो दाधार मूर्धन्वर्ती पुरोनुवाक्या भवति मूर्धानमेवैनं समानानां करोति (९)

नियुत्वत्या यजति भ्रातृव्यस्यैव पशून्नि युवते केशिनं ह दार्भ्यं केशी सात्यकामिरुवाच सप्तपदां ते शक्नोति श्वो यज्ञे प्रयोक्तासे यस्यै वीर्येण प्र जातान्भ्रातृव्यान्नुदते प्रतिं जनिष्यमाणान् यस्यै वीर्येणोभयोर्लोकयोर्ज्योतिर्धत्ते यस्यै वीर्येण पूर्वार्धेनान्द्वान्भुनक्ति जघनार्धेन धेनुरिति पुरस्ताल्लक्ष्मा पुरोनुवाक्या भवति जातानेव भ्रातृव्यान्प्र पुंदत उपरिष्ठाल्लक्ष्मा (१०)

याज्यां जनिष्यमाणानेव प्रतिं नुदते पुरस्ताल्लक्ष्मा पुरोनुवाक्या भवत्यस्मिन्नेव लोके ज्योतिर्धत्त उपरिष्ठाल्लक्ष्मा याज्यामुष्मिन्नेव लोके ज्योतिर्धत्ते ज्योतिष्मन्तावस्मा इमौ लोकौ भवतो य एवं वेद पुरस्ताल्लक्ष्मा पुरोनुवाक्या भवति तस्मात्पूर्वार्धेनान्द्वान्भुनक्त्युपरिष्ठाल्लक्ष्मा याज्यां तस्माज्जघनार्धेन धेनुर्य एवं वेद भुङ्क्ते एनमेतौ वज्र आज्यं वज्र आज्यभागौ (११)

वज्रो वषट्कारस्त्रिवृतमेव वज्रं सम्भृत्य भ्रातृव्याय प्र हर्त्यलम्बद्वारमपगूर्य वषट्करोति स्तृत्यै गायत्री पुरोनुवाक्या भवति त्रिष्टुग्याज्यां ब्रह्मन्नेव क्षत्रमन्वारम्भयति तस्माद्वाह्मणो मुख्यो मुख्यो भवति य एवं वेद प्रैवैनं पुरोनुवाक्ययाह प्र णयति याज्यया गमयति वषट्कारेणैवैनं पुरोनुवाक्यया दत्ते प्र यच्छति याज्यया प्रतिं (१२)

वषट्कारेण स्थापयति त्रिपदां पुरोनुवाक्या भवति त्रयं इमे लोका एष्वेव लोकेषु प्रतिं तिष्ठति चतुष्पदा याज्यां चतुष्पद एव पशूनव रुद्धे द्व्यक्षरो वषट्कारो द्विपाद्यजमानः पशुष्वेवोपरिष्ठात्प्रतिं तिष्ठति गायत्री पुरोनुवाक्या भवति त्रिष्टुग्याज्यैषा वै सप्तपदा शक्नोति यद्वा एतया देवा अशिक्षन्तदशक्नुवन् य एवं वेद शक्नोत्येव यच्छिक्षति॥ (१३)

देवतानाङ्कुरेत्युपरिष्ठाद्विष्णुमाऽऽज्यभागो प्रति शक्रोत्येव द्वे च॥ [२]

प्रजापतिर्देवेभ्यो यज्ञान्व्यादिशत्स आत्मन्नाज्यमधत्त तं देवा अब्रुवन्नेष वाव यज्ञो यदाज्यमप्येव नोत्रास्त्विति सौऽब्रवीद्यजान् व आज्यभागवुप स्तृणानभि घारयानिति तस्माद्यजन्त्याज्यभागवुप स्तृणन्त्यभि घारयन्ति ब्रह्मवादिनो वदन्ति कस्मात्सत्याद्यातयामान्यन्यानि हवीःष्ययातयामाज्यमिति प्राजापत्यम् (१४)

इति ब्रूयादयातयामा हि देवानां प्रजापतिरिति छन्दांसि देवेभ्योऽपाकामन्न वोऽभागानि हव्यं वक्ष्याम इति तेभ्य एतच्चतुरवत्तमधारयन्पुरोनुवाक्याये याज्याये देवताये वषट्काराय यच्चतुरवत्तं जुहोति छन्दांस्येव तत्प्रीणाति तान्यस्य प्रीतानि देवेभ्यो हव्यं वहन्त्यङ्गिरसो वा इत उत्तमाः सुवर्गं लोकमायन्तदृषयो यज्ञवास्त्वभ्यवायन्ते (१५)

अपश्यन्पुरोडाशं कूर्मम्भूतं सर्पन्तं तमब्रुवन्निन्द्राय ध्रियस्व बृहस्पतये ध्रियस्व विश्वेभ्यो देवेभ्यो ध्रियस्वेति स नाध्रियत् तमब्रुवन्अग्नये ध्रियस्वेति सौऽअग्नयेऽध्रियत् यदाग्नेयोऽष्टाकपालोऽमावास्यायां च पौर्णमास्यां चाच्युतो भवति सुवर्गस्य लोकस्याभिर्जित्यै तमब्रुवन्कथाहांस्था इत्यनुपाक्तोऽभूवमित्यब्रवीद्यथाक्षोऽनुपाक्तः (१६)

अवाच्छत्येवमवारमित्युपरिष्ठादभ्यज्याधस्तादुपानक्ति सुवर्गस्य लोकस्य समष्टौ सर्वाणि कपालान्यभि प्रथयति तावतः पुरोडाशानमुष्मिन्नैकैऽभि जयति यो विदग्धः स नैर्ऋतो योऽशृतः स रौद्रो यः शृतः स सदैवस्तस्मादविदहता शृतंकृत्यः सदेवत्वाय भस्मनाभि वांसयति तस्मान्मासेनास्थिं छुन्नं वेदेनाभि वांसयति तस्मात् (१७)

केशैः शिरश्छुन्नं प्रच्युतं वा एतदस्माल्लोकादगतं देवलोकं यच्छृतं हविरनभिघारितमभिघार्योद्वासयति देवत्रैवेनद्रमयति यद्येकं कपालं नश्येदेको मासः संवत्सरस्यानवेतः स्यादथ यजमानः प्र मीयेत् यद्वे नश्येतां द्वौ मासौ संवत्सरस्यानवेतौ स्यातामथ यजमानः प्र मीयेत् संख्यायोद्वासयति यजमानस्य (१८)

गोपीथाय यदि नश्येदाश्विनं द्विकपालं निर्वपेद्वावापृथिव्यमेकंकपालमश्विनौ वै देवानां भिषजौ ताभ्यामेवासमै भेषजं करोति द्वावापृथिव्यं एकंकपालो भवत्यनयोर्वा एतन्नश्यति यन्नश्यत्यनयोरेवेनद्विन्दति प्रतिष्ठित्यै॥ (१९)

प्राजापत्यन्तेऽक्षोऽनुपाक्तो वेदेनाभि वांसयति तस्माद्यजमानस्य द्वात्रिंशच्च॥ [३]

देवस्य त्वा सवितुः प्रसव इति स्फ्यमा दत्ते प्रसूत्या अश्विनोर्बाहुभ्यामित्याहाश्विनौ हि देवानामध्वर्यू आस्ताम् पूष्णो हस्ताभ्यामित्याह यत्यै शतभृष्टिरसि वानस्पत्यो द्विपतो वध इत्याह वज्रमेव तत्सः श्यति भ्रातृव्याय प्रहरिष्यन्थस्तम्बयजुरर्हरत्येतावन्ती वै पृथिवी यावन्ती वेदिस्तस्या एतावन्त एव भ्रातृव्यं निर्भजति (२०)

तस्मान्नाभागं निर्भजन्ति त्रिर्हरति त्रयं इमे लोका एभ्य एवैनं लोकेभ्यो निर्भजति तूष्णीं चतुर्थः हरत्यपरिमितादेवेनं निर्भजत्युद्धन्ति यदेवास्यां अमेध्यं तदपं हन्युद्धन्ति तस्मादोषधयः परा भवन्ति मूलं छिनत्ति भ्रातृव्यस्यैव मूलं छिनत्ति पितृदेवत्यातिखातेयतीं खनति प्रजापतिना (२१)

यज्ञमुखेन सम्मितामा प्रतिष्ठायै खनति यजमानमेव प्रतिष्ठां गमयति दक्षिणतो वर्षीयसीं करोति देवयजनस्यैव रूपमंकः पुरीषवतीं करोति प्रजा वै पशवः पुरीषम्प्रजयैवैनम्पशुभिः पुरीषवन्तं करोत्युत्तरं परिग्राहं परि गृह्णात्येतावन्ती वै पृथिवी यावन्ती वेदिस्तस्या एतावन्त एव भ्रातृव्यं निर्भज्यात्मन उत्तरं परिग्राहं परि गृह्णाति क्रूरमिव वै (२२)

एतत्करोति यद्वेदिं करोति धा असि स्वधा असीतिं योयुष्यते शान्त्यै प्रोक्षणीरा सादयत्यापो वै रक्षोघ्नी रक्षसामपंहत्यै स्फ्यस्य वर्त्मन्थादयति यज्ञस्य सन्तत्यै यं द्विष्यात्तं ध्यायेच्छुचैवैनमर्पयति॥ (२३)

भजति प्रजापतिनेव वै त्रयस्त्रिंशच्च॥ [४]

ब्रह्मवादिनो वदन्त्यद्विरहवींषि प्रौक्षीः केनाप इति ब्रह्मणेति ब्रूयादद्विरह्वं हवींषि प्रोक्षति ब्रह्मणाप इध्माबर्हिः प्रोक्षति मेध्यमेवैनत्करोति वेदिं प्रोक्षत्यृक्षा वा एषाऽलोमकाऽमेध्या यद्वेदिर्मध्यामेवैनं करोति दिवे त्वान्तरिक्षाय त्वा पृथिव्यै त्वेति बर्हिःसाद्य प्र (२४)

उक्षत्येभ्य एवैनल्लोकेभ्यः प्रोक्षति क्रूरमिव वा एतत्करोति यत्खनन्त्यपो नि नयति शान्त्यै पुरस्तात्प्रस्तरं गृह्णाति मुख्यमेवैनं करोतीयन्तं गृह्णाति प्रजापतिना यज्ञमुखेन सम्मितम्बर्हिः स्तृणाति प्रजा वै बर्हिः पृथिवी वेदिः प्रजा एव पृथिव्यां प्रतिष्ठापयत्यनतिदृश् स्तृणाति प्रजयैवैनम्पशुभिरनतिदृश्जं करोति (२५)

उत्तरम्बर्हिषः प्रस्तरं सादयति प्रजा वै बर्हिर्यजमानः प्रस्तुरो यजमानमेवायं यजमानादुत्तरं करोति तस्माद्यजमानोऽयं यजमानादुत्तरोऽन्तर्दधाति व्यावृत्त्या अनक्ति हविष्कृतमेवेनं सुवर्गं लोकं गमयति त्रेधानं किति त्रयं इमे लोका एभ्य एवैनं लोकेभ्योऽनक्ति न प्रति शृणाति यत्प्रतिशृणीयादन्धूध्वम्भावुकं यजमानस्य स्यादुपरीव प्र हरति (२६)

उपरीव हि सुवर्गो लोको नि यच्छति वृष्टिमेवास्यै नि यच्छति नात्यग्रम्प्र हरेद्यदत्यग्रम्प्रहरैदत्यासारिण्यध्वर्योर्नाशुका स्यान्न पुरस्तात्प्रत्यस्येद्यत्पुरस्तात्प्रत्यस्यैथ्सुवर्गाल्लोकाव प्रति नुदेत्प्राश्चम्प्र हरति यजमानमेव सुवर्गं लोकं गमयति न विष्वञ्चं वि युयाद्यद्विष्वञ्चं वियुयात् (२७)

स्यस्य जायेतोर्ध्वमुद्यौत्यूर्ध्वमिव हि पुंसः पुमानेवास्यं जायते यथ्स्येनं वोपवेपेण वा योयुष्येत स्तृतिरेवास्य सा हस्तेन योयुष्यते यजमानस्य गोपीथायं ब्रह्मवादिनो वदन्ति किं यज्ञस्य यजमान इति प्रस्तर इति तस्य कं सुवर्गो लोक इत्याहवनीय इति ब्रूयाद्यत्प्रस्तरमाहवनीये प्रहरति यजमानमेव (२८)

सुवर्गं लोकं गमयति वि वा एतद्यजमानो लिशते यत्प्रस्तरं योयुष्यन्तं बर्हिरनु प्रहरति शान्त्या अनारम्भण इव वा एतर्ह्यध्वर्युः स ईश्वरो वैपनो भवितोर्ध्रुवासीतीमामभि मृशतीयं वै ध्रुवाऽस्यामेव प्रति तिष्ठति न वैपनो भवत्यगा(३)नग्नीदित्याह यद्व्यादगन्त्रिग्निरित्यग्नावग्निं गमयेन्निर्यजमानं सुवर्गाल्लोकाद्भजेदग्नित्येव ब्रूयाद्यजमानमेव सुवर्गं लोकं गमयति॥ (२९)

आसाद्य प्रानतिदृशं करोति हरति वियुयाद्यजमानमेवाग्निरिति सप्तदश च॥ [५]

अग्नेस्त्रयो ज्यायांसो भ्रातर आसन्ते देवेभ्यो हव्यं वहन्तः प्रामीयन्त सौऽग्निरंविभेदित्यं वाव स्य आर्तिमारिष्यतीति स निलायत सौऽपः प्राविशत देवताः प्रैषंमैच्छन्तम्मथस्यः प्राब्रवीत्तमंशपद्धियाधिंया त्वा वध्यासुर्यो मा प्रावोच इति तस्मान्मथस्य धियाधिंया प्रन्ति शप्तः (३०)

हि तमन्विन्दन्तमब्रुवन्नुप न आ वर्तस्व हव्यं नो वहेति सौऽब्रवीद्वरं वृणै यदेव गृहीतस्याहुतस्य बहिःपरिधि स्कन्दात्तन्मे भ्रातृणां भागधेयं मसदिति तस्माद्यद्गृहीतस्याहुतस्य बहिःपरिधि स्कन्दति तेषां तद्भागधेयं तानेव तेन प्रीणाति परिधीन्परि दधाति रक्षंसांमपहत्यै सः स्पर्शयति (३१)

रक्षसामनन्ववचाराय न पुरस्तात्परि दधात्यादित्यो ह्येवोद्यन्पुरस्ताद्रक्षास्यपहन्त्यूर्ध्वं
समिधावा दधात्युपरिष्ठादेव रक्षास्यपं हन्ति यजुषान्यां तूष्णीमन्यामिथुनत्वाय द्वे आ
दधाति द्विपाद्यजमानः प्रतिष्ठित्यै ब्रह्मवादिनो वदन्ति स त्वे यंजेत यो यज्ञस्यात्य
वसीयान्स्यादिति भूपंतये स्वाहा भुवनपतये स्वाहा भूतानाम् (३२)

पतये स्वाहेति स्कन्मनु मन्त्रयेत यज्ञस्यैव तदार्त्या यजमानो वसीयान्भवति भूयसीरहि
देवताः प्रीणाति जामि वा एतद्यज्ञस्य क्रियते यदन्वञ्चौ पुरोडाशावुपाशुयाजमन्त्रा
यंजत्यजामित्वायाथो मिथुनत्वायाग्निरमुष्मिन्नौक आसीद्यमोऽस्मिन्ते देवा अब्रुवन्नेतेमौ वि
पर्यहामेत्यन्नाद्येन देवा अग्निम् (३३)

उपामन्त्रयन्त राज्येन पितरो यमं तस्मादग्निर्देवानामन्नादो यमः पितृणां राजा य
एवं वेद् प्र राज्यमन्नाद्यमाप्नोति तस्मा एतद्भागधेयम्प्रायच्छन् यदग्नये स्विष्टकृतैर्वृद्धन्ति
यदग्नये स्विष्टकृतैर्वृद्धति भागधेयैर्नैव तद्रुद्रं समर्धयति सकृत्सकृदव द्यति सकृदिव
हि रुद्र उत्तरार्धादव द्यत्येषा वै रुद्रस्य (३४)

दिग्स्वायामेव दिशि रुद्रं निरवदयते द्विरभि धारयति चतुरवत्तस्यास्यै पशवो वै पूर्वा
आहुतय एष रुद्रो यदग्निर्यपूर्वा आहुतीरभि जुहुयाद्रुद्राय पशूनपि दध्यादपशुर्यजमानः
स्यादतिहाय पूर्वा आहुतीर्जुहोति पशूनां गोपीथार्य॥ (३५)

शतः स्पर्शयति भूतानामग्निं रुद्रस्य सप्तत्रिंशच्च॥ [६]

मनुः पृथिव्या यज्ञियमैच्छत्स घृतं निषिक्तमविन्दत्सोऽब्रवीत्कोऽस्येश्वरो यज्ञेऽपि
कर्तोरिति तावंब्रूतामित्रावरुणौ गोरेवावमोऽश्वरौ कर्ताः स्व इति तौ ततो गां समैरयतां
सा यत्रयत्र न्यक्रामत्ततो घृतमपीडयत् तस्माद्धृतपद्युच्यते तदस्यै जन्मोपहृतं रथन्तरं
सह पृथिव्येत्याह (३६)

इयं वै रथन्तरमिमामेव सहान्नाद्येनोप ह्वयत् उपहृतं वामदेव्यं सहान्तरिक्षेणेत्याह
पशवो वै वामदेव्यं पशूनेव सहान्तरिक्षेणोप ह्वयत् उपहृतम्बृहत्सह दिवेत्याहैरं वै
बृहदिरामेव सह दिवोप ह्वयत् उपहृताः सप्त होत्रा इत्याह होत्रा एवोप ह्वयत् उपहृता
धेनुः (३७)

सुहृषभेत्याह मिथुनमेवोप ह्वयत् उपहृतो भक्षः सखेत्याह सोमपीथमेवोप ह्वयत्
उपहृतां (४) हो इत्याहात्मानमेवोप ह्वयत् आत्मा ह्युपहृतानां वसिष्ठ इडामुप ह्वयते

पशवो वा इडां पशूनेवोपं ह्वयते चतुरुपं ह्वयते चतुष्पादो हि पशवो मानवीत्याहु
मनुरर्ह्येताम् (३८)

अग्रेऽपश्यद्भृतपदीत्याहु यदेवास्यै पदाद्भृतमपीडयत् तस्मादेवमाह मैत्रावरुणीत्याह
मित्रावरुणौ ह्येना॑ समैरयतां ब्रह्म देवकृतमुपहृतमित्याहु ब्रह्मैवोपं ह्वयते दैव्या अध्वर्यव
उपहृता उपहृता मनुष्या इत्याह देवमनुष्यानेवोपं ह्वयते य इमं यज्ञमवान् ये यज्ञपतिं
वर्धनित्याह (३९)

यज्ञाय चैव यजमानाय चाशिषमा शास्त उपहृते द्यावापृथिवी इत्याहु द्यावापृथिवी
एवोपं ह्वयते पूर्वजे ऋतावरी इत्याह पूर्वजे ह्येते ऋतावरी देवी देवपुत्रे इत्याह देवी ह्येते
देवपुत्रे उपहृतोऽयं यजमान इत्याहु यजमानमेवोपं ह्वयत् उत्तरस्यां देवयज्यायामुपहृतो
भूर्यसि हविष्करणं उपहृतो दिव्ये धामन्नुपहृतः (४०)

इत्याह प्रजा वा उत्तरा देवयज्या पशवो भूर्यो हविष्करणं सुवर्गो
लोको दिव्यं धामेदमसीदमसीत्येव यज्ञस्य प्रियं धामोपं ह्वयते विश्वमस्य
प्रियमुपहृतमित्याहाछम्बद्वारमेवोपं ह्वयते॥ (४१)

आहु धेनुरेतां वर्धनित्याहु धामन्नुपहृतश्चतुस्त्रिंशच्च॥ [७]

पशवो वा इडां स्वयमा दत्ते काममेवात्मनां पशूनामा दत्ते न ह्यन्यः
कामम्पशूनाम्प्रच्छति वाचस्पतये त्वा हुतम्प्राश्नामीत्याहु वाचमेव भागधेयेन
प्रीणाति सदस्स्पतये त्वा हुतम्प्राश्नामीत्याह स्वगाकृत्यै चतुरवत्तम्भवति हविर्वै
चतुरवत्तम्पशवंश्चतुरवत्तं यद्धोतां प्राश्रीयाद्धोतां (४२)

आर्तिमार्च्छेद्यद्रौ जुहुयाद्बुद्वायं पशूनपि दध्यादपशुर्यजमानः स्याद्वाचस्पतये त्वा
हुतम्प्राश्नामीत्याह पुरोक्षमेवैनंशुहोति सदस्स्पतये त्वा हुतम्प्राश्नामीत्याह स्वगाकृत्यै प्राश्रन्ति
तीर्थ एव प्राश्रन्ति दक्षिणां ददाति तीर्थ एव दक्षिणां ददाति वि वा एतद्यज्ञम् (४३)

छिन्दन्ति यन्मध्यतः प्राश्रन्त्यद्विर्मार्जयन्त आपो वै सर्वा देवता देवताभिरेव यज्ञं
सं तन्वन्ति देवा वै यज्ञाद्बुद्धमन्तरायन्त्स यज्ञमविध्यन्त देवा अभि समंगच्छन्त कल्पतां
न इदमिति तेऽब्रुवन्त्स्विष्टं वै न इदम्भविष्यति यदिमं राधियुष्याम् इति तत्स्विष्टकृतः
स्विष्टकृत्तस्याविद्धं निः (४४)

अकृन्तन् यवेन सम्मितं तस्माद्यवमात्रमव द्येद्यज्ञायोऽवद्येद्रोपयेत्तद्यज्ञस्य यदुपं च स्तृणीयादभि चं घारयेदुभयतःसध्यायि कुर्यादवदायाभि घारयति द्विः सम्पद्यते द्विपाद्यजमानः प्रतिष्ठित्यै यत्तिरश्नीनमतिहरेदनभिविद्धं यज्ञस्याभि विध्येदग्रेण परि हरति तीर्थेनैव परि हरति तत्पूष्णे पर्यहरन्तत् (४५)

पूषा प्राश्यं दतोऽरुणत्तस्मात्पूषा प्रपिष्टभागोऽदन्तको हि तं देवा अब्रुवन्वि वा अयमार्ध्यप्राशित्रियो वा अयमभूदिति तद्वहस्पतये पर्यहरन्त्सोऽबिभेद्वहस्पतिरित्थं वाव स्य आर्तिमारिष्यतीति स एतम्मन्त्रमपश्यत्सूर्यस्य त्वा चक्षुषा प्रति पश्यामीत्यब्रवीन्न हि सूर्यस्य चक्षुः (४६)

किं चन हिनस्ति सोऽबिभेत्प्रतिगृह्णन्तं मा हिःसिष्यतीति देवस्य त्वा सवितुः प्रंसवेऽश्विनोर्बाहुभ्यां पूष्णे हस्ताभ्यां प्रति गृह्णामीत्यब्रवीत्सवितुप्रंसूत एवैनद्वह्मणा देवताभिः प्रत्यंगृह्णात्सोऽबिभेत्प्राश्रन्तं मा हिःसिष्यतीत्यग्रेस्त्वास्येन प्राश्रामीत्यब्रवीन्न ह्यग्रेरास्यं किं चन हिनस्ति सोऽबिभेत् (४७)

प्राशितं मा हिःसिष्यतीति ब्राह्मणस्योदरेणेत्यब्रवीन्न हि ब्राह्मणस्योदरं किं चन हिनस्ति बृहस्पतेर्ब्रह्मणेति स हि ब्रह्मिष्ठोऽप वा एतस्मात्प्राणाः क्रामन्ति यः प्राशित्रमप्राश्रात्यद्विर्माजयित्वा प्राणान्धम्मृशतेऽमृतं वै प्राणा अमृतमापः प्राणानेव यथास्थानमुप ह्वयते॥ (४८)

प्राश्रणीयाद्धोता यज्ञत्रिरहरन्तच्चक्षुरास्यङ्किं चन हिनस्ति सोऽबिभेच्चतुश्चत्वारिंशच्च॥ [८]

अग्नीध आ दधात्यग्निमुखानेवर्तून्प्रीणाति समिधमा दधात्युत्तरासामाहुतीनां प्रतिष्ठित्या अथो समिद्वत्येव जुहोति परिधीन्धस्माष्टि पुनात्येवैनन्धस्मकृत्सकृत्स्माष्टि पराडिव ह्येतरहिं यज्ञश्चतुः सम्पद्यते चतुष्पादः पशवः पशून्नेवाव रुद्धे ब्रह्मन् स्थस्याम इत्याहात्र वा एतरहिं यज्ञः श्रितः (४९)

यत्र ब्रह्मा यत्रैव यज्ञः श्रितस्तत एवैनमा रभते यद्वस्तेन प्रमीवैद्वेपुनः स्याद्यच्छीर्णा शीर्षक्तिमान्धस्याद्यत्तूष्णीमासीतासम्प्रतो यज्ञः स्यात्प्र तिष्ठेत्येव ब्रूयाद्वाचि वै यज्ञः श्रितो यत्रैव यज्ञः श्रितस्तत एवैनः सम्प्र यच्छति देवं सवितरेतत्ते प्र (५०)

आहेत्याह प्रसूत्यै बृहस्पतिर्ब्रह्मेत्याह स हि ब्रह्मिष्ठः स यज्ञम्पाहि स यज्ञपतिम्पाहि

स माम्पाहीत्याह यज्ञाय यजमानायात्मने तेभ्यं एवाशिषमा शास्तेऽनार्त्या आश्राव्याह देवान् यजेति ब्रह्मवादिनो वदन्तीष्टा देवता अथ कतम एते देवा इति छन्दासीति ब्रूयाद्वायत्रीं त्रिष्टुभम् (५१)

जगतीमित्यथो खत्वाहुर्ब्राह्मणा वै छन्दासीति तानेव तद्यजति देवानां वा इष्टा देवता आसन्नथाग्निर्नोदज्वलत्तं देवा आहुतीभिरनूयाजेष्वन्वविन्दन् यदनूयाजान् यजत्यग्निमेव तत्समिन्द्र एतद्वै नामासुर आसीत्स एतर्हि यज्ञस्याशिषमवृद्धं यद्वयादेतत् (५२)

उ द्यावापृथिवी भद्रमभूदित्येतदुमेवासुरं यज्ञस्याशिषं गमयेदिदं द्यावापृथिवी भद्रमभूदित्येव ब्रूयाद्यजमानमेव यज्ञस्याशिषमगमयत्यार्धं सूक्तवाकमुत नमोवाकमित्याहेदमराध्स्मेति वावैतदाहोपश्रितो दिवः पृथिव्योरित्याह द्यावापृथिव्योर्हि यज्ञ उपश्रित ओमन्वती तेऽस्मिन् यज्ञे यजमानं द्यावापृथिवी (५३)

स्तामित्याहाशिषमेवैतामा शास्ते यद्वयात्सूपावसाना चं स्वध्यवसाना चेति प्रमायुको यजमानः स्याद्यदा हि प्रमीयतेऽथेमामुपावस्यति सूपचरणा चं स्वधिचरणा चेत्येव ब्रूयाद्वरीयसीमेवासमै गव्यंतिमा शास्ते न प्रमायुको भवति तयोराविद्यग्निरिदं हविरंजुषतेत्याह या अयाक्ष्म (५४)

देवतास्ता अरीरधामेति वावैतदाह यन्न निर्दिशेत्प्रतिवेशं यज्ञस्याशीर्गच्छेदा शास्तेऽयं यजमानोऽसावित्याह निर्दिश्यैवेनं सुवर्गं लोकं गमयत्यायुरा शास्ते सुप्रजास्त्वमा शास्त इत्याहाशिषमेवैतामा शास्ते सजातवनस्यामा शास्त इत्याह प्राणा वै संजाताः प्राणानेव (५)

नान्तरैति तदग्निर्देवो देवेभ्यो वनंते वयमग्नेर्मानुषा इत्याहाग्निर्देवेभ्यो वनुते वयं मनुष्येभ्य इति वावैतदाहेह गतिर्वामस्येदं च नमो देवेभ्य इत्याह याश्चैव देवता यजति याश्च न ताभ्यं एवोभर्याभ्यो नमस्करोत्यात्मनोऽनार्त्यै॥ (५६)

श्रितस्ते प्र त्रिष्टुभमेतद्यावापृथिवी या अयाक्ष्म प्राणानेव पद्वत्वारिश्च॥ [९]

देवा वै यज्ञस्यं स्वगाकर्तारं नाविन्दन्ते शं युम्बार्हस्पत्यमब्रुवन्निमं नो यज्ञं स्वगा कुर्विति सोऽब्रवीद्वरं वृणौ यदेवाब्राह्मणोक्तोऽश्रद्धधानो यजाते सा मे यज्ञस्याशीरंसदिति तस्माद्यदब्राह्मणोक्तोऽश्रद्धधानो यजते शं युमेव तस्यं बारहस्पत्यं

यज्ञस्याशीर्गच्छत्येतन्ममेत्यंब्रवीत्किम् प्रजायाः (५७)

इति योऽपगुरातै शतेन यातयाद्यो निहनन्त्सहस्रेण यातयाद्यो लोहितं कुरवद्यावतः प्रस्कद्य पा॒सून्त्संगृह्णात्तावतः संवत्सुरान्पितृलोकं न प्र जानादिति तस्माद्वाह्याय नापं गुरेत न नि हन्यान्न लोहितं कुर्यादेतावता हैनसा भवति तच्छं योरा वृणीमह इत्याह यज्ञमेव तत्स्वगा करोति तत् (५८)

शं योरा वृणीमह इत्याह शं युमेव बारहस्पत्यम्भागधेयेन समर्धयति गातुं यज्ञाय गातुं यज्ञपतय इत्याह शिषमेवैतामा शास्ते सोमं यजति रेत एव तदधाति त्वष्टारं यजति रेत एव हितं त्वष्टां रूपाणि वि करोति देवानाम्पत्नीर्यजति मिथुनत्वायाग्निं गृहपतिं यजति प्रतिष्ठित्यै जामि वा एतद्यज्ञस्य क्रियते (५९)

यदाज्येन प्रयाजा इज्यन्त आज्येन पत्नीसंयाजा ऋचमनूच्यं पत्नीसंयाजानामृचा यंजत्यजामित्वायार्थो मिथुनत्वाय पङ्क्तिप्रायणो वै यज्ञः पङ्क्तुदयनः पञ्च प्रयाजा इज्यन्ते चत्वारः पत्नीसंयाजाः संमिष्टयजुः पञ्चमम्पङ्क्तिमेवानुं प्र यन्ति पङ्क्तिमनूद्यन्ति॥ (६०)

प्रजायाः करोति तत्क्रियते त्रयस्त्रिंशच्च॥ [१०]

युक्ष्वा हि देवहूतमा॒ अश्वा॑ अग्रे रथीरिवा नि होतां पूर्यः संदः। उत नो देव देवा॑ अच्छा वोचो विदुष्टरः। श्रद्विश्वा वार्या कृधि। त्व॑ ह यद्यविष्ठम सहसः सूनवाहुत। ऋतावा यज्ञियो भुवः। अयमग्निः संहस्त्रिणो वाजस्य शतिनस्पतिः। मूर्धा कवी रंयीणाम्। तं नेमिमृभवो यथा नमस्व सहतिभिः। नेदीयो यज्ञम् (६१)

अङ्गिरः। तस्मै नूनमभिद्यंवे वाचा विरूप नित्यंया। वृष्णे चोदस्व सुष्टुतिम्। कमृ च्विदस्य सेनयाग्रेरपांकचक्षसः। पणिं गोषु स्तरामहे। मा नो देवानां विशः प्रस्नातीरिवोस्नाः। कृशं न हांसुरग्निः। मा नः समस्य दृढ्यः परिवेषसो अ॑हृतिः। ऊर्मिर्न नावमा वधीत्। नमस्ते अग्न ओजंसे गृणन्ति देव कृष्टयः। अमैः (६२)

अमित्रमर्दया कुविंशु नो गविष्टयेऽग्रे संवेषिषो रयिम्। उरुकृदुरु णस्कृधि। मा नो अस्मिन्महाधने परा वर्गारभृद्यथा। संवर्ग॑ स॑ रयिञ्जय। अन्यमस्मद्विया इयमग्रे सिपत्कु दुच्छुना। वर्धा नो अमवच्छवः। यस्याजुषन्नमस्विनः शमीमदुर्मखस्य वा। तं घेदग्निर्वृधावति। परस्या अधि (६३)

सुंवतोऽवरा५ अभ्या तरा यत्राहमस्मि ता५ अवा विद्या हि तै पुरा वयमग्रे
पितुर्यथावसः। अथा ते सुम्रमीमहे। य उग्र इव शर्यहा तिग्मशृङ्गो न वःसंगः। अग्रे
पुरो रुरोजिथ। सखायः सं वः सम्यञ्चमिषुः५ स्तोमं चाग्रये। वर्षिष्ठाय क्षितीनामूर्जो
नग्रे सहस्वते। स५ समिद्युवसे वृषन्नग्रे विश्वान्यर्य आ। इडस्पदे समिध्यसे स नो वसून्या
भर। प्रजापते स वेद सोमापूषणेमौ देवौ॥ (६४)

यज्ञमैरधि वृषन्नेकात्रवि५शतिश्च॥ [११]

उशन्तस्त्वा हवामह उशन्तः समिधीमहि। उशन्नुशत आ वह पितृन् हविषे अत्तवे।
त्व५ सौम प्रचिकितो मनीषा त्व५ रजिष्ठमनु नेषि पन्थाम्। तव प्रणीती पितरो न
इन्दो देवेषु रत्नमभजन्त धीराः। त्वया हि नः पितरः सोम पूर्वे कर्माणि चक्रुः पवमान
धीराः। वृन्वन्नवातः परिधी५ रपोर्णु वीरेभिरश्वैर्मघवा भव (६५)

नः। त्व५ सौम पितृभिः संविदानोऽनु द्यावापृथिवी आ ततन्था। तस्मै त इन्दो हविषा
विधेम वय५ स्याम पतयो रयीणाम्। अग्निष्वात्ताः पितर एह गच्छत सदःसदः सदत
सुप्रणीतयः। अत्ता हवी५षि प्रयतानि ब्रहिष्यथा रयि५ सर्ववीर दधातन। ब्रहिषदः पितर
ऊत्यर्वागिमा वो हव्या चकृमा जुषध्वम्। त आ गतावसा शन्तमेनाथास्मभ्यम् (६६)

शं योररपो दधाता आह पितृन्सुविदत्रा५ अविथिस् नपातश्च विक्रमणं च विष्णोः।
ब्रहिषदो ये स्वधया सुतस्य भजन्त पित्वस्त इहागमिष्ठाः। उपहृताः पितरो ब्रहिष्येषु
निधिषु प्रियेषु। त आगमन्तु त इह श्रुवन्त्वधि ब्रुवन्तु ते अवन्त्वस्मान्। उदीरतामवर
उत्परांस उन्मध्यमाः पितरः सोम्यासः। असुम् (६७)

य ईयुरवृका ऋतज्ञास्ते नोऽवन्तु पितरो हवेषु। इदम्पितृभ्यो नमो अस्त्वद्य ये
पूर्वासो य उपरास ईयुः। ये पार्थिवे रजस्या निपत्ता ये वा नून५ सुवृजनासु विक्षु।
अथा यथा नः पितरः परासः प्रत्नासो अग्र ऋतमांशुषाणाः। शुचीदयन्दीर्घितिमुक्थशासः
क्षामा भिन्दन्तो अरुणीरपं व्रत्र। यदग्रे (६८)

कव्यवाहन पितृन् यक्ष्यतावृधः। प्र च हव्यानि वक्ष्यसि देवेभ्यश्च पितृभ्य आ।
त्वमग्रे ईडितो जातवेदोऽवाङ्मुव्यानि सुरभीणि कृत्वा। प्रादाः पितृभ्यः स्वधया ते अक्षन्नद्धि
त्वं देव प्रयता हवी५षि। मातली कव्यैर्यमो अङ्गिरोभिर्बृहस्पतिरऋक्भिर्वावृधानः। या५श्च
देवा वावृधुर्ये च देवान्स्वाहान्ये स्वधयान्ये मदन्ति। (६९)

द्वमं यम प्रस्तरमा हि सीदाङ्गिरोभिः पितृभिः संविदानः। आ त्वा मन्त्राः कविशस्ता
 वहन्त्वेना राजन् हविषा मादयस्व। अङ्गिरोभिरा गंहि यज्ञियेभिर्यमं वैरूपैरिह मादयस्व।
 विवस्वन्तः हुवे यः पिता तेऽस्मिन् यज्ञे बर्हिष्या निषद्य। अङ्गिरसो नः पितरो
 नवंग्वा अथर्वाणो भृगवः सोम्यासः। तेषां वयः सुमतौ यज्ञियांनामपि भद्रे सौमनसे
 स्याम (७०)

[समिधो याज्या तस्मान्नाभागः हि तमन्वित्याह प्रजा वा आहेत्याह युक्त्वा हि
 संततिः॥70॥ समिधः सौमनसे स्याम॥]

भ्वास्मभ्यमसुं यदग्रे मदन्ति सौमनस एकञ्च॥ [१२]

प्रजापतिरकामयतैष तै यज्ञं वै प्रजापतेर्जायमानाः प्राजापत्या यो वा अयथादेवतमिष्टर्गो
 निग्राभ्याः स्थ यो वै देवां जुष्टोऽग्निना रयिमेकादश॥ [१३]